





國學小叢書

遼金元文學史

吳梅著

中華民國二十三年三月初版

(二一六六七)

小國學叢書遼金元文學史一冊

每册定價大洋肆角

外埠酌加運費隨費

著作者

吳

梅

發行人兼

王 上海河南路五

印刷所

上海河南路五

發行所

上海及各埠  
商務印書館

\*\*\*\*\*  
有究必所權印翻版\*\*\*\*\*

(本校對者楊頌文)

一九八二上

# 目 次

## 一 遷

一 文家

二 詩家

三

## 二 金

一 文家

二 詩家

二九

三 詞家

五〇

四 曲家

七一

八一

## 三 元

八五

### 一 文家

八六

### 二 詩家

九九

### 三 詞家

一二〇

### 四 曲家

一三三

# 遼金元文學史

## 一 遼

文字者。所以變鄙塞爲文明之具也。地球文明。以亞洲爲最古。亞洲文明。以中國爲最古。宋明以前。外部藩屬一與中國交通。無不吸收中國之文明以去。漢則匈奴遣子入學。唐則日本繙譯五經。其盛者固無論矣。卽陵夷至於六朝晉宋之末。五胡金元鷹瞵虎視。蹴踏我土地。奴隸我人民。而問其官制詞章。無不楷模於我先代。此何故哉。以鄙塞遇文明。欲不同化而不得也。遼之先本爲契丹。雄於朔方。自太宗建國。始號大遼。造邦本籍於干戈。致治不資於黼黻。五代會要云。後唐天成三年。王晏球等獲契丹絹書二封來進。明宗命宣示羣臣。莫有識其文字者。契丹本無文記。惟刻木爲信。漢人陷蕃者。以隸書之半。就加增減。撰爲胡文。同光之後。稍稍有之。據此是遼本無文記。在後唐時已然。遼史文學傳序曰。太祖以兵略方內。禮文之事。固所未遑。及太祖入汴。取晉圖書禮器而北。然後制度漸修。至景德。

聖間。則科目聿興。駿駿崇儒之美。蓋遼雖起塞外。不識漢文。而首立孔子廟。太祖卽親祭孔子。太宗及東丹王兄弟皆工繪事。其材藝有足稱者。每科放進士榜百餘人。故國多文學之士。原其所以能變儻野而爲文明。則始於太宗得石晉之燕雲十六州。盛於聖宗之與宋盟好。使命交通。由是中原文學之士。仕於其朝。及奉使至彼者。日見其衆。彼亦自慚其弇鄙。遂漸捨棄其舊俗。而服從我中夏之文教矣。此種情狀。爲遼金元三朝所同。而遼其嚆矢也。

契丹開國。久於完顏。文教之彰。使命之美。亦與金元彷彿。惟據宋沈括夢溪筆談云。遼書禁甚嚴。傳入中國者法皆死。以致當日之記注典章。可裨國史者。求之簿錄家。不少概見。卽家集野乘。亦散佚無傳。今遼人遺書。止存龍龜手鑑。焚椒錄。星命總括三種。其詩文歷金元明三朝。無有爲之注意收拾者。至清乾隆時。海寧周春始輯遼詩話二卷。後有韓君小亭嘗手輯遼文存。自言大半得於荒原古社。氈蠟之餘。一剝那間。聞亦散亡。(見趙之謙沈氏論語孔注辨僞跋)至光緒中葉。江陰繆荃蓀搜輯詩文六卷。亦名遼文存。吳縣王仁俊以上古至隋唐至明。皆有總集。惟五代及遼闕如。乃發憤先成遼文萃十四卷。繼見繆氏書。遂刪其所已刊者。復發篋陳書。搜闕補遺。刊爲七卷。民國八年。南海黃任恆。

又掇拾叢殘。爲遼文最四卷。繼亦以有繆氏書。遂刪存爲遼文補錄一卷。諸君子竭其心力。抉隱扶微。洵爲耶律氏之功臣。今編遼代文學史。捨諸書亦無所取材矣。

### (一) 文家

昔王漁洋語汪堯峯云。遼以制科取士。其間躋政府。登膾仕者甚衆。而考之列傳。自橫帳諸院國舅別部三族之外。其事迹不少概見。惟文學傳寥寥數人。豈制科之盡不足書耶。堯峯答云。此史臣失於紀載故也。遼金立國。規模不甚相遠。而金元人物文章。得元好問劉祁諸君子。遂能頡頏宋元之間。夫子曰。文獻不足。杞宋無徵。正爲是歟。然經乾嘉後學者。一再蒐羅後。未嘗不燦然可觀。今爲整齊而彙列之。亦足爲遼朝人士一雪此言矣。

道宗宣懿皇后蕭氏。幼能誦詩。旁及經子。其行事與詩尤有關係。詳見於後詩家內。然其文亦有非當時諸人所能及者。今錄其諫道宗馳獵疏云。妾聞穆王遠駕。周德用衰。太康佚豫。夏社幾危。此遊畋之往戒。帝王之龜鑑也。頃見駕幸秋山。不閑六御。特以單騎從禽。深入不測。此雖威神所屆。萬靈自爲擁護。倘有絕羣之獸。果如東方所言。則溝中之豕。必敗簡子之駕矣。妾雖愚闇。竊爲社稷憂之。惟陛下

下尊老氏馳騁之戒。用漢文吉行之旨。不以其言爲牝雞之晨而納之。文僅百二十餘言。而詞意並茂。有宋人所不及者。謂非山川靈秀之氣。獨鍾於后不可也。

耶律果囉善屬文。聖宗重之。時妻弟之妻阿古與奴迺。將奔女直國。果囉追及。殺之。阿古自經。阿古母有寵於太后。太后怒。殺之人多冤之。在獄著免賦寤寐歌。爲世所稱。

耶律庶成字喜隱。小字辰祿。幼好學。書過目不忘。善遼漢文字。於詩尤工。重熙初。累遷樞密直學士。與蕭罕嘉努各進四時逸樂賦。帝嗟賞。初。契丹醫人鮮知切脈審藥。上命庶成譯方脈書行之。偕林牙蕭罕嘉努等撰寶錄及禮書。有詩文行於世。今已佚。

耶律庶箴字辰富。庶成弟也。善屬文。官都林牙。上表乞廣本國姓氏曰。我朝創業以來。法制修明。惟姓氏止分爲二。耶律與蕭而已。始太祖制契丹大字。取諸部鄉里之名。續作一篇。著於卷末。臣請推廣之。使諸部各立姓氏。庶男女婚媾。有合典禮。帝不聽。嘗寄誠諭詩與子富魯。

耶律富魯字努展。庶箴子也。幼聰悟好學。甫七歲。能誦契丹大字。習漢文。未十年。博通經籍。重熙中。舉進士第。尋命爲牌印郎君。應詔賦詩。立成以進。帝嘉賞。顧左右曰。文才如此。必不能武事。富魯奏

曰。臣自蒙義方。兼習騎射。帝未之信。會從獵。三矢中三兔。帝益奇之。是時父庶篋嘗寄誠諭詩。富魯答以賦。衆稱其典雅。清寧初卒。

耶律昭字述寧。博學善屬文。蕭達林爲西北招討使。愛之。禮致門下。問曰。今軍旅甫罷。三邊晏然。惟準布伺隙而動。討之則路遠難至。縱之則邊民被掠。增戍兵則餽餉不給。欲苟一時之安。不能終保無變。計將安出。昭以書答曰。竊聞治得其要。則仇敵爲一家。失其術。則部曲爲行路。夫西北諸部。每當農時。一夫爲僨候。一夫治公田。二夫給糲官之投。大率四丁無一室處。芻牧之事。仰給妻孥。一遭寇掠。貧窮立至。春夏振恤。吏多雜以糠粃。重以掊克。不過數月。又復告困。且畜牧者富國之本。有司防其隱沒。聚之一所。不得各就水草便地。兼以逋亡戍卒。隨時調補。不習風土。故日瘠月損。駢致耗竭。爲今之計。莫若振窮薄賦。給以牛種。使途耕穉。置游兵以防盜掠。殞俘獲以助伏臘。散畜牧以就便地。期以數年。富強可望。然後簡練精兵。以備行伍。何守之不固。何動而不克哉。然必去其難制者。則餘種自畏。若捨大而謀小。避強而攻弱。非徒虛費財力。亦不足以威服其心。此二者利害之機。不可不察。昭聞古之名將。安邊立功。在德不在衆。故謝玄以八千破苻堅百萬。休格以五隊敗曹彬十萬。良由恩結士心得。

其死力也。閣下膺非常之遇。專方面之寄。宜遠師古人。以就勳業。上觀乾象。下盡人謀。察地形之險易。料敵勢之虛實。慮無遺策。利施後世矣。達林然之。此書雅健有西漢晁賈之風。惜不多見。

耶律孟簡字復易。性穎悟。六歲。父璫嘉努晨出獵。俾賦曉天星日詩。孟簡應聲而成。父大奇之。既長。善屬文。太康初。樞密使耶律伊遜以姦險竊柄。出爲中京留守。孟簡表賀。未幾。伊遜復舊職。銜之。謫巡磁窯關。時雖以讒見逐。不形辭色。遇林泉勝地。終日忘歸。明年流保州。及聞皇太子被害。不勝哀痛。以詩傷之。作放懷詩二十首。自序云。禽獸有哀樂之聲。螻蟻有動靜之形。在物猶然。況於人乎。然賢達哀樂。不在窮通禍福之間。易曰。樂天知命故不憂。是以顏淵簞瓢自得。此知命而樂者也。予雖流放。以道自安。又何疑耶。太康中。始歸鄉里。詣闕上表曰。本朝之興。幾二百年。宜有國史。以垂後世。乃編耶律赫嚕烏哲休格三人行事以進。上命置局編修。孟簡謂餘官曰。史筆天下之大信。一言當否。百世從之。苟無明識。好惡徇情。則禍不測。故左氏司馬遷班固范曄俱罹殃禍。可不慎歟。孟簡史識旣高。文亦雅澹有法。惜乎其詩之無傳也。

耶律唐古字敵隱於越。屋質之庶子。廉謹善屬文。統和二十四年。述屋質安民治盜之法以進。又

陳弘私販安邊境之要。太后嘉之。重熙間。改陝衍黨項部節度使。四年致仕。乞勒其父功於石。卒年七十八。

耶律氏太師適魯之妹。小字常格。幼爽秀。有成人風。及長。操行修潔。自誓不嫁。能詩文。不苟作。讀通歷。見前人得失。歷能品藻。咸雍間。作文以述時政。其略曰。君以民爲體。民以君爲心。人主當任忠賢。人臣當去比周。則政化平。陰陽順。欲懷遠。則崇恩尚德。欲強國。則輕徭薄賦。四端五典。爲治教之本。六府三事。實生民之命。淫侈可以爲戒。勤儉可以爲師。錯枉則人不敢詐。顯忠則人不敢欺。勿泥空門。崇飾土木。勿事邊鄙。妄費金帛。滿當思溢。安必虛危。刑罰當罪。則民勸善。不寶遠物。則賢者至。建萬世磐石之業。制諸部強橫之心。欲率下。則先正身。欲治遠。則始朝廷。上稱善。時樞密使耶律伊遜愛其才。屢求詩。常格遺以回文。伊遜知其諷已。銜之。太康三年。皇太子坐事。伊遜誣以罪。按無迹。獲免。及太子被害。不勝哀痛。年七十。卒於家。按中國女子能爲麗辭者。代有其人。其能留意於國政者。實鮮。常格此文。納誨陳善。不亞於懿德后之諫獵疏。何遼邦閨閣之多才也。

蕭罕嘉努字糾堅。納喇部人。中書令安圖之孫。少好學。弱冠入南山讀書。博覽經史。通遼漢文字。

重熙初。同知三司使事。四年遷天成軍節度使。徙彰愍宮使。興宗與語。才之命爲詩友。嘗從容問曰。卿居外有異聞乎。對曰。臣惟知炒栗。小者熟則大者必生。大者熟則小者必焦。使大小均熟。始爲盡美。不知其他。蓋嘗掌栗園。故託栗以諷諫。帝大笑。詔作四時逸樂賦。帝稱善。時詔天下言治道之要。罕嘉勞對策甚美。文長不錄。擢翰林都林牙。兼修國史。仍詔諭之曰。文章之職。國之光華。非才不用。以卿文學爲時大儒。是用授卿以翰林之職。自是日見親信。每入侍賜坐。遇勝日。帝與飲酒賦詩。以相酬酢。雖諧謔不忘規諷。詔與耶律庶成錄約尼汗至重熙以來事迹。集爲二十卷進之。復被詔博考經籍。自天子達於庶人情文制度。可行於世。不繆於古者。譏成三卷進之。又詔譯諸書。罕嘉勞欲帝知古今成敗。譯通歷貞觀政要五代史。拜歸德軍節度使。召修國史。卒年七十二。有六義集十二卷行於世。今佚。

李澣字日新。幼聰敏。慕王楊盧駱爲文章。初仕晉爲中書舍人。晉亡歸遼。授翰林學士。屢遷工部侍郎。時兄濤在汴爲翰林學士。密遣人召澣。澣易服夜出。至涿。爲徼巡者所得。送南京下吏。帝欲殺之。樞密使高勳救止之。屢言於上曰。澣富於文學。方今少有倫比。若留掌詞命。可以增光國體。帝令禁錮於奉國寺。會上欲建太宗功德碑。高勳曰。非李澣無可秉筆者。詔從之。文成以進。上悅。釋囚。尋加宣政

殿學士卒。陶岳五代史補載其軼事曰。李澣有逸才。每作文。則筆不停輶。而性嗜酒。楊凝式嘗受詔撰錢鏐碑。自以才不逮澣。於是召澣飲。俟其酣。使代筆。經宿而成。凡一萬五千字。莫不詞理典贍。凝式歎服。蘇易簡續翰林志亦稱其詞藻特麗。俊秀不羣。卽澣文之價值可知矣。惜其所著丁年集十卷。今已不傳。

王鼎字虛中。涿州人。幼好學。居太寧山數年。博通經史。清寧五年。擢進士第。累遷翰林學士。當代典章。多出其手。上書言治道十事。帝以鼎達政體。事多咨訪。坐事下吏。杖黥奪官。流鎮州。居數歲。召還復其職。乾統六年卒。鼎爲焚椒祿。記懿安后被誣事甚悉。後人有疑其不出於鼎手者。然錄中節目。多與遼史符合。未可武斷爲僞也。今錄其自序云。鼎於咸太之際。方侍禁近。會有懿德皇后之變。一時南北面官悉以異說赴權。互爲證足。遂使懿德蒙被淫醜。不可湔浣。嗟嗟。大墨蔽天。白日不照。其能戶說以相白乎。鼎婦乳媼之女蒙哥。爲耶律乙辛寵婢。知其奸構最詳。而蕭司徒復爲鼎道其始末。更有加於媼者。因相與執手。歎其冤誣。至爲涕淫淫下也。觀變以來。忽復數載。頃以待罪可敦城。去鄉數千里。視日如歲。觸景興懷。舊感來集。乃直書其事。用竣後之良史。若夫少海翻波。變爲險陸。則有司徒公之

實錄。在此序作於大安五年春三月。同時又作固安縣固城村謝家莊石橋記云。噫。舊立徒杠。尚有常  
節。故雨畢除道。水涸成梁。弗可闕已。過是未修。或修之不謹。則其爲害也非細焉。若官司失豫備。則民  
下得蚤圖。亦救弊之一端也。固安坤隅一舍內有謝家莊。爲近川流。恆苦湫下。每春澤未透。秋潦尚渟。  
則此河墉。大爲坎窔。使人病涉。馬還澗。雖魏汾沮洳。荆土塗泥。不是過也。並由習慣。止務因循。致茲險  
阻之深。無有坦夷之望。慢防且久。改作者誰。則我邑主優婆夷實其人也。邑主事張姓。閻氏。自爲女爲  
婦爲母以來。孝敬慈柔。鄉口藉甚。固不待言說。而後知其美也。及稱未亡。見諒之死。以家二女選培同  
居。感之悅之。俱同和順。故其興利。若一心焉。每自出財。或他與力。前後鑄辦洪鐘一口。起建佛殿三間。  
疊成□路十里。總其始終有立。雖勇毅英雄。蔑以加矣。惟茲遠慮。尙未速成。似有待而然也。以爲沛  
然莫之禦者。水爲大。確乎不可拔者。石爲堅。與其多易而致難。曷若暫勞而享逸。由是一之曰規斷岸。  
計橫流。二之曰就它山。下文礎。雲隨根至。天與骨來。相繼十霜。才及百兩。猶未畢其願也。會有涿州西  
七里小馬村。成濟聞之。惠然來助。自時緣感。特異往初。老幼相呼。遠近□。至上疊磈岸。旁壓需泥。有司  
下坂以走丸。並欲挾山而超海。望之玉立。地歛變於寶嚴。過□砥平。人咸疑其化出。自非悠久。顧得經

營。則何以發自至誠。形於吉夢。得人爲助。不日告成。若是之速邪。橋旣成。又求文於下走。欲其同會。各錄本名。如過見千佛之比。用齊坤厚。永不墜焉。鼎本生長中原。故其文具有唐代風格。

劉輝好學。善屬文。疏簡有遠略。壽隆二年。上書曰。宋歐陽修編五代史。附我朝於四夷。妄加貶訾。且宋人賴我朝寬大。許通和好。得盡兄弟之禮。今反令臣下妄意作史。恬不經意。臣請以趙氏初起事迹。詳附國史。上嘉其言。遷禮部郎中。詔以賢良對策。輝言多中時病。擢史館修撰卒。

馬得臣。南京人。好學博古。善屬文。累遷政事舍人。翰林學士。聖宗卽位。兼諫議大夫。知宣徽院事。時擊鞠無度。上書諫曰。臣竊觀房玄齡杜如晦隋季書生。向不遇太宗。安能爲一代名相。臣雖不才。陛下在東宮。幸列侍從。今又得侍聖讀。未有裨補聖明。陛下嘗問臣以貞觀開元之事。臣請略陳之。臣聞唐太宗侍太上皇宴。罷則挽輦至內殿。玄宗與兄弟歡飲。盡家人禮。陛下嗣祖考之祚。躬侍太后。可謂至孝。臣更望定省之餘。睦六親。加愛敬。則陛下親親之道。比隆二帝矣。臣又聞二帝耽玩經史。數引公卿講學。至於日昃。故當時天下翕然嚮風。以隆文治。今陛下游心典籍。分解章句。臣願研究經理。深造而篤行之。二帝之治。不難致矣。臣又聞太宗射豕。唐儉諫之。玄宗臂鷹。韓休言之。二帝莫不樂從。今陛

下以毬馬爲樂。愚臣思之。有不宜者三。故不避斧鉞。言之竊以君臣同戲。不免分爭。君得臣愧。彼負此喜。一不宜。躍馬揮杖。縱橫馳騁。不顧上下之分。爭先取勝。失人臣禮。二不宜。輕萬乘之尊。圖一時之樂。萬一有銜勒之失。其如社稷太后何。三不宜。倘陛下不以臣言爲迂。少賜省覽。天下之福。羣臣之願也。書奏。帝嘉歎良久。未幾卒。贈太子太保。按此書雅健近漢人。故亟錄之。

蕭孝穆小字和爾沁。淳欽皇后弟。廉謹有禮。法官宰相樞密使。封燕秦吳楚齊國王。雖椒房親位。高益畏所薦拔。皆忠直士。時稱爲國寶臣。目所著文曰寶老集。今不傳。

李宣仲官知冀州軍事判官。文林郎。試祕書省校書郎。盤山志載其盤山祐唐寺創建講堂碑銘云。峭壯靈峯。創興華宇。式開講肆。用陳法侶。物置人多。利圓三寶。庶幾乎作善之祥。傳名曠古。又固安縣志載涿州鄉貢進士張希顏重修法華寺募緣碣。有云。時遷歲暮。廢殘蠕蝋之梁。雨壞風摧。打碎鴉鷺之瓦。又云。若抽鵝眼之資。必值龍華之會。初唐四傑之遺響也。

韓昉字公美。燕京人。仕遼累世通顯。天慶二年中進士第一。補右拾遺。後仕於金。在禮部七年。凡朝廷典章制度。或因或革。皆經其擘畫。官至開府儀同三司。昉雖貴。書未嘗去手。善屬文。最長於詔冊。

作太祖睿德神功碑。當世稱之。

僧行均字廣濟。俗姓于氏。著龍龕手鑑四卷。沙門智光字法炬者爲作序云。夫聲明著論。乃印度之宏綱。觀述成書。實支那之令躅。印度則始標天語。厥號梵文。載彼貫線之花。綴以多羅之葉。開之以字緣。字界分之以男聲女聲。支那則創自軒轅。制於沮誦。代結繩於旣往。成進牘以相沿。辨之以會意象形。審之以指事轉注。洎乎史籀變古文爲大篆。程邈變小篆爲隸書。蔡邕刊定於石經。東哲網羅於竹簡。九流競鶩。若百谷之朝宗。七略遐分。比衆星之拱極。尋源討本。備載於坤蒼廣蒼。協律諸聲。咸究於韻英韻譜。專門則字統說文。開牖則方言國語。字學於是昭矣。矧復釋氏之教。演於印度。澤布支那。轉梵及唐。雖匪差於性相。披教悟理。而必正於名言。名言不正。則性相之義差。性相之義差。則修斷之路阻矣。故祇園高士探學海洪源。準的先儒。導引後進。輝以寶燭。啓以隨函。郭逢但顯於人名。香嚴惟標於寺號。流傳歲久。鈔寫時訛。寡聞則莫曉是非。博古則徒懷惋歎。不逢敏達。孰爲編修。有行均上人字廣濟。俗姓于氏。派演青齊。雲飛燕晉。善於音韻。閑於字書。觀香嚴之不精。寓金河而載緝。九仞功績。五變炎涼。具辨宮商。細分喉齒。計二萬六千四百三十餘字。注一十六萬三千一百七十餘字。并注總

一十八萬九千六百一十餘字。無勞避席。坐奉師資。詎假擔簦。立祛疑滯。沙門智光利非切玉。分忝斷金辱。彼告成。兼命序引。推讓而寧容閣筆。俯仰而強爲抽毫。矧以新音。偏於龍龕。猶手持於鸞鏡。形容斯鑒。妍醜是分。故目之曰龍龕手鑑。總四卷。以平上去入爲次。隨部復用列之。又撰五音圖式附於後。庶力半功倍。垂益於無窮者矣。行均之書。既有功於小學。而智光此序。亦復詳贍雅飭。無慚作者。方外多才。正未可輕視也。

## (二) 詩家

唐宋元明詩俱有總集。卽金與遼同起朔方。而金有元遺山之中州集。一代詩人。燦然可觀。遼之聖興道三宗。雅好詞翰。咸通音律。有國樂。雅樂。大樂。散樂。饒歌。橫吹樂。侍從諸臣。多淹通風雅。特以無人爲之綴緝。以致後世無傳。海寧周春輯遼詩話二卷。極盡搜羅之能事。惟蕪雜亦所不免。今擇而取之一。時朝野彬彬之風。猶可想見焉。

聖宗諱隆緒。小字文殊努。景宗長子。幼喜書翰。十歲能詩。旣長。精射法。曉音律。好繪畫。契丹國志云。聖宗好讀唐貞觀事要。至太宗明皇實錄。則欽服。又親以契丹字譯白居易集。召番臣等讀之。又喜

吟詩。御製曲百餘首。宋仁宗時有使遼者。見其傳國璽詩云。一時製美寶。千載助興王。中原既失鹿。此寶歸北方。子孫宜慎守。世業當永昌。又有樂天詩集是吾師之句。

興宗諱宗真。小字濟古爾。聖宗長子。幼而聰明。長而魁偉。好儒術。通音律。重熙五年四月。幸后弟蕭無曲第。曲水泛觴賦詩。九月獵黃花山。獲熊三十六。十月幸南京。御元和殿。以日射三十六熊賦。幸燕詩試進士於廷。帝幸禮部貢院及親試進士。皆張儉發之。進見不名。賜詩褒美。六年六月。賜南院大王耶律和覩袞命。上親爲製詩詞。並賜詩以寵之。七月。以皇太帝重元生子。賜詩及寶玩器物。二十四年二月。召宋使釣魚賦詩。北樞密使蕭惠請老。封魏國王。遇生日。輒賜詩。以示尊寵。

道宗諱洪基。字納琳。小字察喇。興宗長子。清寧二年二月。以興宗在時生辰宴羣臣。命作賦詩。三月。御製放鷹賦。賜羣臣。諭任臣之意。三年八月。帝以君臣同志華夷同風詩進皇太后。六年五月。監修國史耶律白。請編次御製詩賦。仍命白爲序。陸游老學庵筆記載大安元年。嘗賜詩褒北院樞密副使耶律幹特刺。相臣李儼。嘗作黃菊賦以獻。道宗作詩題其後。以賜之曰。昨日得卿黃菊賦。碎翦金英填作句。袖中猶覺有餘香。冷落西風吹不去。又釋明河補續高僧傳。載法均族里失詳。清寧中。被徵較定。

諸家章抄歸隱馬鞍山。咸雍間遼主渴思一見待以師禮寵以詩章有行高峯頂松千尺戒淨天心月一輪之句。

道宗宣懿皇后蕭氏。小字觀音。樞密使蕭惠之女。姿容冠絕。工詩善談論。自製歌詞。尤善琵琶。重熙中。道宗王燕趙。納爲妃。清寧初立爲懿德皇后。後爲姦臣耶律伊遜張孝傑等誣奏賜死。乾統初追謚宣懿皇后。遼史拘於體例。載后事甚略。而王鼎焚椒錄則言之頗詳。云清寧二年八月上獵秋山。后率妃嬪從行在所。至伏虎林。命后賦詩。后應聲曰。威風萬里壓南邦。東去能翻鴨綠江。靈怪大千俱破膽。那教猛虎不投降。上大喜。出示羣臣曰。皇后可謂女中才子。三年和上作君臣同志華夷同風詩。后應制屬和曰。虞廷開盛軌。王會合奇琛。到處承天意。皆同捧日心。文章通各蠶。聲教薄雞林。大宇看交泰。應知無古今。土尤長弓馬。常馳入深林邃谷。后上疏諫。上頗厭遠。咸雍之末。希得幸御。后因作詞曰。回心院。被之管絃。以寓望幸之意。其詞曰。掃深殿。閉久金鋪暗。游絲絡網塵作堆。積歲青苔厚。階面掃深殿。待君宴拂象牀。憑夢借高唐。敲壞半邊知妾臥。恰當天處少輝光。拂象牀。待君王。換香枕。一半無雲錦。爲是秋來展轉多。更有雙雙淚痕滲。換香枕。待君寢。鋪翠被。羞殺鴛鴦對。猶憶當時叫合歡。而今

獨覆相思塊。鋪翠被。待君睡。裝繡帳。金鉤未敢上。解卻四角夜光珠。不教照見愁模樣。裝繡帳。待君眠。疊錦茵。重重空自陳。只願身當白玉體。不願伊當薄命人。疊錦茵。待君臨。展瑤席。花笑三韓碧。笑妾新鋪玉一牀。從來婦歡不終夕。展瑤席。待君息。剔銀燈。須知一樣明。偏是君來生彩暈。對妾故作青熒熒。剔銀燈。待君行。爇薰爐。能將孤悶蘇。若道妾身多穢賤。自沾御香香徹膚。爇薰爐。待君娛。張鳴箏。恰恰語嬌鶯。一從彈作房中曲。常和窗前風雨聲。張鳴箏。待君聽。時諸伶無能奏演此曲者。獨伶官趙惟一能之。耶律伊遜因誣后與惟一通。欲乘此害后。更命他人作十香淫詞。陰使宮婢單登乞后手書。給后曰。此宋國忒里塞所作。更得御書。便稱二絕。后讀而喜之。旣爲手書一紙。紙尾復書己所作懷古詩一絕云。宮中只數趙家妝。敗雨殘雲誤漢王。惟有知情一片月。曾窺飛燕入昭陽。伊遜得書。遂構詞命登等陳首。以十香詞爲證。上大怒。命張孝傑與伊遜窮治其獄。獄旣具。上猶未決。指懷古一詩曰。此是皇后罵飛燕也。如何便作十詞。孝傑進曰。此正皇后懷惟一耳。上問曰。何以知之。孝傑曰。宮中只數趙家妝。惟有知情一片月。包趙惟一三字也。上意遂決。勅后自盡。后乞更面可汗一言而死。不許。乃望帝所而拜。作絕命詞。遂閉宮自經。年三十有六。聞者莫不冤之。清徐釚詞苑叢談云。蕭后回心院詞。怨而不

怒。深得詞家含蓄之意。斯時柳七之調。尙未行於北國。故蕭詞大有唐人遺意也。

按十香詞世所贊稱。然實爲伊遜命他人所作。今附錄如左。青絲七尺長。挽作內家裝。不知眠枕上。倍覺綠雲香。紅綃一幅強。輕闌白玉光。試開胸探取。尤比頤酥香。芙蓉失新。蓮花落故裝。兩般總堪比。可似粉腮香。蝤蛴那足並。長須學鳳凰。昨宵歡臂上。應惹領邊香。和羹好滋味。送語出宮商。定知郎口內。含有煖甘香。非關兼酒氣。不是口脂芳。卻疑花解語。風送過來香。旣摘上林蕊。還親御苑桑。歸來便攜手。纖纖春筍香。鳳韁拋合縫。羅襪卸輕霜。誰將煖白玉。雕出軟鉤香。解帶色已戰。觸手心愈忙。那識羅裙內。消魂別有香。咳唾千花釀。肌膚百和裝。元非噉沈水。生得滿身香。

天祚文妃蕭氏。小字色色。國舅大父房之女。幼選入宮。聰慧閑雅。工文墨。善詩歌。天祚卽位。冊爲文妃。女直既強。日見侵迫。帝畋遊不恤。忠臣多被疏斥。妃作歌諷諫。其詞曰。勿嗟塞上兮暗紅塵。勿傷多難兮畏強隣。不如塞姦邪之路兮。選取賢臣。直須臥薪嘗膽兮。激壯士之捐身。可以朝清漠北兮。夕枕燕雲。又歌曰。丞相來朝兮劍佩鳴。千官側目兮寂無聲。養成外患兮嗟何及。禍盡忠臣兮罰不明。親

戚並居兮藩屏蔽。私門潛畜兮爪牙兵。可憐往代兮秦天子。猶向宮中兮望太平。天祚見而衡之。後爲元妃兄蕭奉先所誣。賜死。

東丹王名貝。小字托雲。太祖長子。幼聰明好學。神冊元年春立爲皇太子。時太祖問侍臣曰。受命之君常事天敬神。有大功德者。朕欲祀之。何先。皆以佛對。太祖曰。佛非中國教。貝曰。孔子大聖。萬世所尊。宜先。太祖大悅。卽建孔子廟。詔皇太子春秋釋奠。太祖破渤海大誣譏。改其國曰東丹。以貝爲人皇王。主之。仍賜天子冠服。建元甘露。太祖將還。貝作歌以獻。後讓位於太宗。太宗旣立。見疑。以東平爲南京。徙貝居之。置衛士陰俟。動靜貝旣歸國。命王繼遠撰建南京碑。起書樓於西宮。作樂田園詩。唐明宗聞之。使人跨海持書密招貝。貝謂左右曰。我以天下讓主上。今反見疑。不如適他國。以成吳太伯之名。立木海上刻詩曰。小山壓大山。大山全無力。羞見故鄉人。從此投外國。攜高美人載書浮海而去。至汴見明宗。賜姓東名慕華。復賜姓李名贊華。後明宗養子從珂弑其君自立。貝密報太宗曰。從珂弑君。盍討之。及太宗立石敬瑭爲晉王。加兵於洛。從珂欲自焚。召貝與俱。貝不從。遂害之。世宗卽位。謚讓國皇帝。初。市書至萬卷。藏於醫巫閭絕頂之望海堂。通陰陽。知音律。精醫藥。砭焫之術。工遼漢文章。嘗譯陰

符經。善畫本國人物。如射騎獵雪騎千鹿圖。皆入宋祕府。

平王隆先字團隱。東丹王子也。景宗卽位。始封平王。未幾兼政事令。留守東京。數薦賢能之士。爲人聰明。博學能詩。有閨苑集行於世。今不傳。

寧王長沒字和魯。董妃甄氏所生。世宗第三子也。敏給好學。通契丹漢字。能詩。保寧八年。奪爵貶烏古部。賦放鶴詩。徵還。統和九年。應太后命賦移芍藥詩。

耶律學古字伊實揚。穎悟好學。工譯韻及詩。乾亨元年。宋旣下河東。乘勝侵燕。學古受詔往援。以功遙授保靜軍節度使。會宋將潘美率兵分道來侵。學古擒其將領。自是與潘美各守邊約。無相侵軼。民獲安業。以功爲特哩袞。是祭彫羊祜之流亞也。

耶律資忠字烏延。小字札拉。博學工詞章。年四十未仕。聖宗知其賢。召補宿衛。數問以古今治亂。資忠對無隱。眷遇日隆。初。高麗內屬。取女直六部地以賜。至是貢獻不時。至。詔資忠往問。故高麗無歸地意。由是權貴數短於上。出爲上京副留守。四年。再使高麗。留弗遣。資忠每懷君親。輒有著述。號西亭集。帝與羣臣宴。時一記憶曰。資忠亦有此樂乎。後以爲林牙。知特哩袞事。終昭德軍節度使。天祚第二

子雅里。每取唐貞觀政要與資忠所作治國詩。令侍從讀之。其詩之足以感發人可知。惜西亭集今已不傳矣。

耶律韓留字索紐。有明識。篤行義。工爲詩。性不苟合。爲樞密使蕭嘉哩所沮。重熙四年。召爲北面林牙。詔進述懷詩。上嘉歎方將大用。遽卒。

耶律辰嘉努字綿辛。重熙中。補牌印郎君。會太后生辰。進詩獻馴鹿。太后嘉獎。賜珠三琲。雜綵二百段。清寧初。帝與燕國王射鹿俱中。王時年九歲。帝悅。辰嘉努應制進詩。帝喜。解衣以賜。官至節度使。年八十卒。

耶律古雲字糾堅。沖澹有禮法。工文章。官至南院大王。興宗命爲詩友。數問治要。多所匡建。奉詔與耶律庶成蕭罕嘉努編遼國上世事迹。及諸帝實錄。未成而卒。

耶律良字錫納。讀書醫巫閭山。學既博。將入南山肄業。友人止之曰。爾無僕御。馳驅千里。縱聞見過人。年亦垂暮。今若卽仕。已有餘地。良曰。窮通命也。非爾所知。不聽。留數年而歸。重熙中。修起居注。會獵秋山。良進秋遊賦。上嘉之。清寧中。上幸鴨子河。作捕魚賦。由是恩遇稍隆。遷知制誥。奏請編御製詩

文。目曰清寧集。上命良詩爲慶會集。親製其序。官至知中京留守事。追封遼西郡王。謚忠成。

耶律儼字若思。析津人。本姓李。儀觀秀整。經籍一覽成誦。好學有詩名。登咸雍進士第。歷官至知樞密院事。封越國公。修皇朝實錄七十卷。乾統六年。封漆水郡王。薨謚忠懿。

耶律純於政和二年使高麗。傳其國禪師星命之學。著星命祕訣四卷。自序云。源髓老人得之於元齋。元齋得之於海上異人。有高麗國師賦。其步天警句有云。得富非難得壽難。壽星須把令星看。令星若是逢生旺。壽算巍巍等泰山。且說夫星是尅星。高強必是聘賢人。若居父母并兄弟。端的因親上致親。亦詩之流也。

王鼎仕履見前。時馬唐俊有文名。燕薊間適上已。與同志祓禊水濱。酌酒賦詩。鼎偶造席。唐俊見鼎樸野。置下坐。欲以詩困之。先出所作索賦。鼎援筆立成。唐俊驚其敏妙。因與定交。流鎮州居數歲。有赦。鼎獨不免。會守臣召鼎爲賀表。因以詩貽使者。有誰知天雨露。獨不到孤寒之句。上聞而憐之。卽召還復其職。

蕭勞古國舅少父房之族。以善屬文。爲聖宗詩友。

蕭柳字圖們。淳欽皇后弟。多智能文。膂力絕人。嘗伐宋爲先鋒。柳好滑稽。雖君臣燕飲。談諧無所忌。時人比之俳優。耶律觀音。努集柳所著詩千篇。目曰歲寒集。今已佚。

劉經（一作京）爲政事舍人。奉使至宋。路中有野韭可食。味絕佳。作詩云。野韭長猶嫩。沙泉淺更清。有集四十卷。今佚。

張儉宛平人。統和十四年舉進士第一。官至左丞相。太師中書令。封韓陳南國王。開泰五年秋大獵。虎將犯蹕。陳昭衰捉虎兩耳騎之。拔佩刀殺之上。命儉及呂德懋賦詩以美之。

杜防涿州歸義人。擢進士甲科。官至右丞相。加尚父。重熙二十一年秋。祭仁德皇后。詔詞臣賦詩。防爲魁。賜金帶。

楊佶字正叔。南京人。幼穎悟異常。讀書自能成句。弱冠聲名藉甚。統和二十四年舉進士第一。累遷翰林學士。文章號得體。宋遣梅詢賀千齡節。詔佶迎送。多唱酬。詢每見稱賞。後居相位。致仕卒。有登瀛集五卷行於世。今佚。

蕭鐸盧幹字撒板。幼警悟異常。及長。好學善屬文。有才幹。年三十始仕。爲朝野推重。伊遜誣以

罪謫戍西北部。在戍十餘年。始得還鄉里。屏居謝人事。一日臨流聞雉鳴。三復孔子時哉語。作古詩三章見志。當時名士稱其高情雅韻。不減古人。卒贈節度使。

劉三嘏河間人。慎行子也。第進士。尙主爲駙馬都尉。嘗獻一矢斃雙鹿賦。聖宗嘉其贍麗。與公主不諧。奔宋歸。殺之。劉彊儒林公議云。三嘏攜嬖妾。挈一子。投宋廣信軍。情詞悲切。自言主凶狠。必欲殺其妾與子。故歸。朝廷頗詢其國中機事。復爲詩自陳云。雖慚淳勾赴滄溟。仰訴丹衷不爲名。寅分星辰將降割。兌方疆寓卽交兵。春秋大義惟觀釁。王者雄師但有征。救得燕民歸舊主。免於通問自稱兄。遼屢移文求索。宋恐開邊釁。乃遣人拘送還遼。詩人之不幸如是。

馬堯俊。據文昌雜錄云。元豐三年十二月一日。高麗正徽生辰。遼遣起居郎知制誥馬堯俊充使。留仙賓館。俊獻徵詩云。始從鉤裂海東天。世世英雄稟自然。掌上寶符鈐造化。胸中神劍畫山川。太宗莫取龍州道。煬帝難乘鴨綠船。真是金輪長理國。豈論八萬四千年。徵以錦紬八百匹爲謝云。

馬希白。咸雍六年九月。上幸糲絲淀。以希白詩才敏妙。十吏書不能給。召試之。

孟初官中書舍人。東國史略載其軼事云。高麗肅宗明孝王七年。遼遣初來賀生辰。兵部員外郎

金緣爲館伴。初見其年少。頗易之。一日並轡出郊。雷始震。初唱云。馬蹄踏雪乾雷動。緣卽對曰。旗尾翻風烈火飛。初愕然曰。眞天才也。由是情好日篤。相唱和。及別解金帶贈之。

左企弓字君財。薊人。讀書通左氏春秋。天祐時宰相。降金人旣定燕。欲從宋割地。初約契丹。故大臣皆言南朝自來畏怯。又見劉廷慶敗走。企弓因獻詩曰。君王莫聽涓燕議。一寸山河一寸金。金主初不聽。卒畀宋。然陰有敗盟之意矣。

馬賢良不詳其顛末。封氏編年云。宣和四年十月。郭藥師等以常勝軍入燕城。馬賢良者獻詩云。聞說將軍曉入燕。滿城和氣接堯天。油然鬱鬱三千士。雨洗兵戈二百年。

王樞字子愼。良鄉人。遼日登科。後仕金爲直史館。嘗有三河道中詩云。十載歸來對故山。山光依舊白雲間。不須更讀元通偈。始信人間是夢間。

虞仲文字質夫。武州寧縣人。仕爲遼相。歸金授樞密使平章政事。四歲作詩賦煎餅。有魚目蟬聲之句。又賦雪花詩云。瓊英與玉蕊。片片落前池。問著花來處。東君也不知。人以神童目之。

張通古字樂之。易州易縣人。讀書過目不忘。該綜經史。善屬文。天慶二年進士第。後仕金至平章

政事。正隆初。以司徒致仕卒。其靈壁寺詩云。萬壑千巖裏。林間一徑深。數年勞想望。此日快登臨。勝境情難盡。危塗力不任。樓臺相映抱。松柏自蕭森。花散諸天雨。燈傳古佛心。鶴泉寒漱玉。園地舊鋪金。石磴崎嶇上。桃谿窈窕尋。淵明能止酒。叔夜况撫琴。所恨無長暇。徒勤惜寸陰。清宵誰我伴。乘興待孤樹。

## 二 金

金與遼同種。所居在白山黑水之間。卽古肅慎氏之故壤也。其俗無書契。無約束。自函普來自高麗。居完顏部。僕幹水之涯。是爲完顏氏之始祖。其後浸昌浸熾。三傳而至獻祖綏可。始教民築室樹藝。四傳而至昭宗不魯。乃欲以條教爲治。幾爲部衆所殺。可見榛狉之俗。施以整齊畫一之道。已苦扞格。矧施以文教之治乎。故歷景祖世祖肅宗穆宗太祖太宗六世。皆以武力翦滅諸部。亡遼降宋。奄有中夏之半。洎乎武元開國。得遼舊人用之。使介往復。其言已文。文烈繼統。乃行選舉之法。迨伐宋取汴。經籍圖書。宋士多歸之。文教由是興焉。熙宗在位。詔以經義詞賦取士。款謁先聖。北面如弟子禮。其傾心文學。何異漢武之表章儒術。世宗章宗之世。儒風不變。庠序日興。由科第而位至宰輔者接踵。當時儒者雖無專門名家之學。然而朝廷典策。鄰國書命。粲然可觀矣。宣宗南渡而後。趙秉文楊雲翼諸公迭主文盟。文風蒸蒸日上。迨哀宗北遷。元好問以昌明博大之才。鬱然爲一代宗匠。執文壇牛耳者垂三十年。嗚呼。盛矣。夫金源用武得國。而一代制作。能自樹立於唐宋之後。有非遼之所可及。此其故蓋在。

得國之後。以文而不以武也。傳曰。言之無文。行之不遠。文之有裨於國家。不綦重哉。

自來論金代文學者。約有數說。以爲大定中君臣上下以淳德相尚。士大夫之學。少華而多實。明昌以後。朝野無事。侈靡成風。士大夫之學。多華而實少者。楊奂之說也。以爲大定以還。文治既治。教育亦至。一掃五代遼季衰陋之俗者。元好問之說也。以爲南渡後文風一變。多學奇古者。劉祁之說也。以蔡正甫爲斯文正傳之宗。黨竹溪次之。閒聞公又次之者。蕭貢之說也。以爲金百年來得文派之正。而主盟一時者。皇統宇文公。大定明昌無可。蔡公承旨。黨公貞祐。正大禮部趙公。北渡後則遺山先生者。徐世隆之說也。之數說者。類能提綱挈領。洞見本源。薈萃而論列之。亦是非得失之林也。余以爲金自撫有中土以來。投戈息馬。稽古右文。績學之士。後先相望。士大夫之潤色鴻猷者。多產於幽并燕趙齊魯之間。得其山川雄深渾厚之氣。習其北方整齊嚴肅之俗。發爲文章。每能華實並茂。風骨遒上。絕勝江南之柔弱。試一讀其遺文。當不以予言爲河漢也。

夷狄金有中夏。代歷十紀。享國百二十年。其間文人學士。何慮數百。清錢大昕作金史藝文志。羅列專集。自完顏璿以下。計有七十餘家。唯是存於今者。祇王寂拙軒集。趙秉文澇水集。王若虛滹南集。

李俊民莊靖集元好問遺山集蔡松年明秀集段成己克己二妙集而已。其中拙軒一集原本久佚。清修四庫書始從永樂大典中輯出。史稱鄭子聃有能賦聲。海陵使其與翰林修撰等同進士難試。子聃果第一。而子聃之賦今不得其一篇。吁可慨已。元修金史。其纂修者爲歐陽玄揭傒斯李好文等皆一代知名之士。而衛紹王紀至不能舉其事實。又所錄文字祇有梁襄諫北幸一書。其餘湮沒不傳者不知凡幾。推其所由。則以金與元仇。元既滅金。并其文獻而痛惡之。一任其散佚而蕩盡。明則種族不同。又年遠代湮。無怪其如秦越人之不關痛癢。故終明之世。未有裒集金源一代之文者。所幸元好問之中州集中州樂府尙流播人間。堪爲信史。而清人秀水莊仲方之金文雅。昭文張金吾之金文最。網羅放失。不遺餘力。俾完顏文物絕而復存。其功爲不可沒矣。茲將其一代文學從事采擇。於上列之書。剝膚存液。以求至當。若夫遺文佚事。則劉祁歸潛志。王惲玉堂嘉話。間亦節取。俾得見當日之風尚也。

### (一) 文家

金初未興文學之先。詔令奏議。借才異國。文辭卽斐然可觀。其後振興文教。濟濟名士。雲蒸霞蔚。類皆北方之彥。考其著述。往往原本六經。多見道之語。其從事古文者。或宗昌黎。或學廬陵。清剛雋上。

一洗南朝靡靡之習。平心而論。實足繼北宋之正宗。開有元之先路云。

完顏勗字勉道。本名烏野。穆宗第五子。好學問。國人呼爲秀才。宗翰宗望定汴州。受宋帝降。太宗使勗就軍中往勞之。宗翰等問其所欲。曰。惟好書耳。載數車而歸。天會六年。詔求訪祖宗遺事。以備國史。命勗與耶律迪越掌之。勗等採摭遺言舊事。自始祖以下十帝。綜爲三卷。事無隱諱。詳略得宜。皇統中。又成太祖實錄二十卷。金之有實錄。自勗始也。又撰定女直郡望姓氏譜。及他文甚衆。大定中。詔以詩文鏤板。今已不傳。

完顏希尹本名谷神。歡都之子也。自太祖舉兵。常在行陣。或從太祖。或從撒改。或從諸將征伐。比有功。金初無文字。國勢日強。與鄰國交好。乃用契丹字。太祖命希尹撰本國字備制度。希尹乃依倣漢人楷字。因契丹字制度。合本國語。製女直字。天輔三年。字書成。太祖大悅。命頒行之。其後熙宗亦製女直字。與希尹所製字俱行用。希尹所撰謂之女直大字。熙宗所撰謂之小字。

完顏璣字子瑜。世宗之孫。越王之長子。封密國公。金百年以來。宗室中第一流人也。文筆委曲。能道所欲言。朝臣自閒閒公楊禮部雷御史而下。皆推重之。資雅重。淡於世味。窮日力於書讀通鑑。至三

十餘過是非成敗道之如目前。越王墓後稍得出游文士輩亦時至其門家所藏法書名畫幾與中祕等所居有樗軒故自號樗軒老人卒年六十有一。

蔡松年字伯堅以行臺尚書省令史出身官至尚書右丞相鎮陽別業有蕭閒堂自號蕭閒老人薨謚文簡松年事繼母以孝聞喜周恤親黨文筆雅潔有集行於世今佚。

蔡珪字正甫右丞相松年之子天德三年進士擢第後不赴選調求未見書讀之其辨博爲天下第一除澄州軍事判官三河簿正隆三年銅禁行官得三代以來鼎鐘彝器無慮千數禮部官以珪博物且識古今奇字辟爲編類官後改太常丞朝廷稽古禮文之事取其議論爲多初兩燕王墓舊在中都東城外海陵廣京城圍墓在東城內前嘗有盜發其墓大定九年詔改葬於城外俗傳六國時燕王及太子丹之葬及啓墳其東墓之柩題其端曰燕靈王舊舊古柩字通用乃西漢高祖子劉建葬也其西墓蓋燕康王劉嘉之葬也珪作兩燕王墓辨據葬制名物款刻甚詳十九年出守瀘州道卒有續歐陽文忠公集古錄金石遺文六十卷古器類編三十卷補南北史志書六十卷水經補亡四十篇晉陽志十二卷金石遺文跋尾二十卷燕王墓辨一卷文集五十五卷今皆佚元好問曰國初文學如宇文

大學蔡丞相吳深之等。不可不謂之豪傑之士。然皆宋儒。難以國朝文派論之。故斷自正甫爲正傳之宗。黨竹溪次之。禮部閒閒公又次之。自蕭戶部真卿倡此論。天下迄今無異議云。

馬定國字子卿。宋荊平人。阜昌初。游歷下亭。以詩撼劉豫。豫薦諸金官至翰林學士。石鼓自唐以來無定論。子卿以字畫考之。云是宇文周時所造。作辨餘萬言。出入傳記。引據甚明。學者以比蔡正甫燕王墓辨。自號薈堂先生。有集傳於世。今佚。

施宜生字明望。浦城人。宣和末。爲潁州教官。仕於齊。不得志。又仕於金。官至翰林學士。正隆中。奉使於宋。坐漏洩國情。烹死。初在潁州日。從趙德麟游。頗得蘇門沾丐。其在金。與蔡松年爲文字交。自號三住老人。有集行於世。今佚。

梁襄字公贊。絳州人。性穎悟。日記千餘言。登大定三年進士第。由耀州同官主簿累遷至保大軍節度使。爲薛王府掾。時世宗將幸金蓮川。有司具辨。襄上疏極諫。洋洋千七百餘言。文載金史本傳。世宗納之。遂爲罷行。襄由是以直聲聞。史臣贊之曰。大定間人材輩出。文義蔚然。加以世宗之聽納。人各盡其所能。論議書疏。有可傳者。惜史無全文。僅存梁襄諫北幸一書。辭雖過繁。而意亦切至。故備載之。

以見當時君明臣直。不以言爲忌。金之政治。於斯爲盛。嗚呼盛哉。史又言襄長於春秋左氏傳。至於地理氏族。無不該博。又元好問中州集載襄賀章宗卽大位表云。曾天子。祖天子。世嫡相承。舜何人。予何人。自強不息。又自河南府倅移華州防禦使。謝上表云。昔同雄升。已陪嵩岳之呼。今領華防。願效封人之祝。是其駢儼文亦復可誦。正不徒以直言極諫見長也。

周馳字仲才。濟南人。經學出於醇德先生王廣道。賦學出於泰山李時亨。至於黨趙。又其忘年交也。資性古雅。而以襟量見稱。大定中住太學。屢以策論魁天下。私試亦頻中監元。遼東吳子英嘗從仲才學。能記其所著亞父撞玉斗賦。及他文數篇。

王庭筠字子端。熊岳人。生未期。視書識十七字。七歲學詩。十一歲賦全題。稍長。涿郡王翛一見期以國士。登大定十六年進士。官至翰林修撰。子端詩文有師法。高出時輩之右。字畫學米元章。其得意處頗能似之。墨竹殆天機所到。文湖州已下不論也。平生愛天平黃華山水。居相下十年。自號黃華山主。著有叢辨十卷。文集四十卷。今俱佚。其歿也。章宗悼之曰。玉堂東觀中。無復斯人矣。又李純甫屏山故人外傳云。子端世家子。風流醞藉。冠冕一時。爲人眉目如畫。美談笑。俯仰可觀。外視若簡貴。人初不

敢與接。一見之後。和氣津津。溢於衡宇間。又其折節下士。如恐不及。苟有可取。極口稱道之。故人人恨相見之晚也。

周昂字德卿。真定人。年二十四擢第。釋褐南和簿。歷任監察御史。龍州都軍。權行六部員外郎。其甥王若虛嘗學於昂。昂教之曰。文章工於外而拙於內者。可以驚四筵。而不可以適獨坐。可以取口稱。而不可以得首肯。又云。文章以意爲主。以言語爲役。主強而役弱。則無令不從。今人往往驕其所役。至跋扈難制。甚者反役其主。雖極辭語之工。而豈文之正哉。昂孝友喜名節。學術醇正。文筆高雅。諸儒皆師尊之。晚從宗室承裕軍。承裕失利。跳走上谷。衆欲逕歸。昂獨不從。城陷。與從子嗣明同殉國難。

王競字無競。安陽人。警敏好學。宋末登科。入金任縣令。皇統初。參政韓昉薦之。召權應奉翰林文字。詔作金源郡王完顏婁室墓碑。競以行狀盡其實。乃請國史刊正之。時人以爲法。二年試館閣。競文居最。遂卽真。累遷至禮部尚書兼翰林學士承旨。修國史。競博學而能文。善草隸書。工大字。字或廣長丈餘。而結密如小楷。京都宮殿題榜皆其筆。趙秉文以爲古今第一手。唯黨篆差可配耳。元好問遺山文集有王無競題名記。亦極推服之。

郭長倩字曼卿。文登人。登皇統內賓經義乙科。仕至祕書少監。兼禮部郎中。修起居注。與施明望王無競劉嵒老劉無黨相友善。所撰石決明傳爲時輩所稱。著有崑崙集。已佚。今所存祇大定十二年所撰文登縣學碑。其文極華貴。而饒有經術氣。

蕭永祺字景純。本名蒲烈。少好學。通契丹大小字。廣寧尹耶律固奉詔譯書。辟置門下。因盡傳其業。固卒。作遼史未就。永祺繼之作記三十卷。志五卷。傳四十卷。上之。除太常丞。累官至翰林學士承旨。同修國史。海陵爲中京留守。永祺特見親禮。海陵嗣位後。尚書左丞耶律安禮出守南京。海陵欲以永祺代之。永祺固辭。旣出。或問曰。公遇知人主。進取爵位。以道佐時。何多讓也。永祺曰。執政繫天下休戚。縱欲貪冒榮寵。如蒼生何。海陵嘗選廷臣十人備咨訪。獨永祺議論寬厚。時稱長者。是其爲人。不徒以文字見長云。

曹望之字景肅。其先臨潢人。遼季移家宣德。天會間。以秀民子選充女直字學生。除西京教授。世宗朝。官至戶部尚書。嘗與紇石烈良弼張景仁劉仲淵同修太宗直錄。望之旣貴。益刻苦讀書。爲人之所難能。有集行世。今已佚。

胡礪字元化。磁州武安人。少嗜學。天會間。金兵下河北。爲軍士所掠。行至燕。韓昉見而異之。使賦詩以見志。礪操筆立成。思致清婉。因館置門下。使與其子處同教育之。自是學業日進。昉嘗謂人曰。胡生才器。一日千里也。他日必將名世。十年舉進士第一。授右拾遺。權翰林修撰。久之。改定州觀察判官。定之學校爲河朔冠。士子聚居者。常以百數。礪督教不倦。經指授者。悉爲場屋上游。稱其程文。謂之元化格。後官至刑部尚書卒。所著文久佚。其正隆三年所作磁州武安縣鼓山常樂寺重修三世佛殿碑記。尚存。

李晏字致美。高平人。皇統二年。經義進士。釋褐臨汾丞。時張太師浩判平陽。一見愛其才。爲之延譽。後入翰林爲御史。高文大冊。號稱獨步。拜御史中丞。明昌初。爲禮部尚書。分諸道府試。復經義。設童科。皆自晏發之。晏之文今存者。有保德州重修城壁創開西門碑一篇。

楊伯仁初名伯英。避太子光英諱。改今名。字安道。真定藁城人。天性孝友。讀書一過成誦。登皇統九年進士第。天德二年。除應奉翰林文字。海陵嘗夜召賦詩甚亟。未二鼓。奏十詠。海陵喜。解衣賜之。海陵射鳥。伯仁獻獲鳥詩以諷。後改左拾遺。進士呂忠翰廷試。已在第一。未唱名。海陵以忠翰程文示伯

仁。問其優劣。伯仁對曰。當在優等。海陵曰。此今試狀元也。伯仁自以知忠翰姓名在第一。遂宿諫垣。俟唱名乃出。海陵嘉其慎密。轉翰林修撰。孟宗獻發解第一。伯仁讀其程文。稱之。此人當成大名。是歲宗獻府試廷試皆第一。號孟四元。時論以爲知文。伯仁久在翰林。文詞典雅。世宗嘗言本朝文臣之臣。自韓昉張鈞後。則有瞿永固。近日則張景仁鄭子聃。今則伯仁而已。其次未見能文者。其見重如此。官至太常卿。今山左金石志有大定二十二年伯仁承詔重修東嶽廟碑。文長不錄。

鄭子聃字景純。大定人。父宏。遼金源令。子聃及冠。有能賦聲。天德二年。丘行爲太子左衛率府率。廷試明日。海陵以子聃程文示丘行。對曰。可入甲乙。及折卷。果中第一甲第三人。調翼城丞。遷贊皇令。召爲書畫直長。子聃頗以才望自負。常慊不得爲第一人。正隆三年會試畢。海陵以第一人程文問子聃。子聃少之。海陵問作賦如何。對曰。甚易。因自矜。且謂他人莫已若也。海陵不悅。乃使子聃與翰林修撰纂帙楊伯仁。宣徽判官張汝霖。應奉翰林文字李希顏。同進士雜試。海陵御寶昌門臨軒觀試。以不貴異物。民乃足爲賦題。忠臣猶孝子爲詩題。憂國如飢渴爲論題。親覽試卷。中第者七十二人。子聃第一。海陵奇之。有頃。進官三階。除翰林修撰。趙獻之賀啓云。丹桂一枝。不失舊物。青錢萬選。無愧古人。

其爲名流所稱道如此。累官吏部侍郎。改侍講學士。兼修國史。世宗曰。修海陵實錄。知其詳無如子聃者。蓋以史事專責之也。平生所著詩文有二千餘篇。今唯寶豐縣志載其所著汝州香山觀音禪院慈照禪師塔銘。惜文多脫落。

王寂字元老。薊州玉田人。登天德二年進士。歷官中都路轉運使。興陵朝。以文章政事顯。卒謚文肅。著有拙軒集。北遷錄諸書。今北遷錄已失傳。其拙軒集清修四庫書時。從永樂大典中輯出。釐爲六卷以行世。其文博大疏暢。在大定明昌間。卓然不愧爲作者。足與趙秉文澇水集。王若虛滹南遺老集相爲抗行。

路仲顯字伯達。冀州人家。世寒微。其母有賢行。教伯達讀書。金初賦學家有類書名節事者。新出價數十金。大家兒得之者。輒私藏之。母爲伯達買此書。撙衣節食。累年而後致。戒伯達言。此書當致學舍中。必使同業者皆得觀。少有斬固。吾卽焚之矣。伯達正隆五年進士。明昌初。授武安軍節度使。鄉人榮之。雲朔用兵。伯達奉使江左還。獻賜幣以佐軍。未報而伯達卒。章宗詔以所獻還其家。夫人傅氏曰。此非吾夫意。復上之。有司不聽。夫人付之州學。買上田二千畝有奇。以贍生徒。故相馬琪德。玉時。判州

事聞於朝。賜號成德夫人。嗚呼。賢母良妻萃於一家。是亦難能而可貴者矣。伯達善屬文。有名於時。著有成趣園記。

黨懷英字世傑。馮翊人。其在孕也。母夢道士吳筠來託宿。及生。儀觀秀整如神仙然。少穎悟。日授數千言。師亳社劉富老。濟南辛棄疾其同舍生也。嘗試東府解魁。嗣後困於名場。遂不以世務擾懷。放浪山水間。詩酒自娛。簞瓢屢空。晏如也。既久。鄉豪傑有知公。稍料理之。大定十年。擢進士甲科。調成陽軍判官。汝陰令。入爲史館編修。應奉翰林學士。出爲泰定軍節度使。爲政寬簡。不言而人化。召爲翰林學士承旨。泰和元年。詔修遼史。編修官三員。詔分紀志列傳。刊修官有改除者。以書自隨。久之致仕。大安三年九月。年七十八卒於家。謚曰文獻。趙秉文爲其墓誌云。公之文似歐公。不爲尖新奇險之語。詩似陶謝。奄有魏晉。篆籀入神。李陽冰之後。一人而已。在翰林日。皇叔允蹈伏誅。公作詔云。天下一家。詎可窺於神器。公族三宥。卒莫逭於常刑。非忘本根骨肉之情。蓋爲宗社安危之計。亦由涼德有失睦親。嘆笑窮。論者謂公之制誥。百年以來。亦當爲第一。

孟宗獻字友之。開封人。大定三年。鄉府省御四試皆第一。終金之世。號四元者。祇宗獻與趙樞子克也。孟仕宦不甚顯達。初供奉翰林。轉曹王府文學。兼記室參軍。經於同知單州軍州事。丁母憂。哀毀致卒。劉祁歸潛志云。孟之律賦。至今學者法之。然其源出於吾高祖南山翁。故老云。孟晚進。初不識翁。因少年下第。發憤闢一室。取翁賦翦其八韻類之。帖壁間。坐臥諷詠深思。已而盡得其法。下筆洞於微妙。再試遂得四元。迄今學者以吾祖爲孟師也。按南山翁名撝。金國初闢進士舉。詞賦狀元也。

耶律履字履道。東丹王之七世孫。學通易太玄。至於陰陽曆數。無不精究。嘗以鄉賦一試有司。以露索爲恥。遂不就舉。以蔭起家。官至右丞。卒謚文獻。世宗大定三年。特賜孟宗獻榜進士第。世宗嘗問宋名臣孰爲優。履道以蘇端明軾對。上曰。吾聞軾與王詵交甚款。至作歌曲戲及姬侍。非禮之甚。尙何足道耶。履道進曰。小說傳聞。未必可信。就使有之。戲笑之間。亦何足深責。世徒知軾之詩文。人不可及。臣觀其論天下事。實經濟之良才。求諸古人。陸贊而下。未見其比。陛下無信小說傳聞。而忽賢臣之言。明日錄軾奏議上之。詔國子刊行。自號忘言居士。有集已佚。

蕭貢字真卿。京兆咸陽人。大定二十二年進士。由涇州觀察判官。仕至御史中丞。以戶部尚書致

仕。卒謚文簡。真卿博學能文。人比之蔡正甫。官右司郎中時。預修泰和律令。所上條畫。皆委曲當上心。世宗嘉歎曰。漢有蕭相國。吾有蕭貢。刑獄吾不憂矣。其得君如此。真卿讀書至老不倦。注史記百卷。著五聲姓譜五卷。文集十卷。又著蕭氏公論數萬言。評古今成敗得失。甚有理。今俱佚。

趙秉文字周臣。晚自號閒道人。磁州滏陽人也。幼穎悟。讀書若素習。登大定二十五年進士。起家安塞令。累遷至禮部尚書。哀宗卽位。乞致仕。不許。改翰林學士。同修國史。兼益政院說書官。秉文自幼至老。未嘗一日廢書不觀。著有易叢說十卷。中庸說一卷。揚子發微一卷。太玄箋贊六卷。文中子類說一卷。南華略釋一卷。列子補注一卷。刪集論語孟子解各十卷。資暇錄十五卷。正大間。同楊雲翼作龜鑑萬年錄。又因進講與雲翼共集自古治術。號君臣政要爲一編。書成奏上之。今皆佚。其所著詩文。號滏水集。本三十卷。今存二十卷。秉文之文。出於義理之學。故長於辨析。極所欲言而止。不以繩墨自拘。爲人至誠樂易。與人交。不立崖岸。繼黨懷英掌一世文柄者。殆三十年。泰和大安以來。科舉之文。其弊益甚。蓋有司惟守格法。所取之文。卑陋陳腐。苟合程度而已。稍涉奇峭。即遭黜落。於是文風大壞。貞祐初。秉文爲省試。得李獻能賦。雖格律稍疏。而詞藻頗麗。擢爲第一。輿論譁然。以爲秉文大壞文格。然

積習爲之一祐。識者以爲歐陽公再生云。

史公奕字季宏。大名人。大定二十八年進士。再中博學宏詞科。程文極典雅。後無繼之者。累遷著作郎。翰林修撰。同知集賢院。正大中置益政院。與楊雲翼同官。相得益彰。公奕文章書翰。皆有前輩風調。下至棋槊之技。亦絕人遠甚。趙秉文稱其溫厚謙退。與人交。愈久而愈不厭。其學問愈扣而愈無窮。其見重如此。

楊雲翼字之美。樂平人。明昌五年經義進士第一人。詞賦亦中乙科。天資穎悟。博通經傳。至於天文律曆醫卜之學。無不臻極。事母孝。與人交。款曲周密。處事詳雅。而能以大節自任。南渡後二十年。與趙秉文迭掌文柄。時人號楊趙。而公以後輩自處。不敢當也。官至翰林學士。卒謚文獻。元好問曰。評者以爲百餘年來。士大夫身備四科者。惟公一人而已。著有周禮辨一篇。左氏莊列賦各一篇。五星聚井各一篇。縣象賦一篇。文集若干卷。大金禮儀若干卷。續通鑑若干卷。又有勾股機要象雜著等說。今俱佚。

韓玉字溫甫。漁陽人。少讀書。尚氣節。登明昌五年經義詞賦兩科進士。入翰林爲應奉。應制一日

百篇。文不加點。又作元勳傳稱旨。章宗歎曰。勳臣何幸得此家作傳耶。官至河平軍節度副使。大安三年。北兵圍燕都。夏人連陷邠涇。陝西邊帥檄玉爲都統。募軍得萬人。出屯華亭。與夏戰。敗之。又敗之於北原平源。遂得解圍。而玉以都城隔絕。毅然有勤王志。因移檄關中。言詞忠壯。聞者感動。其檄有云。事推其本。禍有所基。始自賊臣。貪容姦賂。繼緣二帥。貪銅威權。旣止夏臺之師。旋致會河之敗。又云。齊魏以高壘爲能堅。蒲絳以穿空爲得計。裹糧坐費。盡膏血於生民。棄甲復來。竭資儲於國計。要權力而望形勢。連歲月而守妻孥。又云。命令不至。京師奈何。盼盼四集之師。懸懸半歲之上。人誰無死。有臣子之當然。事至於今。忍君親之弗顧。勿謂百年身後。虛名一聽史臣。只如今日目前。何顏再居人世。王侯將相。寧有種乎。富貴功名。當自致耳。當路者忌其功。誣玉有異志。道出華州。被囚。死於郡學。

陳規字正叔。絳州稷山人。明昌五年進士。博學能文。爲人敦厚。動有禮節。貞祐間。爲監察御史。上宣宗便宜八事。一曰責大臣以身任安危。二曰任臺諫以廣耳目。三曰崇節儉以答天意。四曰選守令以結民心。五曰博謀羣臣。以定大計。六曰重官賞以勸有功。七曰選將帥以明軍法。八曰練士卒以振兵威。其規畫大計。本末兼賅。說者謂金自南渡後。諫官稱許古陳規。而規不以訐直自名。尤見重云。劉

祁歸潛志云。公爲人剛毅質實。有古人風。篤志學問。至老不廢。卒之日。家無一金。知友爲葬之。

劉中字正夫。漁陽人。屏山故人外傳云。正夫爲人短小精悍。滑稽玩世。中明昌五年詞賦經義第。賦得楚辭句法。尤長於古文。典雅雄放。有韓柳氣象。教授弟子王若虛高法颺張履。皆擢高第。學古文者翕然宗之。曰劉先生。以省掾從軍南下。改授應奉翰林文字。爲主帥所重。常預祕謀。書檄露布皆出其手。有文集藏於家。

李純甫字之純。一字屏山。弘州襄陰人。承安二年經義進士。仕至尚書右司都事。終京兆府判官。幼穎悟異常。初業詞賦。及讀左氏春秋。大愛之。遂更爲經義。爲文法莊周列禦寇左氏戰國策。後進多宗之。年少日。自負其材。謂功名可立致。作矮柏賦。以諸葛孔明王景略自期。由小官上萬言書。援宋事爲證。甚切當。宰執以爲迂闊。抑置之中。年度其道不行。益縱酒自放。無仕進意。得官未成考。旋即歸隱。日與禪僧士子游。以文酒爲事。人有酒見招。不擇貴賤。往往輒醉。雖沉醉亦不廢著書。晚年喜佛。力探其奧義。自類其文。凡論性理及闡佛老二家者。爲內藁。其餘應物文字。爲外藁。又解楞嚴金剛經老子莊子中庸集解。鳴道集解。號中國心學西方父教。數十萬言。以故爲名教所貶云。

韓道昭字伯暉。真定松水人。著有五音集韻十五卷。是書所收之字。以廣韻爲藍本。而增入之字。以集韻爲藍本。取三十六字母。各分四等。排比諸字之先後。以見母牙音爲首。終於求日字。注中所引之語。皆本於經訓。凡廣韻之訛舛者。一一釐訂之。可謂廣大悉備。始制有倫矣。與遼僧行均所著龍龕手鑑。同爲小學中必備之書也。

劉祖謙字光甫。安邑人。承安五年進士。正大初。爲翰林修撰。家多藏書。一時名士。如雷淵。李獻能。王湜。皆游其門。祖謙得人一詩可傳。必殷勤稱道。唯恐不聞。人以此稱之。

馮登字子駿。吉州人。承安二年進士。爲寧邊令。適趙秉文守此州。與之攷論文義。相得甚歡。故延登詩文皆有法度。天興初元。授禮部侍郎。京城陷。自投井中。延登資稟淳雅。讀書長於易左氏傳。好賢樂善。有橫溪翁集。今佚。

王時起字正之。代州崞縣人。智識精深。好學善論議。音樂技藝無所不能。長於辭賦。出入經史。摘其英華。以爲句讀。天造神出。至得意。不減郭蘓。與李之純爲忘年交。泰和三年進士甲科。累遷司竹監使。朝議欲以館職召試。會卒。

馮璧字叔獻。別字天粹。承安二年進士。歷州縣。召入翰林。再爲曹郎。宣宗朝。屢以使指鞠大獄。毛髮不貸。興定末。以同知集慶軍節度使事致仕。居崧山龍潭者十餘年。諸生從之游。與四方問遺者不絕。賦詩飲酒。放浪山水間。人望之以爲神仙焉。璧少日在太學。賦聲藉甚。其學長於春秋。字畫楚楚。有魏晉風味。雅爲趙秉文所激賞。制誥典雅。當代少有其比。尺牘又其專門之學。風流蘊藉。不減前世。李獻甫談笑此世爲不足玩。見璧則必爲之悚然。王若虛公於鹽裁爲海內稱首。敬其名德。至不敢以同年生數之。北渡還鄉里。年七十九終於家。

劉昂霄字景玄。別字季房。陵川人。元好問中州集云。泰和中。予識景玄於太原。人有言是家讀廣記半月能背誦者。予未之許也。戲取市人日曆。鱗雜米鹽者。令讀之一過。目無脫遺。大率景玄之學。無所不窺。六經百氏外。世譜官制。與兵家所以成敗者。爲最詳。好橫策危坐。掉頭吟諷。幅巾奮袖。談辭如雲。四座聳聽。噤不得語。故評者謂承平以來。王湯臣論人物。李之純玄談。號稱獨步。景玄則兼衆人之所獨。愈叩而愈無窮。不知去古談士爲遠近。餘子不論也。

王若虛字從之。自號傭夫。橐城人。承安二年經義進士。官至翰林直學士。幼穎悟。若夙昔在文字

間者。其舅爲周昂。韶齡時。卽知其爲偉器。教督周至。盡傳所學。及官四方。又託之名士劉中。得卒業焉。以故學無不通。不爲章句所困。頗譏宋儒經學以旁牽遠引爲夸。史學以探赜幽隱爲功。謂天下自有公是。言破卽足。何必呶呶若是。其論道之行與否云。戰國諸子之雜說。寓言漢儒之繁文末節。近世士大夫參之以禪機玄學。欲聖賢之實不隱。難矣。經解不善。張九成。史例不取宋子京。詩不愛黃魯直。著論評之。凡數百條。人以劉子玄史通比之。爲人強記默識。誦古詩至萬餘首。他文稱是。文以歐蘇爲正派。詩學白樂天。作雖不多。而頗能似之。秉史筆十五年。新進入館。日有紀錄之課。書吏以呈。宰相必問。王學士曾點竄否。又善持論。李純甫以辨博名天下。杯酒淋漓。談辭鋒起。若虛能以三數語窒之。雅負人倫之望。典貢舉二十年。門生半天下。而不立崖岸。雖小書生登其門。亦折行輩交之。朋會間春風和氣。周浹四座。使人愛之而不忘也。北渡後。居鄉里。癸卯三月卒。自其歿後。時人以爲經學史學文章人物。公論遂絕。不知承平百年之後。當復有斯人否也。所著慵夫集已佚。今存滹南遺老集四十五卷。元吳澄稱其博學卓識。見之所到。不苟同於衆云。

李俊民字用章。澤州晉城人。承安五年進士第一。官應奉翰林文字。未幾棄官教授。隱於嵩山。自

號鶴鳴老人。元世祖以安車召見。仍乞還山。卒謚莊靖先生。用章以遺老抗志遜荒於出處之際。能潔其身。入元後。祇書甲子。隱然以陶潛自居。所爲文沖澹和平。具有高致。亦復似其爲人。雖博大不及元好問。抑亦其亞也。著有莊靖集十卷傳於世。

李獻能字欽叔。河中人。苦學博覽。於文尤長於四六。貞祐三年。特賜詞賦進士廷試第一人。宏詞優等。授應奉翰林文字。在翰苑凡十年。正大末。以鎮南軍節度副使。充河中帥府經歷。河中陷。道梗不得歸。就權陝府行省左右司郎中。軍變殉節。獻能爲人眇小而墨色頗有髯。善談論。每敷說今古。聲鏗亮可聽。在翰苑。應機敏捷。號得體。趙秉文李純甫嘗曰。李獻能天生今世翰苑材。故每薦之。不令出館。家故饒財。盡於貞祐之亂。京師冷官。食貧口衆。無以自給。太夫人素豪侈。厚於自奉。小不如意。則訶譴隨之人。視之殆不堪其憂。獻能處之自若也。獻能文章行業。過人處甚多。而天下獨以其純孝爲不可及。嘗謂人曰。吾幼夢官至五品。壽不至五十。後竟如其言。

郝天挺字晉卿。陵川人。少有賦聲。早衰多疾。厭於名場。遂不復就舉。元好問嘗受業其門。天挺詔之曰。今人賦學。以速售爲功。六經百家。分碟緝綴。或篇章句讀不之知。幸而得之。不免爲庸人。又曰。讀

書不爲藝文。選官不爲利養。唯通人能之。又曰。今之仕多以貪敗。皆苦飢寒不能自持耳。丈夫不耐飢寒。一事不可爲。予以吾言求之。科舉在其中矣。或曰。以此學進士。無乃戾乎。天挺曰。正欲渠不爲舉子爾。貞祐兵亂。避於河南。往來淇衛間。爲人有崖岸。耿耿自信。寧落魄困窮。終不一至豪富之門。年五十七。終於舞陽。

元好問字裕之。號遺山。太原秀容人。七歲能詩。太原王湯臣稱爲神童。年十一。從其叔父官於冀州。學士路宣叔賞其俊爽。教之爲文。年十有四。其叔父爲陵川令。改從郝晉卿學。於是肆意經傳。貫串百家。六年而學成。下太行。渡大河。爲箕山琴臺等詩。禮部趙聞聞見之。以爲少陵以來。無此作也。以詩招之。於是名震京師。目爲元才子。登興定五年進士第。官至行尚書省左司員外郎。金亡不仕。爲文有繩尺。備衆體。兵後故老皆盡。好問蔚爲一代宗工。四方碑版銘志。盡趨其門。其所著詩文曰遺山集。實足涵蓋金源一代文學焉。晚年尤以著作自任。以金源氏有天下。典章法度。幾及漢唐。國亡史作。已所當任。時金國寶錄。在順天道萬戶張公府。乃言於張。願爲撰述。旣而爲樂夔所沮而止。好問曰。不可令一代之跡。泯而不傳。乃爲中州集百餘卷。凡金源君臣遺言往行。採摭所聞。有所得。輒以寸紙細字爲

記錄至百餘萬言。名曰壬辰雜編。元時纂修金史。多本其所著云。卒年六十八。好問著作甚富。杜詩學一卷。東坡詩雅三卷。錦機一卷。詩文自序十卷。壬辰雜編皆佚。其存者爲中州集中州樂府遺山詩文集新樂府及續夷堅志。

麻革字信之。臨晉人。與元好問劉祁交唱酬之作甚多。爲河汾諸詩老之一。金亡隱居教授以終。爲文長於寫景。有游龍山紀載歸潛志。

杜仁傑字仲梁。一字善夫。濟南長清人。正大中嘗偕麻革張澄隱內鄉山中。名聲與之相埒。元時屢徵不起。仲梁性善謹。才宏學博。氣銳而筆健。業專而心精。平生與李獻能冀禹錫最友善。其文今僅存泰山天門銘。見泰安縣志。

## (二) 詩家

金源詩人專集之傳於世者甚少。迄今尙能窺其淵源者。實賴元好問之中州集。及清代御定之全金詩。余嘗取二書而博觀之。知其一代詩人類皆從北宋歐蘇入手。以進窺乎三唐。其高者出入陶謝。以寫其自然之真趣。要與宋之西江四靈江湖各派。如涇渭之各別。其所以能如此者。蓋其所處皆

中原文獻之邦。趨向獨真。不爲浮靡之習所移。故其所作。沉鬱簡淡。奇崛巧綈。各能自成一家。以振其風氣。取而陳之。亦足見一代風騷之所尚也。

海陵庶人亮字元功。遼王宗幹第二子。喜讀書。有文才。爲藩王時。嘗書人扇云。大柄若在手。清風滿天下。又書壁述懷云。蛟龍潛匿隱蒼波。且與蝦蟆作混和。等待一朝頭角就。撼搖霹靂震山河。人知其有大志。卽位後。遣施宜生往宋爲賀正使。隱畫工於中。卽敕密寫臨安之湖山城郭以歸。繪爲軟壁。而圖已像策馬於吳山絕頂。後題以詩云。自古車書一混同。南人何事費車攻。提師百萬臨江上。立馬吳山第一峯。其意氣亦復不淺。

世宗雍本名烏祿。太祖孫。睿孫子也。卽位後。易海陵之暴。而施之以仁政。人以小堯舜稱之。其在位。對於女貞舊俗。未嘗須臾忘也。大定二十五年四月。幸上京。宴宗室於皇武殿。飲酒樂。上曰。吾來故鄉數月矣。今四期已近。未嘗有一人歌本曲者。汝曹來前。吾爲汝歌。歌曰。乃眷上都。興帝之第。屬茲來游。惻然予思。風物減耗。殆非昔時。於鄉於里。皆非初始。雖非初始。朕自樂此。雖非昔時。朕無異視。瞻戀慨想。祖宗舊宇。屬屬音形。宛然如睹。童嬉孺慕。歷歷其處。壯歲縱行。恍然如故。舊年從游。依稀如昨。歌

中皆道祖宗創業艱難。及所以繼述之意。殊有周公無逸豳風七月之思。稱爲一代令主。非虛語也。  
顯宗名允恭。世宗第二子。立爲皇太子。在儲位二十餘年。有賜右相石琚生日詩曰。黃閣今姚宋。  
青宮舊綺園。繡絲歸里社。冠蓋畫都門。善訓懷師席。深仁寄壽尊。所期河潤溥。餘福被元元。尊賢下士  
之意。可想見也。其殂也。賜謚宣孝太子。章宗卽位。贈皇帝之號。廟號顯宗。

章宗名璟。顯宗嫡子。大定中立爲皇太孫。世宗崩。卽皇帝位。天資聰悟。詩詞多有可稱。賦雲龍川  
泰和殿五月牡丹云。洛陽穀雨紅千葉。嶺外朱明玉一枝。地力發生雖有異。天公造物本無私。宮中絕  
句云。五雲金碧拱朝霞。樓閣崢嶸帝子家。三十六宮簾盡捲。東風無處不揚花。真帝王詩也。又有送張  
建致仕歸。弔王庭筠下世詩。具載飛龍記中。今佚。

豫王允中世宗第四子。好文。善歌詩。有樂善老人集。今佚。

密國公璣仕履見前。晚年自刊其詩三百首。樂府一百首。號如庵小藁。趙秉文爲之序。其佳句有  
聞閑閑再起爲翰林云。蓮燭光中久廢吟。一朝超擢睿恩深。四朝耆舊大宗伯。三紀聲名老翰林。人道  
蛟龍得雲雨。我知麋鹿強冠襟。寶巖鎔谷西窗夢。不信秋來不上心。又過胥相墓云。亭亭華表立朱門。

始信征南宰相尊。下馬讀碑人不識。夷山高處望中原。甚有唐人遠意。

宇文虛中字叔通。成都人。宋黃門侍郎。以奉使見留。寄詞張孝純曰。有人若問南冠客。爲道西山採蕨薇。又詩云。定鼎未應周命改。登牀合許宋人平。又曰。南冠終日囚軍府。北雁何時到上林。久之。金人重其才藝。官以翰林學士。掌詞命。書金太祖功德碑。號爲國師。虛中雖仕金。心不忘宋。以蠟書密奏不一事。秦檜忌之。私遣人告於金。遂致族誅。本傳謂其恃才輕肆。好譏訕。凡見女直人。輒以礪齒目之。貴人達官往往積不能平。由是媒孽以成其罪。會有人告虛中謀反。鞠治無狀。乃羅織其家圖書爲反具。虛中曰。圖書南來士大夫家家有之。高士談圖籍尤多於我。豈亦反耶。有司承順風旨。并殺士談。

張斛字德容。仕宋爲武陵守。入金官祕書省著作郎。有南游北歸等詩。賦小孤山云。天圍秋漲闊。山背夕陽孤。松門峽云。春木有秀色。野雲無雜姿。秋興樓云。碣石晚風催雁急。昭祁寒漲與雲平。五古平安道中云。高林催青冥。柯葉森如織。陽光已轉午。陰嶺仍半黑。崢嶸亂石間。行子有苦色。臨深地勢入。陟險天宇塞。四顧無所投迹。竄去未息。悵然增百憂。冥冥羨歸翼。人多誦之。其文章字畫。皆有前輩風調。宇文虛中甚激賞之。

高士談字子文。一字季默。宋高瓊之後。宣和末爲忻州戶曹。人金爲翰林直學士。皇統初預宇文虛中之禍。時人悲之。有蒙城集。今佚。其斷句如寒花貪晚日。瘦竹怯秋霜。禹廟云可憐風雨胼胝苦。後世山河屬外人。並佳。

蔡松年仕履見前。其詩五古七古爲金文雅所採者皆佳。因文長不錄。茲錄其淮南道中五首之一。以見一斑。詩云。吾年過五十。所過知前非。顏鬢日蒼蒼。老境行相追。枯槔聽俯仰。隨人欲何爲。歸計勿悠悠。出處吾自知。頗有陶韋遺韻。

蔡珪仕履見前。七歲賦詩。見稱於時輩。故其所作亦不亞於父。

馬定國仕履見前。初學詩。未有入處。夢其父與方寸白筆。從此文章大進。宣政末題詩酒家壁云。蘇黃不作文章伯。童蔡翻爲社稷臣。三十年來無定論。到頭奸黨是何人。用是得罪。亦用是得名。後游歷下亭。以詩撼劉豫云。男子當爲四海游。又攜書劍客東州。烟橫北渚芰荷晚。木落南山鴻雁秋。富國桑麻連魯甸。用兵形勢接營邱。傷哉不見桓公語。千古邊城空水流。遂因之而入仕途。

魏道明字元道。易州人。仕至安國軍節度使。暮年居雷溪。自號雷溪子。著有鼎新詩話。今佚。

吳演字子長。東平人。年三十。以食貧暫仕。卽歸。隱於魚山狼溪之側。其山居云。西首魚山崦。北連黃石祠。崇岡在東南。我家山北陲。地僻少人事。終朝掩柴扉。尊酒不常得。書卷聊自怡。春風數日來。處處生蕨薇。寸心復何累。一飽良可期。當年終南人。捷徑以貽譏。知我無心者。豈顧悠悠辭。沖淡似柴桑。翁。

劉著字鵬南。舒州舒城人。宣政末登進士第。入金年六十餘。始入翰林。充修撰。出守武遂。終於忻州刺史。皖城有玉照鄉。旣老。號玉照老人。示不忘本也。其至日詩云。亂離南國忽經年。一線愁添未死前。心折靈臺候雲物。眼看東海變桑田。燕巢幕上終非計。雉落樊中政可憐。安得絕雲行九萬。卻騎鯨背上青天。飽經憂患者讀之。當亦引爲同調。

朱自牧字好謙。棣州厭次人。皇統中南選。宋端卿榜登科。大定初。以同知晉寧軍事卒官。其郊行詩云。緩轡尋春水一涯。最憐朝雨浥輕沙。小溪烟重偏宜柳。平野雲垂不礙花。青眼步兵元好酒。黑頭江令未還家。興長不覺歸來晚。過盡城隅陣陣鴉。有悠然自得氣象。

劉汲字伯深。天德三年進士。釋褐慶州軍事判官。入翰林爲供奉。自號西巖老人。其集卽以西巖

爲名。李純甫爲作序云。劉西巖詩質而不野。清而不寒。簡而有理。澹而有味。蓋學樂天而酷似之。顧其爲人傲世而自重。頗喜浮屠。邃於性理之說。凡一篇一詠。必有深意。能道退居之樂。其不如意詩云。朝亦不如意。暮亦不如意。今日只如此。來日復何異。一懽強欲謀。百憂已先至。乃知塵網苦。動輒心萬計。高軒與華冕。儻來亦如寄。規規必欲求。愈勞終不遂。善哉榮啓期。自寬以遣累。讀此一什。可知其詩之大凡也。

任詢字君謨。易州軍市人。爲人慷慨多大節。書爲當時第一。畫亦入妙品。登正隆二年進士第。官至北京鹽使。六十四致仕。優游鄉里。家所藏法書名畫數百軸。日夕展玩。不知老之將至。年七十卒。平生詩數千首。歿後皆散失。其山居云。種竹六七箇。結茅三四間。稍通溪上路。不礙屋頭山。黃葉水清淺。白雲風往還。時人喜稱道之。又有西湖云。西湖環武林。澄澄大圓鏡。仰看湖上寺。卽是鏡中影。湖光與天色。一碧千萬頃。堤徑截烟來。樓臺自昏暝。可謂詩中有畫矣。

馮子翼字士美。大定人。正隆二年進士。官至臨海軍節度使事。致仕後居真定。有詩樂府傳於世。今皆佚。元好問稱其詩有筆力。

邊元鼎字德舉。豐州人。十歲能詩。中天德三年進士第。終邢州幕官。仕宦不達。爲人疏俊。所作詩文有高意。時輩少及。如云。雲鐘號曉月。風絮亂春燈。五更好夢經年事。三月殘花一夜風。皆佳句也。

王寂仕履見前。詩有專長。其經梁利器墓下云。毀譽譊譊息蓋棺。百年春夢大槐安。功名例挽九牛尾。富貴真成一鼠肝。故國鶯花人事改。空山風雨夜臺寒。平生老我心如鐵。醉眼西州淚不乾。又沁水山寺云。兩峽山高月半輪。五更人起馬嘶頻。無端又上長安道。輸與僧窗飽睡人。皆佳。其父礎字鎮之。金初進士官至歸德府判官。亦善詩。

劉迎字無黨。東萊人。初以蔭試部掾。大定十三年用薦書對策爲當時第一。明年成進士第。除幽王府記室。改太子司經。顯宗特親重之。迎自稱無諍居士。有詩文樂府。號山林長語。章宗時詔國學刊行。今佚。金代中葉詩人。首推無黨。中州集採其詩至七十六首之多。皆可誦也。

黨懷英仕履見前。趙秉文謂其詩似陶謝。奄有魏晉。今錄其穆陵道中其一云。沂山一何高。羣峯鬱屏顏。我行問遺老。云此小太山。望秩有常祀。其神號東安。草荒穆妃墳。雨剝漢武臺。神仙果何在。可想不可攀。千年等一息。俯仰悲人寰。東望蓬萊宮。咫尺滄波間。其二云。重山復峻嶺。溪路宛盤盤。流水

滑無聲。暗瀉溪石間。岸草淒以碧。鮮葩耀紅丹。高雲映朝日。流景清林端。我行屬朱夏。欲憇不得閒。山中有佳人。風生松桂寒。

趙秉文仕履見前。元好問謂其七言長詩。筆勢縱放。不拘一律。律詩壯麗。小詩精絕。多以近體爲之。至五言大詩。則沈鬱頓挫學阮嗣宗。真淳簡澹學陶淵明。以他文較之。或不近也。其游華山寄元裕之七古一首。縱橫奇恣。爲集中最高之作。篇長不備錄。

王庭筠仕履見前。其詩圓活脫灑。筆端有舌。今錄其題張禮部溪山真樂圖云。悠悠春天雲。想見平時閒。朝游溪橋畔。暮宿山堂間。澹然不知愁。亦復忘所懽。出山初無心。旣出還思山。人間待霖雨。欲歸良獨難。山堂悵何許。蕭蕭松桂寒。

趙楓字文孺。東平人。大定二十二年進士官至禮部郎中。性沖澹。學道有得。黃山真自號也。趙秉文云。楓之正書。體兼顏黃。行草備諸家體。超放又似楊凝式。當處黃魯直蘇才翁伯仲間。黨懷英小篆。李陽冰以來。鮮有及者。而以楓配之。號曰黨趙。著有黃山集。今佚。應制詩典雅清麗。最爲壇場。史舜元言。章宗中秋賞月瑞光樓。召楓對御賦詩。以清字爲韻。章宗讀至落句。大加賞異。手酌金鍾以賜。且字

之曰。文孺以此鍾賜汝作酒直。士林榮之。詩云。秋氣平分月正明。葉珠宮闕對蓬瀛。已驅急雨消殘暑。不遣微雲點太清。簾外清風飄桂子。夜深涼露滴金莖。聖朝不奏霓裳曲。四海歌謳卽樂聲。

劉昂字之昂。興州人。大定十九年進士。有聲場屋。其律賦輕便巧麗。差有捷法。早年得仕省掾。攷滿。授平涼路轉運副使。昂天資警悟。作詩得晚唐體。尤工絕句。往往膾炙人口。有張秦娥者。頗能小詩。其賦遠山云。秋水一抹碧。殘霞幾縷紅。水窮霞盡處。隱隱兩三峯。其後流落。昂贈詩云。遠山句好畫難成。柳眼才多總是情。今日衰顏人不識。倚爐長聽煮茶聲。又云。二頃山田半欲蕪。子孫零落一身孤。寒窗昨夜瀟瀟雨。紅日花梢入夢無。秦娥爲之泣下。

王礪字逸賓。先世家臨洛。至礪遂爲汴梁人。博學能文。不就科舉。孝友天至。非其食不食。家無飢石之儲。晏如也。明昌中。宰相馬惠迪判開封。舉礪德行才能。詔授鹿邑主簿。卽乞致仕。人以高士目之。趙秉文嘗集黨懷英。趙漁路。鐸劉昂。尹無忘。周昂與礪七人詩。刻木以傳。目爲明昌辭人雅製。其詩有暮春郭南七古。後人許之。謂語不迫切。婉轉纏綿。有無限風神者也。詩云。大梁城外孤臺傍。烟荒水碧春林芳。憑高極目見歸雁。風物令人思故鄉。紫金山下斜陽暮。萬里川光照雲樹。山間細雨花落時。何

人來往東風路。

師拓字無忌。平涼人。舉進士不中。明昌中有司薦其才。以嗜酒不果。作詩有氣象。而工於鍊句。如賦雁云。天低仍在眼。山沒更傷心。浮上云。夕陽明蘭苕。秋色靜蒹葭。白曳衝烟鶩。紅翻漾水霞。燕市酒樓云。氣清天曠蕩。露白野蒼涼。又荷蒼秋近葉蓮。膩雨餘花大。爲時人所稱。其冬夜二首最佳。因文長不錄。

史蕭字舜元。京兆人。僑居北京之和衆。天資挺特。高才博學。作詩精緻有理。尤善用事。古賦亦奇峭。工於字畫。業科舉爲名進士。優於政事。官至同知汾州事。著有澹軒遺稿。今佚。錄道傍一首。以見崖略。秋霜一何嚴。凋此道旁柳。殘枝幾葉在。其勢不能久。憶昨三春時。濯洗烟雨後。弄姿舞婆娑。勸我一杯酒。別後遽能幾。忽忽成老醜。人生非金石。長短百年壽。功名與富貴。於身亦何有。古人隨物化。今已柳生肘。我獨何爲哉。窮年事奔走。長堤隱落月。駐馬一迴首。春風柳梢黃。定得西歸否。

龐鑄字才卿。又自號默翁。大興人家。世貴顯。明昌五年進士。官至京兆路轉運使。風流文采爲時輩所推。工詩。造語奇健不凡。世多傳之。其題山谷透緝帖七古一首。極高妙。文長不錄。

李遜字平甫。饒城人。明昌二年進士。高才博學。無所不通。泰和中爲大興幕官。忤紇石烈執中。執中卽以非罪誣染之。幾至不測。雖有以自解。竟坐是仕宦不達。以東平治中致仕。閒居陽翟十餘年。白號寄庵先生。平生詩文甚多。如感事云。半錢利路人乃虎。一釣名餌吾其魚。魯山道中云。老夫自喜秋野僻。路人頗笑衣裳寬。皆佳句也。

高憲字仲常。遼東人。王庭筠之甥。幼學於外家。故詩筆字畫俱有舅氏之風。天資穎悟。博學強記。在太學中。諸人莫敢與抗。泰和三年。乙科登第。自言於世味澹無所好。惟生死文字間而已。使世有東坡。相去萬里。亦當往拜之。年未三十。作詩已有數千首。茲錄其焚香六言四首。茉莉花心曉露。薔薇萼底溫風。洗念六根塵外。忘情一炷香中。滿地落花春曉。一簾微雨輕陰。正要金蕉引睡。不妨玉隴知音。紙帳收烟密下。松灰卷火常虛。午寂春閒小睡。人間自有華胥。沈水濃薰甲煎宮梅細點波津。奕奕非烟非霧。依依如幻如真。

李經字天英。錦州人。作詩極刻苦。喜出奇語。不蹈襲前人。李純甫稱爲今世太白。由是名大震。再舉不第。拂衣去。南渡後。其鄉帥有表至朝廷。士大夫識之。曰。此天英筆也。朝議以武功就命倅其州。後

不知所終。嘗有詩云。雁奴失塞更。拍拍叫秋水。天長夢已盡。秋思紛難理。又四言雜詩云。巖椒鬱雲日夕生陰雨。寒縞夜秋黃。老林人烟黑。突樵徑雲深。最爲得意也。

趙元字宜之。定襄人。經童出身。舉進士不中。以年及調鞏西簿。未幾失明。自少日博通書傳。作詩有規矩。泰和以後。詩名益重。李純甫爲賦愚軒。有落筆突兀無黃初之句。愚軒元之自號也。南渡後。往來洛西山中。趙秉文諸人皆愛之。所至必虛左以待。爲人有材幹。處事詳雅。旣病廢。無所營爲。萬慮一歸於詩。故詩益工。其村居夏日云。官府不著名。散迹村落深。白雲自朝暮。青山無古今。愛此夏日永。門巷多繁陰。呼兒具繩牀。不履亦不簪。殷勤好風來。爲我消煩襟。一飽萬事了。何用腰黃金。羈勒困名馬。網羅多珍禽。何如山鹿擬。呦呦戀長林。此詩沖澹深邃。金人能爲之者不多也。

馮璧仕履見前。詩筆清峻。似其爲人。素爲趙秉文所激賞。中州集載宋景文左丞董公紹祖奉使江左。得璧詩餞行。喜見顏間。詩四韻。每誦一句。輒爲一舉觴。其見重當時如此。

王若虛仕履見前。詩亦稱金代作家。其感秋一首。爲人傳誦。今錄之。詩云。西風撼庭柯。疏葉鳴策策。天地一蕭條。羈懷亦岑寂。青春悅如昨。轉瞬年半百。自從長大來。轉覺日月迫。功名非所慕。老大不

足恤。怛然感時心。自亦不能釋。清晨理短髮。已見數莖白。刀鑷雖可施。殆似兒子劇。此身委蛇耳。毀棄無足惜。況於毛髮間。而乃強脩飾。青青如陸展。星星行復出。畢竟白滿頭。復將何所摘。

秦略字簡夫。陵川人。少舉進士不中。卽以詩爲業。詩尙雕刻。而不欲見斧鑿痕。故頗有自得之趣。悼亡一詩。高出時輩。殆荆公所云。看似尋常最奇崛。成如容易却艱難者耶。詩云。自古生離足感傷。爭教死別便相忘。荒陂何處墳三尺。老眼他鄉淚數行。多事春風吹夢散。無情寒月照更長。回家恰是新寒節。忍見堂空紙挂牆。略自號西溪老人。有集行世。今佚。

元德明太原秀容人。好問之父也。自幼讀書。世俗鄙事。終其身不挂口。親歿。遺產無幾。德明布衣蔬食。處之自若。累舉不第。放浪山水間。未嘗不一日飲酒賦詩。所爲詩不事雕飾。清美圓熟。無山林枯槁之氣。年四十八終。今錄其同侯子晉賦雁詩云。沈沈江浦雲。浩浩朔漠雪。微生幾寒暑。翅老飛欲折。樓中見新過。夕照送明滅。欹枕數聲來。疏窗耿殘月。悲鳴或天性。南北隨所愜。誰念孤旅人。年年爲愁絕。

麻九疇字知幾。莫州人。三歲識字。七歲能草書及大字數尺者。有神童稱。章宗召見。大奇之。弱冠

入太學。有文名。南渡後。寓居鄆蔡間。入遂平西山。始以古學自力。博通五經。於易春秋爲尤長。興定末。府試第一。正大三年。以侯摯趙秉文薦。試館職。賜二甲第一人及第。授太祝官。至應奉翰林文字。九疇資性野逸。高蹇自便。不與世合。其詩精深峭刻。似其爲人。有讀書北陽山中詩云。讀書空山裏。落月低巖幽。山鬼語夜半。怪我非巢由。可以知其大概矣。

劉從益字雲卿。渾源人。南山翁撝之曾孫。大安元年進士。拜監察御史。被黜。起爲葉縣令。入授應奉翰林文字。旋卒。從益博學強記。於經學有所得。爲文章長於詩。五言古詩又其所長。有蓬門先生集。今佚。

宋九嘉字飛卿。夏津人。爲人剛直豪邁。少游太學。有能賦聲。長從李純甫讀書。爲文有奇氣。與雷淵李經相伯仲。中至寧元年進士第。歷藍田高陵扶風三水四縣令。咸以能稱。入爲翰林應奉。正大中。以疾去官。歿於癸巳之難。

雷淵字希顏。別字季默。應州渾源人。崇慶二年黃裳榜進士甲科。釋褐涇州錄事。終於翰林修撰。淵少孤貧。無以爲資。乃以胄子入國學。便能自樹如成人。未弱冠。即游於公卿間。太學諸人莫敢與之。

抗渡河後。學益博。文益奇。名益重。生平慕田疇。陳登之爲人。而人亦以古人期之。茲錄其九日登少室絕頂同裕之分韻得蘿字五古云。閒居愛重九。佳人重相顧。登高酬節物。少室巒嵯峨。迤邐謝塵土。夷猶出烟蘿。欸如據鰲頭。萬壑赴蜂窩。浩浩跨積風。瀰瀰渺長河。日車仄紅輪。天宇凝蒼波。指點數齊州。始覺氛埃多。我無倚天劍。有淚空滂沱。驚鱗盼奧渚。倦翼占危柯。悔不舉家來。結茅老巖阿。歸途昧老阮。廣武意如何。

張建字吉甫。蒲城人。明昌初舉才行。授絳州教官。召爲宮教。應奉翰林文字。以老乞身。章宗愛其淳素。不欲令去左右。眷眷久之。超授同知華州防禦使事。仍賜詩。有從今畫錦蓮峯下。三樂休誇榮啓期之句。士林榮之。建自號蘭泉老人。金時有集行世。今佚。其論詩云。作詩不論長篇短韻。須要詞理俱足。不歎不餘。如荷上灑水。散爲露珠。大者如豆。小者如粟。細者如塵。一看之。無不圓成。始爲盡善。建詩雖不能盡如所言。然亦未爲無所得也。

呂中孚字信臣。冀州南宮人。孝友純至。爲鄉人所稱。累舉不第。以詩文自娛。著有清達集。今佚。其賦紅葉云。張園多古木。蕭寺半斜陽。元德明亟稱之。其寫懷詩云。秦川西去遠。不意過漳川。歸夢三千

里。羈愁二十年。謀生空白髮。行路若青天。餘事休相問。相留只醉眠。可謂一片神行化。盡刻劃之迹。

劉勳字少宣。父祖以上爲雲中人。至勳客居濟南。樂其風土。遂占籍焉。少日住太學。有文名。南渡後。專於詩學。往往爲人傳誦。其先世本衣冠族。風流蘊藉。都無科舉氣。見於文字者亦然。其詩大概尖新。長於屬對。其佳句有萬里風沙憐病客。幾年刁斗厭寒更。人憐直道違時好。自喜閒身與物疎。擊筑漫留燕客淚。佩蘭誰識楚臣心。元夜陰晦云。芙蓉城暖東風夜。楊柳樓深笑語春。濟南云。午風襟袖知秋早。甲夜闌干得月多。又云。船行著色屏風裏。人在回文錦字中。百和香薰風過處。萬盤珠落雨來時。可謂對仗工整。吐屬風雅者也。

李俊民仕履見前。其詩多幽深激烈之音。繫念宗邦。寄懷深遠。不徒以清新奇崛爲工。今錄其姚子昂畫馬云。雄姿卓立開天骨。騰踏萬里如神速。可憐不遇九方臯。空使時人指爲鹿。自從大奴守天育。無由更騁追風足。中原一戰收乾坤。白髮將軍髀生肉。

王鬱字飛伯。大興人。儀狀魁奇。目光如鵠。少居釣臺。閉門讀書。不接人事。久之。爲文法柳宗元。閑肆奇古。動輒數千言。歌詩俊逸效李白。嘗作王子小傳以自叙。天興元年。汴京被圍。挺身突出。爲兵士

所得。其將遇之甚厚。鬱徑行無機防。爲其下所忌見殺。臨終懷中出書曰。是吾平生著述。可傳付中州士大夫。曰王鬱死矣。年三十餘。其所作傷別曲。爲人傳誦。今錄之。蘭臯飛暗塵。征車紆去轍。長安雖咫尺。回首繁華歇。故人亭下酒。蛾眉眼中血。平生慷慨腸。忽作柔絲結。傳聞紫塞傍。秋烽下危堞。班超未投筆。來瑱空嚼鐵。誰能金闕中。坐眷娟娟月。與鬱同時以詩鳴者。雷琯侯册王元粹云。

雷琯字伯威。坊州人。以薦書從事史館。調入作司使。博學能文。時輩少有及者。并州人李汾與琯同入史館。以高塞得罪。琯作詩以送。頗譏翰林諸人不能少忍。至與一書生相角逐。使之狼狽而去。有郎君未足留商隱。官長從教罵廣文。又云。明日春風一杯酒。與君同醉信陵墳。人甚稱之。生平所作。以樂府體古意四首爲最得意。

王元粹字子正。初名元亮。後更名粹。平州人。年十八九。作詩便有高趣。性習專固。世事不以攖其懷。故時輩無能及之。用門資敍爲南陽酒官。遭亂。流寓襄陽。襄陽破。隻身北歸。遂爲黃冠以終。其西山避亂詩三首之一云。野宿不得曉。飛霜沾敝袍。空山凝寒色。天邊星月高。憶昨離鄂城。數家同遁逃。穿林恐相失。前後聞呼號。避亂但欲速。焉知登頓勞。俯臨萬仞壑。性命輕鴻毛。此詩氣骨蒼健。有少陵風

格。

元好問仕履見前。其詩文樂府。實爲金源一代之冠。天生斯人。俾以集北方人文之大成者也。郝經遺山先生墓誌銘曰。先生當德陵之末。獨以詩鳴。上薄風雅。中規李杜。粹然一出於正。直配蘇黃氏。天才清贍。邃婉高古。沈鬱大和。力出意外。巧縛而不見斧鑿。新麗而絕去浮靡。造微而神采粲發。雜弄金璧。糅飾丹素。奇芬異秀。洞蕩心魄。看花把酒。歌謠跌宕。抉幽并之氣。高視一世。以五言雅爲正。沈德潛說詩晦語曰。裕之七言古詩。氣王神行。平蕪一望。常得峯巒高插。濤瀾動地之概。又東坡後一能手也。趙翼甌北詩話曰。蘇陸古體詩。行墨間尙多排偶。一則以肆其辨博。一則以侈其藻繪。固才人之能事也。遺山則專以單行。絕無偶語。構思窅渺。十步九折。愈折而意愈深。味愈雋。雖蘇陸亦不及也。七言律則更沈摯悲涼。自成聲調。唐以來律詩之可歌可泣者。少陵十數聯外。絕無嗣響。遺山則往往有之。如車駕遁入歸德詩云。白骨又多兵死鬼。青山原有地行仙。蛟龍豈是池中物。蟻蝨空悲地上臣。出京詩云。只知終老歸黃土。忽漫相看是楚囚。日月盡隨天北轉。古今誰見海西流。還冠氏詩云。千里關河高

骨馬。四更風雪短檠燈。座主閑閑公諱日詩云。贈官不暇如平日。草詔空傳似奉天。此等感時觸事。聲淚俱下。千載後又使讀者低徊不置。蓋事關家國。尤易感人耳。據以上三則而言。則遺山詩各體皆佳。實足以上繼李杜。平揖蘇黃。下開虞（集）高（啓）而無愧矣。

辛愿字敬之。福昌人。自號女兒野人。年二十五。始知讀書。取白氏諷諫集自試。一日便能背誦。乃聚書環堵中讀之。至書伊訓詩河廣。若有所省。欲罷不能。因更致力焉。由是博極羣書。於三傳爲尤精。杜詩韓筆。未嘗一日去其手。作文有繩尺。詩律精嚴。有自得之趣。性野逸。負高氣。不修威儀。高廷玉爲河南府治中。延爲上客。廷玉爲府尹。陷譖。願亦被訊掠。幾不得免。自是生事益促。又不得不與世交接。其枯槁憔悴。流連頹踏。往往見之於詩。有詩數千首。佳句極多。如自憐心似鶴連子。人道面如裴晉公。萬事直須稱好好。百年端欲付悠悠。院靜寬留月。窗虛細度雲。浪翻魚出浦。花動鳥移枝。之類是也。元好問曰。敬之業專而心通。敢以是非白黑白任。每讀劉景玄趙宜之雷希顏李欽叔張仲經李仲梁王仲澤麻知幾之詩。必爲之探源委。發凡例。解絡脈。審音節。辨清濁。權輕重。片善不掩微疵。必指如老吏斷獄。文峻綱密。細毫不相貸。如衲僧得正法眼。徵詰開示。幾於截斷衆流。人有難之者。則曰。打鐵不離

詩解詩莫如我。故朋輩中有公鑒而無姑息者。必以敬之爲稱首。蓋不本於教育。不階於講習。不出於父兄。而卓然成就如此。然則若吾敬之者。真特立之士哉。

李汾字長源。太原平晉人。少游秦中。喜讀史書。覽古今成敗治亂。慨然有功名心。工於詩。專學唐人。其妙處不減李白崔顥。爲人尙氣。跌宕不羈。頗褊躁。觸之輒怒。以是多爲人所惡。元光間。游大梁。舉進士不第。能詩。聲一日動京師。用薦爲史館書寫。以病目免歸。復入南京。上書言時事。不報。出客唐鄧。會北兵入境。恆山公武仙署爲掌書記。仙與參知政事完顏思烈相異同。頗謀自安。懼汾言論。欲除之。汾覺。遁泌陽。仙令總帥王德追獲之。鎖養馬平。絕食而死。年未四十。汾平生詩甚多。不自收集。故往往散落。其再過長安。有云。三輔樓臺失歸雁。上林花木怨啼鵠。空餘一掬傷時淚。暗墮昭陽石馬前。又下第絕句云。學劍攻書事兩違。回頭三十四年非。東風萬里衡門下。依舊中原一布衣。又記時事云。捕得酒泉生口說。衆曾弊面哭單于。望少室云。圭影靜涵秋氣老。劍峯橫倚斗杓寒。夏夜云。鴉銜暝色投林急。螢曳餘光入草深。鶴鶴樓云。白鳥去邊紅樹小。斷雲橫處碧山多。樂府歌行尤雄峭可喜。

李獻甫字欽用。獻能從弟也。博通書傳。尤精左氏及地理學。興定五年登進士第。爲威陽簿。累仕

至鎮南軍節度副使。年四十死蔡州之難。所爲詩號天倪集。今佚。其秋風怨一首。置諸昌谷集中。幾無以辨。

麻革仕履見前。其詩亦卓可傳。今錄其置酒半山亭一詩云。抱懷久不寫。兀坐如繫囚。永懷西山勝。浩蕩成茲游。巖壑互窈窕。叢蘿鬱深幽。飛烟入虛無。長風跨崑邱。楚甸散林莽。商顏亦綢繆。雷雨天地空。景物入夜浮。况當節律變。萬物颯以秋。雲來白石慘。天澹清江流。西望渺關河。沈沈生暮烟。蘭若暗幽谷。芰荷老芳洲。一笑舉酒觴。浩歌聊自酬。幽賞欣未極。慨歎心悠悠。世事蒼茫外。寒沙明白鷗。段克己字復之。號遜庵。別號菊莊。稷山人。弟成己字誠之。號菊軒。皆舉進士。入元不仕。結河汾詩社。徜徉山水以終。昆弟擅名文章。尚書趙秉文目之曰二妙。故其合編詩集。卽以爲名。

### (三)詞家

金人之詞。留傳絕妙。在今日可得見者。自元好問中州樂府外。則四印齋之明秀天籟二集。韞村叢書所列之金詞五家。餘則一鱗一爪。僅見於徐釚詞苑叢談。陶樸詞綜補遺而已。夫金主中夏。亦越百年。而倚聲一道。祇此寥寥數家。不得不謂之難能而可貴。然諸家之精心結撰。要自有不可磨滅者。

在。故能閱千載而常新。余嘗取而籀繹之。知其聲宏氣壯。振其北風雄直之音。發抒其意內言外之辭。以與南宋諸詞人對抗。洵無愧色。至諸詞家之得力所在。類皆取徑於東坡樂府。以上窺乎花間者也。昔人云。宋自南渡後。程學盛於南。蘇學盛於北。職是言之。知金人之瓣香玉局。固不僅詩文爲然。卽大江東去一派。亦奉之爲金科玉律矣。

海陵庶人詩固雄鷙。詞亦如之。其鵲橋仙中秋待月不至云。停杯不舉。停歌不發。等候銀蟾出海。不知何處片雲來。做許大通天障礙。虬鬢撚斷。星眸睜裂。惟恨劍鋒不快。一揮截斷紫雲腰。子細看嬌娥體態。喜遷鶯賜御前都統騎衛大將軍韓邪云。旌麾初舉。正駛馳力健。嘶風江渚。射虎將軍落鵬都尉。繡帽錦袍翹楚。怒磔戟鬚爭奮。捲地一聲鼙鼓。笑談頃長江齊楚。六師飛渡。此去無自墮金印如斗。獨把江名擣取。斷鎖機謀。垂鞭方略。人事本無今古。試展臥龍韁繩。果見成功旦暮。問江左。想雲霓切望。玄黃迎路。其桀骜之態溢於言表。他蓋可知也。

世宗詩見前。亦能詞。法苑春秋載其賜元悟玉禪師減字木蘭花云。但能了淨。萬法因緣何足問。日月無爲。十二時中更不疑。常須自在。識取從來無罣礙。佛佛心心。佛若休心也是塵。此以禪語爲

詞。是別開生面者也。

章宗嘗有蝶戀花詠聚頭扇云。幾股湘江龍骨瘦。巧樣翻騰。疊作湘波皺。金縷小錙花草鬪。翠條更結同心扣。金殿珠簾閒永晝。一握清風。暫喜懷中透。忽聽傳宣須急奏。輕輕褪人香羅袖。生查子  
擘橙爲軟金杯。云風流紫衣郎。痛飲烏紗岸。柔軟九迴腸。冶怯玻璃盃。纖纖白玉蔥。分付黃金彈。借得洞庭春。飛上桃花面。倚聲之工。可見一斑。

完顏從郁字文卿。本名瑀。字子玉。衛紹王改賜焉。以父任充符寶。章宗試一日百篇賜第。元好問曰。朝廷經略西蜀。宗室綱遣太尉中孚之子公輔說吳曦稱藩。文卿私謂梁經父言。誘人以叛。豈有天下者所宜爲。其後蜀事竟不成。識者稱焉。仕至安肅刺史。其詞有西江月題邯鄲王化呂仙翁祠堂云。壁斷何人舊字。鑪寒隔歲殘香。洞天人去海茫茫。玩世仙翁已往。西日長安道遠。春風趙國臺荒。行人誰不悟黃粱。依舊紅塵陌上。

吳激字彥高。自號東山。建州人。宋宰臣拭之子。而米芾之婿也。工詩能文。字畫俊逸。得婦翁筆意。尤精樂府。造語清婉。哀而不傷。將宋命至金。以知名留不遣。命爲翰林待制。皇統二年。出知深州。到

官三日而卒。著有青山集十卷。並樂府。今俱佚。古今詞話載激在會寧府。遇一老姬善琵琶者。自言故宋黎園舊籍。激對之淒然。爲賦春從天上来詞云。海角飄零。歎漢苑秦宮。墜露飛螢。夢回天上。金屋銀屏。歌吹競舉。青冥問當時遺譜。有絕藝鼓瑟湘靈。促哀彈似林鶯。歷歷山溜泠泠。黎園太平樂府。醉幾度春風。髮變星星。舞破中原。塵飛滄海。風雪萬里。龍庭寫胡笳。幽怨人憔悴。不似丹青酒微醒。對一窗涼月。燈火青熒。又詞品載洪邁云。先公在燕山日。偶赴北人張總侍御家集。出侍兒佐酒。中有一人進止溫雅。意態摧抑可憐。問其姓名。乃宣和殿宮姬也。坐客翰林直學士吳彥高作人月圓詞紀之云。南朝千古傷心事。猶唱後庭花。舊時王謝。堂前燕子。飛向人家。恍然一夢。仙肌勝雪。宮髻堆鴉。江州司馬。青衫淚溼。同是天涯舉座。淒然有揮涕者。

蔡松年仕履見前。元好問謂百年以來。樂府推伯堅與吳彥高。號吳蔡體。其詞名明秀集。其念奴嬌追和赤壁詞用韻者。元好問取以壓卷。並謂此歌以離騷痛飲爲首句。公樂府中最得意者。讀之。則其平生自處爲可見矣。詞云。離騷痛飲。笑人生佳處。能消何物。更甫當年成底事。空想巖巖玉壁。五畝蒼烟。一邱寒碧。歲晚憂風雪。西州扶病。至今悲感前傑。我夢卜築蕭閑。覺來巖桂。十里幽香發魂裾。

胸中冰與炭。一酌春風都滅。勝日神交。悠悠得意。離恨無毫髮。古今同致。永和徒記年月。子珪傳其家學。亦優於詞。

鄧千江臨洮人。詞品謂金人樂府稱千江。所作望海潮爲第一。其詞全步驟沈公述上王君貺一首。而繁縟雄壯。何啻十倍過之。不止出藍已也。詞云。雲雷天塹。金湯地險。名藩自古臯蘭。營屯繡錯。山形米聚。襟喉百二。秦關。塵戰血猶殷。見陣雲冷落。時有雕盤。靜塞樓頭曉月。依舊玉弓彎。看看定遠西還。有元戎閫令。上將齋壇。區脫書空。兜鈴夕解。甘泉又報平安。吹笛虎牙間。且宴陪珠履。歌按雲鬟。招取英靈毅魄。長繞賀蘭山。

張中孚字信甫。世爲安定望族。初以父任知寧環鎮戎三州。官至南京留守。其驀山溪一詞。極爲悲慨淋漓。詞云。山河百二。自古關中好。壯歲喜功名。擁鞍雕裘繡帽。時移事改。萍梗落江湖。聽楚語。厭蠻歌。往事知多少。蒼顏白髮。故里欣重到。老馬省曾行。也頻嘶冷烟殘照。終南山色不改舊時青。長安道。一回來須信一回老。

趙可字獻之。高平人。貞元二年進士。仕至翰林院直學士。風流有文采。詩樂府皆傳於世。號玉峯。

散人集。今佚。其慕山溪賦崇福（在太原晉溪）荷花云。雲房西下。天共蒼波遠。走馬記狂游。正芙蓉平鋪錦面。浮空欄檻。招我倒芳尊。看花醉。把花歸。扶路清香滿。水楓舊曲。應逐歌塵散。時節又新涼。料開遍橫塘清淺。冰姿好在。莫道總無情。殘月下。曉風前。有恨何人見。

王寂仕履見前。詩文固卓然可稱。其詞亦具花間之丰神。今錄其點絳脣閨思云。疏雨池塘。一番雨過花成陣。海榴紅褪。燕語低相問。冰簾紗帳。玉骨涼生潤。沉烟噴日長人困。枕破斜紅葷。

馮子翼仕履見前。著有樂府。附集以行。今佚。茲錄其江城子一首。臘脂波上月如鉤。問青樓。覓溫柔。庭院深沉。窗戶掩。清秋月下香雲嬌墮砌。花氣重。酒光浮。清歌皓齒點明眸。錦纏頭。若爲儔。門外三更。燈影立驛驅。結習未忘吾老矣。煩惱夢。赴東流。讀來頗覺無限感愴。

劉迎仕履見前。詩文樂府皆擅長。茲錄其烏夜啼一首。菱鑑玉篦秋月。蕙爐銀葉朝雲。宿醒人困屏山夢。烟樹小江村。翠甲未消蘭恨。粉香不礙梅魂。離愁分付殘春雨。花外注黃昏。昔人評此詞謂纖穠多姿。無一字不<sup>贊</sup>。無一字不愁。

黨懷英仕履見前。其少日師事劉巖老。與濟南辛幼安爲同學。幼安回南。詞名大振。懷英在北。詩

文詞並臻佳妙。故言大定以還之文學。必以懷英爲首屈一指。其詞有感皇恩七夕云。一葉下梧桐。新涼風露。喜鵲橋成渺雲步。舊家機杼。巧織紫綃如霧。新愁還織就。無重數。天上何年。人間朝暮。回首新津又空渡。盈盈別淚。散作半空疏雨。離魂都付與秋將去。

王庭筠仕履見前。其詞秀逸。高出儕輩。今錄兩闋。一鳳棲梧云。衰柳疎疎苔滿地。十二欄干。故國三千里。南去北來人老矣。短亭依舊殘陽裏。紫蟹黃柑真解事。似倩西風。勸我歸歟未。王粲登樓寥落際。雁飛不斷天連水。二訴衷情云。夜涼清露滴梧桐。庭樹又西風。薰籠舊香猶在。曉帳煖芙蓉。雲淡薄月朦朧。小簾櫳。江湖殘夢。半在南樓。畫角聲中。

趙秉文仕履見前。其爲人宏獎風流。備載於元遺山中州集。劉京兆歸潛志。可謂不遺餘力矣。所作詞高古簡淡。以青杏兒一調爲最。詞云。風雨替花愁。風雨罷花也應休。勸君莫惜花前醉。今年花謝。明年花謝。白了人頭。乘興兩三颯。揀溪山好處追游。但教有酒身無事。有花也好。無花也好。選甚春秋。

折元禮字安上。世爲麟撫經略使。父定遠。僑居於忻。遂古籍焉。明昌五年兩科擢第。學問該博。爲

文有法度。仕至延安侍中。死於葭州之難。中州樂府列其望海潮一闋。題爲從軍舟中作。詞云。地雄河  
岳。疆分韓晉。潼關高壓秦頭。山倚斷霞。江吞絕壁。野烟縈帶滄洲。虎旆擁貔貅。看陣雲截岸。霜氣橫秋。  
千雉嚴城。五更殘角。月如鉤。西風曉入貂裘。恨儒冠誤我。卻羨兜鍪。六郡少年。三明老將。賀蘭烽火  
新收。天外岳連樓。想斷雲橫曉。誰識歸舟。剩着黃金換酒。羯鼓醉涼州。讀此可知邊城月夜清肅光景。  
王特起仕履見前。詞工長調。極細膩熨貼。與南宋史邦卿如驥之斬。其喜遷鶯別內云。東樓歡宴。  
記遺簪綺席。題詩紈扇。月枕雙欹。雲窗同夢。相伴小花深院。舊懽頓成陳迹。翻作一番新怨。素秋晚。聽  
陽關三疊。一尊相餞。留戀情繾綣。紅淚洗妝。雨識梨花面。雁底關河。馬頭星月。西去一程程遠。但願  
此心如舊。天也不違人願。再相見。把生涯分付。藥爐經卷。評者謂此詞纏綿悽惻。令人不能爲懷。

李俊民仕履見前。金亡後。隱遁不出。其詞與詩文並傳。今錄兩闋於下。一謁金門寄梅云。開未徹。  
先把一枝偷折。看取黃昏今後別。暗香浮動月。誰爲尋芳時節。誤了前村踏雪。爲問花間能賦客。如  
何心似鐵。二感皇恩出京門有感云。忍淚出門來。楊花如雪。惆悵天涯又離別。碧雲西畔。舉目亂山重  
疊。據鞍歸去也。情淒切。一日三秋。寸腸千結。敢向青天問明月。算應無恨。安用暫圓還缺。願人長似

月圓時節。

元好問仕履見前。張炎評其詞。謂深於用事。精於鍊句。其風流蘊藉處。不減周秦。其邁陂塘詠雁邱。叙云。太和五年乙丑歲。赴試并州。道逢捕雁者。云今日獲一雁。殺之矣。其脫網者悲鳴不能去。竟自投於地而死。余因買得之。葬之汾水之上。累石爲識。號曰雁邱。並作雁邱詞。問世間情是何物。直教生死相許。天南地北雙飛客。老翅幾回寒暑。歡樂趣。別離苦。就中更有癡兒女。君應有語。渺萬里層雲。千山暮雪。隻影向誰去。橫汾路。寂寞當年簫鼓。荒烟依舊平楚。招魂楚些何嗟及。山鬼暗啼風雨。天也。妒。未信與鶯兒燕子俱黃土。千秋萬古。爲留待騷人。狂歌痛飲。來訪雁邱處。可謂一往情深。含有無限悲感者也。

段克己及弟成己仕履俱見前。克己水調歌頭一闋。題爲癸卯八月十七日。逆旅平陽夜聞笛聲。有感而作。詞云。亂雲低薄暮。微雨洗清秋。涼蟾乍飛破鏡。倒影入南樓。水面金波灑灑。簾外玉繩低轉。河漢截天流。桂子墜無迹。爽氣集征裘。廣寒宮。在何處。可神游。一聲羌管誰弄。吹徹古梁州。月自與人無意。人被月明催老。今古共悠悠。壯志久寥落。不寐數更籌。成己滿江紅詞云。點檢花枝。風雨外雪

堆瓊瀛。春去也。朱絲絃斷。鸞膠難續。眼底光陰原可惜。舊游回首尋無迹。對青山一晌倚枯藤。灘聲急。人已老。身猶客。在邇歸猶隔。縱語音如舊。形容非昔芳。草綠隨意綠。平波渺渺傷心碧。到愁來惟覺酒杯寬。人間窄。蓋寓身世之感者也。

白樸字仁甫。又字太素。號蘭谷。渾州人。父貢。仕金爲樞密判官。以事遠適。將樸鞠養於元。好問。元白爲中州世契。兩家子弟。每舉長慶故事。以詩文相往來。樸爲貢之仲子。於好問爲通家姪。甫七歲。遭壬辰之難。明年春。京城變。好問遂挈以北渡。讀書穎悟異常兒。日親炙於好問父子。卜築於涇陽。律賦爲專門之學。而樸有能聲。號後進之翹楚。好問每過之。必問爲學次第。常贈之詩曰。元白通家舊。諸郎獨汝賢。未幾。生長見聞。學問博覽。然自幼經喪亂。蒼皇失母。便有山川滿目之歎。逃亡國。恆鬱鬱不樂。以故放浪形骸。期於適意。元中統初。丞相史天澤將薦之於朝。再三遜謝。後僑寓金陵以終。平生留意於長短句。清雋婉逸。意愴韻諧。可與張炎相匹。惟以製曲掩其詞名。今天籟集尙行於世。

按清定四庫全書提要。列天籟集於金人著作中。以其入元不仕。有晉陶淵明遺風。列入金人。從其志也。

#### (四)曲家

曲盛於元。實創於金。以院本著名。院本者明寧獻王以爲行院之本也。顧不知行院一語作何解。後讀王國維宋元戲曲史。引元刊張替殺妻雜劇云。你是良人良人宅眷。不是小末小末行院。則行院者大抵金元倡伎所居。其所演唱之本。即謂之院本云爾。其名見於陶九成輟耕錄者。有六百九十九種之多。惜在今日無一存留。莫能窺其本末。然就詞曲調內之諸牌名證之。如似娘兒歸塞北門鵝鶴鴉鵠兒等。今並列北曲譜中。其爲金人所創無疑。且金時董解元之西廂。奉爲北曲之祖。至今無異議。而號爲元曲四大家。半皆金末遺民。欲不謂之創始。其可得乎。

董解元名字爵里無考。據輟耕錄定爲金章宗時人。其稱解元。非科舉中之解元。實爲金元士子之普通稱謂。(詳描著元劇研究)例如小說中富人之稱員外。妻之稱安人。概爲一時之方言。其記張君瑞與崔鶯鶯事。譜入弦管。當時謂之獨彈詞。後人遂稱之曰弦索西廂。明胡應麟少室山房筆叢云。董曲今尚行世。精工巧麗。備極才情。而字字本色。言言古意。當是古今傳奇鼻祖。金人一代文献盡之矣。清施國祁禮耕堂雜說云。董西廂分上下二卷。無齣名關目。行間全載宮調引子。尾聲率填樂府

方言。不採類書故實。曲多白少。不注工尺。時論其品如朱汗碧蹄。神采駿逸。此又涵虛子（寧獻王之別號）評目所未及。董西廂文由以上二說證之。其價值可知矣。至撋彈詞之體。尙未說明。今爲之詳述焉。夫撋彈詞之體格。與評話彈詞相類。由一人彈唱。一切動作。概自其口中說出。通體是旁人敘述口氣。不似元劇之扮演登場。代人言語。作爲種種之角色者也。且其套數極短。往往一二曲後。卽用尾聲。尾聲之後。別聯他曲。其長者亦不過五六支而止。又每曲之上下疊。皆用全調整齊書。一蓋從頭至尾成一篇之大文章也。茲錄其長亭送別一段。俾知其采當時方言。而作爲絕妙之文字也。莫道男兒心如鐵。君不見滿川紅葉。盡是離人眼中血。且休上馬。苦無多淚。與君垂。此際情緒。你爭知。馬兒發程。坐車兒歸舍。馬兒往西行。坐車兒往東拽。兩口兒一步兒離得遠如一步也。我郎休怪強牽衣。問你西行幾日歸。著路裏小心呵。且須在意。省可裏晚眠早起。冷茶飯莫吃好將息。我專倚門兒專望你。驢鞭半裹。吟肩雙聳。休問離愁輕重。向個馬兒上駝也。駝不動。帝里酒醕花濃。萬般景媚。休取次。共別人便學連理。少飲酒。省游戲。記奴言語。必登高第。妾守空閨。把門兒緊閉。不拈絲管。罷了梳洗。你咱自必把普書頻寄。一個止不定長吁。一個頓不開眉黛。兩邊的心緒。一樣的情懷。

白樸事實見前。涵虛子評其詞如鵬搏九霄。又謂風骨磊塊。詞源滂沛。若大鵬之起北溟。奮翼凌乎九霄。有一舉萬里之志。宜冠於首。元鍾嗣成錄鬼簿載其所作雜劇有十七種。今存者爲梧桐雨牆頭馬上兩種。茲錄其小令四支。題爲知幾。（陽春曲）知榮知辱牢緘口。誰是誰非暗點頭。詩書叢裏且淹留。閑袖手。貧煞也風流。今朝有酒今朝醉。且盡樽前有限杯。回頭滄海又塵飛。日月疾白髮故人稀。不因酒困因人困。常被吟魂惱醉魂。四時風月一閒身。無用人。詩酒樂天眞。張良辭漢全身計。范蠡歸湖遠害機。樂山樂色總相宜。君細推今古幾人知。

關漢卿名失攷。號已齋叟。大都人。金末爲太醫院尹。金亡不仕。以曲自娛。所撰雜劇錄鬼簿列有六十三種之多。今存者爲西蜀夢。拜月亭。謝天香。金線池。望江亭。救風塵。單刀會。玉鏡臺。詐妮子。蝴蝶夢。賣娥怨。魯齋郎。續西廂。共十三種。玄虛子評其詞如瓊筵醉月。又謂觀其詞語。乃可上可下之才。蓋所以取者。初爲雜劇之故。卓以前列。茲錄其散套閨怨。（北仙呂翠裙腰）曉來雨過。山橫秀野。水漲汀洲。闌干倚遍空回首。下危樓。一天風物暮傷秋。（六么遍）乍涼時候。西風透碧梧。脫葉餘暑。纔收。香生鳳口。簾垂玉鉤。小院深閉。晴晝清幽。聽聲聲鵠噪柳梢頭。（寄生草）爲甚憂。爲甚愁。爲蕭郎一

去經今久。玉臺寶檻生塵垢。綠窗冷落閑針繡。豈知人玉腕銚兒鬆。豈知人兩葉眉兒皺。（上京馬）他何處共誰人攜手。小閣銀瓶殢歌酒。況忘了咒。不記得低低擣。（後庭花煞）掩袖暗含羞。開尊越釀愁悶。把苔牆畫備將錦字收。最風流真眞恩愛。等閑分付等閑休。關之夫人亦嫋吟詠。關悅其媵婢。欲納之。作小令以貽夫人云。鬢鴉臉霞。屈殺了將陪嫁。規模全似大人家。不在紅娘下。巧笑迎人。文談回話。真如解語花。若咱得他。倒了蒲桃架。夫人答以詩云。聞君偷看美人圖。不似關王大丈夫。金屋若將阿嬌貯。爲君唱倒醋葫蘆。關見之。付之一嘆。關好談鬼怪。著有鬼董行世。

按白樸關漢卿二人。自來談曲者皆置諸元四家中。茲以其爲金之遺民。援元好問例。入於此編。

## 三 元

元氏本造家於朔漠。以殺戮爲耕作。逐水草而居處。初無文學之可言。迨至太祖成吉思汗聚會斡難河之上。方尊位號。始定教條。既近取乃蠻。復遠攻回紇。渡黃河以蹴西夏。踰居庸以瞰中原。太宗繼之。而滅金源。於是金之文士悉爲元有矣。世祖承之。而訖宋籬。於是宋之文士悉爲元有矣。當其未入塞時。沿用元吳所造之畏吾字。謂之衛兀。中統時。八思巴作蒙古字千餘。其母四十有一。今所傳之元祕史。及金石書中所載琳宮梵宇中之聖旨碑。原本皆此等文字。譯爲漢文。俚俗堪嗤。然草昧之際。則然。泊乎大業告成。並不以此取士。太宗始得中原。輒用耶律楚材言。以科舉選士。世祖既定天下。王鵠獻計。許衡立法。事未果行。至仁宗延祐間。始斟酌舊制而行之。取士以德行爲本。試藝以經術爲先。士褒然舉首。應上所求者。皆彬彬輩出矣。趙郡蘇天爵曰。國家平定中原。士踵金宋餘習。率皆蘿豪襄茶。涿郡盧摯始以清新飄逸爲之倡。延祐以來。則有蜀郡虞公浚儀馬公。以雅正之音鳴於時。士皆轉相慕效。而文章之習。今獨爲盛焉。虞文靖公序傅與礪詩曰。國初中州襲趙禮部元裕之遺風。宗尚

眉山之體。至涿州盧公處道稍變其法。始以詩名東南。宋季衰陋之氣亦已銷盡。大德中。文章輩出。赫然鳴其治平者。則浦城楊仲弘。江右范德機其人也。其後馬伯庸。中丞用意深刻。思致高遠。亦自成一家。進士薩天錫者。最長於情。流麗清婉。作者皆愛之。而德機里人傅君與礪詩。其風韻足以追前所道諸君。二公皆一代名家。其言足爲定評。惟文章一道。不出駢散二途。歷代風會雖殊。而體格不甚相遠。至於有韻之作。則體格每隨聲律而轉變。樂府古詩變而爲唐之五七言律詩。自五代至宋。詩又變而爲詞。自宋至元。詞又變而爲曲。文人學士往往以是擅長。如關漢卿。馬致遠。鄭德輝。宮大用之類。皆藉以知名於世。其抒情寫景。時能得樂府之遺。而於雜劇尤可考見當時社會之情狀。至足耐人研討。是又奇渥溫氏一朝之特色已。

### (一) 文家

昔歐陽元功嘗謂中統至元之文龐而蔚。元貞大德之文暢而腴。至大延祐之文麗而貞。泰定天歷之文贍而雄。百餘年間。魁儒碩彥。相繼挺生。匠心所運。發爲詞華。蔚然自成一代文章之體。規矩淵源。歷歷可溯。自王元美創爲元無文章之說。耳食者遂信爲實。然於是視元人著作若敝屣。可勝歎哉。

予惟有元之文。分南北二宗。北宗以元裕之爲圭臬。輔之者爲郝伯常。楊煥然。其接武而興者。則有劉夢吉。王仲謀。姚端甫。馬伯庸。盧處道。許可用。南宗又分兩派。在江右者。倡於吳幼清。而其後虞伯生。揭曼碩。歐陽元。功卓然爲大家。浙東之在鄞者。戴帥初。任叔實。袁伯常。在婺者。則有許益之。吳立夫。黃晉卿。柳道傳。吳正傳。泊夫。未造。北學久衰。江右之人才亦不振。惟浙東一派。英賢輩出。鬱爲後勁。有若李季和。陳子上。戴叔能。楊廉夫。陳敬初。若而人。亦云盛矣。其文或蒼茫渾灑。或渟泓演迤。或崛強可喜。或瀟灑不羣。上足以嗣響唐宋。下亦無慚於有明。羅而列之。元美誣詞。不攻自破矣。

郝經字伯常。陵川人。官至翰林侍讀學士。贈昭文館大學士。榮祿大夫。追封冀國公。謚文忠。著有陵川集。經以中統元年使宋。爲賈似道所拘。留儀真者十六年。其大節炳耀古今。而學問文章。亦具有根柢。如太極先天諸圖說。辨微論數十節。及論學諸書。皆深切著明。洞見闡奧。周易春秋諸傳。於經術尤深。故其文雅健雄深。無宋末膚廓之習。與其師元好問可以雁行。不但以忠義著也。

姚樞字公茂。號雪齋。營州柳城人。後遷洛陽。少篤於學。自期甚高。歲壬辰。中書楊惟中。與偕覲元太宗。爲燕京行臺郎中。未幾辭去。中統元年。拜東平宣撫使。歷官中書左丞。昭文館大學士。翰林學士。

承旨。卒贈榮祿大夫。少師。封魯國公。謚文獻。著有雪齋集。初公茂與惟中從太子闢出南征。軍中得名儒趙復。始得程朱之書。後棄官居衛州。自板諸經。散之四方。時河內許衡。平仲。廣平賓默。漢卿並在衛。三人互相講習。而北方之學者。始聞進學之序焉。許有壬曰。宋金之際。兵燹頻仍。版帙散亡殆盡。文獻公獨首唱經學。闡明斯道。厥後名儒接踵而出。氣運昌隆。文章爾雅。推迴瀾障川之功。論者謂公之功不在禹下云。

戴表元字帥初。一字曾伯。慶元奉化人。宋咸淳中。登進士乙科。元大德中。以薦除信州教授。調婺州。移疾歸。再以修撰博士薦。不起。終於家。著有剡源集。表元少從王應麟。舒岳祥遊。學問淵源。具有授受。宋季文章。氣委爾而詞飁骫。帥初慨然以振起斯文爲己任。其學博而肆。其文清深雅潔。化朽腐爲神奇。間事摹畫。而隅角不露。尤自祕重。不妄許與。至元大德間。東南之士。以文章大家名重一時。帥初一人而已。

陸文圭字子方。江陰人。幼而穎悟。博通經史。及天文地理。律象醫藥算數之學。宋咸淳初。以春秋中鄉選。延祐設科。再中鄉舉。以老疾不應徵召。卒於家。著有牆東類稿。史稱文圭之文。融會經傳。縱橫

變化。莫測其涯涘。東南學者皆宗師之。細核所作。史言非過譽也。

劉訛字桂翁。廬陵人。生於宋末。猶及見諸遺老。得其緒論。迨延祐復科舉後。益肆力於名物度數。訓詁箋註之學。既十年不第。乃刻意於詩古文。江南行御史臺屢以教官館職遺逸薦。皆不報。至正十年卒。著有桂隱集。歐陽玄謂其文根柢六經。屬駿子史。躡轍百家。渟滀演迤。資深取宏。渠鏗哲匠。達於宗工。液古融今。自執其轎。應慮不惑。靡施弗宜。雖未嘗露其雋傑廉悍。踔厲風發之狀。韞玉在櫝。氣如白虹。不可掩抑。又謂其文溫柔敦厚似歐。明辨雄雋似蘇。至論其妙。非相師非不相師。蓋深得訛之用意者也。

鄧文原字善之。一字匪石。絳州人。隨其父流寓錢塘。宋末應浙西轉運司試。中魁選。至元間。行中書省辟爲杭州路儒學正官。至集賢直學士。兼國子監祭酒。致仕。致和元年卒於家。謚文肅。文原學有本原。所作皆溫醇典雅。當大德延祐之世。獨以詞林耆舊。主持風氣。袁桷貢奎左右之。操觚之士。響附景從。元之文章。於是時爲極盛。文原實有獨導之功。所著有內制集。素履齋稿。今並未見傳本。僅傳巴

### 西文集一卷。

任士林字叔實。號松鄉。奉化人。六歲能屬文。諸子百家靡不周覽。鄉子弟多從之學。至大初中書左丞郝天挺薦授安定書院山長。俄而得嘔疾。卒於杭之客舍。著有松鄉集十卷。趙文敏公曰。叔實之文沈厚正大。不作瘦語。棘人喉舌。而含蓄頓挫。使人讀之而有餘味。明祭酒胡儼曰。其文篤實而宏博。深厚而舒齊。鏘然而金石奏。燦然而琅玕呈。蓋卓乎有道之言也。

趙孟頫字子昂。宋太祖之後。以秀王伯圭賜第湖州。故爲湖州人。年十四。以父蔭入仕。宋亡家居。會程鉅夫訪遺逸於江南。以孟頫入見。卽授兵部郎中。累官翰林學士承旨。卒。追封魏國公。謚文敏。著有松雪齋集。孟頫以宋朝皇族。改節仕元。故不諧於物論。然論其才藝。則風流文采。冠絕當時。不但翰墨爲元代第一。卽其文章。亦揖讓於虞楊范揭之間。不甚出其後也。

吳澄字幼清。號草廬。崇仁人。宋咸淳末舉進士不第。入元。以薦擢翰林應奉文字官。至翰林學士。卒。謚文正。著文集百卷。幼清爲元代大儒。與許文正公衡並稱。號爲南吳北許。而幼清闡經鑄文。則過許遠甚。其爲文指要。見於別趙子昂序。謂文者氣之爲也。人之氣與天地之氣流通爲一。氣有升降。而文隨之。必有豪傑之士出其間。養之異。學之到。足以變化其氣。其文乃不與世而俱。今又言理到氣昌。

意精詞達。如星燦雲爛。如風行水流。文之上也。初不待倔強其言。蹇濶其句。怪僻其字。隱晦其意。而後爲工且奇。故其爲文。一遵唐宋諸公遺矩。而實不名一格。良由胸中充實。不可以已。如溥博淵泉。隨地湧出。任其所至。而混混自如。孟子所謂居安資深。則取之左右逢其原者也。

楊兌字煥然。又名知章。乾州奉天人。生於金世宗大定二十六年。凡秋試四中選。而春試輒不第。入元。以耶律楚材薦。授河南路徵收課稅所長官。兼廉訪使。越十年致仕歸。著有還山集。兌詩文皆光明俊偉。有中原文獻之遺。其汴故宮記。述北宋大內遺迹。與姚公茂書。論朱子家禮神主之式。舉所見唐杜衍家廟。及汴京宋太廟爲證。東遊記。述孔林古迹尤悉。皆可以備文獻之徵也。

劉因字夢吉。號靜修。容城人。世祖至元十九年徵授承德郎。右贊善大夫。未幾辭歸。再以集賢學士徵。不起。著有靜修集。因篤信朱子。與許衡同。而其文遒健排奡。迥在衡上。張綸林泉隨筆曰。夢吉文章。動循法度。春容有餘味。如田孝子碑。桐川圖記等作。皆正大光明。較文士之氣象不侔。由其學養功深也。

王惲字仲謀。衛州汲縣人。中統元年由詳議官授中書省詳定官。官至翰林學士。諡文定。著有秋

潤集。惲文章源出元好問。故其波瀾意度。皆不失前人矩矱。詩篇筆力堅渾。亦能嗣響其師。論事諸作。有關時政者。尤爲疏暢詳明。瞭如指掌。史稱惲有才幹。殆非虛語。不止詞藻之工也。

姚燧字端甫。號牧庵。河南人。姚樞之從子也。初以薦爲秦王府文學。歷官至翰林學士承旨。集賢大學士。謚曰文。著有牧庵集。張養浩作是集序。稱其才驅氣駕。縱橫開合。紀律惟意。如古勁將率市人戰。鼓行六合。無敵不北。柳貫作燧謚議。稱其典冊之雅奧。詔令之深醇。抉去浮靡。一返古轍。而誌銘咸頤雄偉光潔。家傳人誦。莫得而掩。宋濂撰元史。稱其文閑肆該洽。豪而不宕。剛而不厲。脊容盛大。有西漢風。黃宗羲選明文案。其序亦云。唐之韓柳。宋之歐曾。金之元好問。元之虞集。姚燧。其文皆非有明一代作者所能及。則名家論定。其語若合符節。燧之文品。亦可概見矣。

程鉅夫初名文海。以字行。建昌人。少與吳澄同學。宋亡後。從季父飛卿入元。遂留宿衛。改授應奉翰林文字。累官翰林學士承旨。追封楚國公。謚文憲。著有雪樓集。鉅夫宏才博學。被遇四朝。忠亮鯁直。爲時名臣。文章亦脊容大雅。有北宋館閣餘風。蘇天爵文類錄其文十餘篇。大抵皆詔誥碑版。紀功銘德之作。明太祖嘗詔取其文入祕閣。蓋數十年後。雖隔異代。猶重爲著作典型云。

袁桷字伯長。慶元人。宋知樞密院事韶之曾孫。少爲麗澤書院山長。以薦改翰林國史院檢閱官。累遷侍講學士。卒贈江浙行省參知政事。追封陳留郡公。謚文清。著有清容居士集。伯長少從戴表元王應麟舒岳祥諸遺老遊。學問淵源。具有所自。其在朝踐歷清華。再入集賢。八登翰苑。凡朝廷制冊。助臣碑版。多出其手。故其文章博碩偉麗。有盛世之音。尤練習掌故。長於考據。集中議郊祀諸篇。援引經訓。原原本本。當時以其精博。並采用之。蓋伯長本舊家文獻之遺。又當大德延祐之間。爲元治極盛之際。故其著作宏富。氣象光昌。蔚爲承平雅頌之聲。文采風流。遂爲虞楊范揭等先路之導。其承前啓後。稱一代文章之鉅公。良無愧矣。

馬祖常字伯庸。世爲雍古部人。居靖州之天山。高祖錫里濟蘇。金末爲鳳翔兵馬判官。子孫用以官爲氏之例。遂稱馬氏。延祐中。初復科舉。祖常鄉貢會試皆第一。廷試第二。授應奉翰林文字。擢監察御史。累遷禮部尚書。尋參議中書省事。元統初。拜御史中丞。轉樞密副使。乞歸。至正四年卒。謚文貞。著有石田集。其文精贍鴻麗。一洗柔靡卑冗之習。大德延祐以後。爲元文之極盛。而主持風氣。則祖常等數人爲之巨擘云。

虞集字伯生。蜀郡人。宋丞相允文五世孫。父汲。僑寓臨川之崇仁。大德初。薦授大都路儒學教授。官至翰林直學士。兼國子祭酒。奎章閣侍書學士。卒謚文靖。著有道園學古錄。文章至南宋之末。道學一派。侈談心性。江湖一派。矯語山林。庸沓猥瑣。古法蕩然。理極數窮。無往不復。有元一代。作者雲興。大德延祐以還。尤爲極盛。而詞壇宿老。要必以集爲大宗。迹其陶鑄羣材。不減廬陵之於北宋。嗚呼。盛矣。

揭傒斯字曼碩。龍興富州人。延祐初。以薦授國史院編修官。應奉翰林文字。遷國子助教。告歸。復召還。天歷初。開奎章閣。首擢爲授經郎。與修經世大典。累官翰林侍講學士。總修遼金宋三史。卒於官。追封豫章郡公。謚文安。有集十四卷。傒斯與虞集范檉楊載齊名。其文章敍事嚴整。語簡而當。凡朝廷大典冊。及碑版之文。多出其手。一時推爲鉅製。楊維楨謂曼碩文章。居虞之次。如歐之有蘇曾。此平心之論也。

許謙字益之。金華人。延祐中。以講學名一時。儒者所稱白雲先生是也。著有白雲集。益之初從金履祥遊。講明朱子之學。不甚留意於詞藻。然其詩理趣之中。頗含興象。五言古體尤諳雅音。非擊壤集一派。惟涉理路者比。文亦醇古。無宋人語錄之氣。蓋講學家之兼擅文章者也。

閻復字子靖。其先平陽和州人。徙居高唐。復始生。有奇光照室。性簡重。美丰儀。七歲讀書。穎悟絕人。至元八年。薦爲翰林應奉官。至翰林學士承旨。遙授平章政事。乞骸骨卒。謚文康。著有靜軒集。復在翰林最久。以文學自任。不肯爲執政官。上亦嘉其謙退。宜其文氣春和融粹。絕去町畦。卓然爲一代大宗矣。

元明善字復初。大名清河人。其先蓋拓跋魏之裔。復初天資穎悟絕出。讀書過目輒記。諸經皆有師法。而尤深於春秋。官至翰林學士。至治二年。卒於位。泰定間。贈資善大夫。河南行省左丞。進封清河郡公。謚曰文敏。有文集行世。復初早以文章自豪。晚益精詣。吳伯清稱其文脫去時流畦逕。而進古作者之道。虞伯生謂其發揚蹈厲。藐視秦漢。馬伯庸亦謂公文刻而不見其迹。新而必自己出。蔚乎其華敷鑄乎其古聲。倡古學於當代。爲一代之文宗者。柳城姚燧暨公而已。其爲名流所推重如此。

吳萊字立夫。浦陽人。延祐中。復科舉之制。以春秋貢於鄉。試禮部不第。後以薦署饒州路長鄉書院山長。未行而卒。年僅四十四。其門人金華宋濂等。私謚爲淵穎先生。編其集爲十二卷。萊與黃溍柳貫並受業於宋方鳳。再傳而爲宋濂。遂開明代文章之派。故年不登中壽。身未試一官。而在元人中屹

然負詞宗之目。與潛貫相埒。黃潛稱其文蘋絕雄深。類秦漢間人。未免溢量。胡助謂他人患其淺陋。而萊獨患其宏博。斯爲篤論矣。

黃潛字晉卿。金華人。延祐二年。賜同進士出身。歷官翰林侍講學士。中奉大夫。知制誥。同修國史。同知經筵事。謚文獻。著有日損齋稿。其文原本經術。應繩引墨。動中法度。學者承其指授。多所成就。宋濂王禕皆嘗受業焉。

歐陽玄字原功。瀏陽人。延祐乙卯。以鄉貢首薦。登進士第。官至翰林學士承旨。謚曰文。著有圭齋集。玄平生三仕成均。兩爲祭酒。六入翰林。三拜承旨。凡朝廷高文典冊。多出其手。孔齊至正直記曰。歐陽玄作文。必詢其實事而書。未嘗代世俗誇誕。時人謂文法不及虞集。揭傒斯。黃潛。而事實不妄則過之。然宋濂稱其文如雷電恍惚。雨雹交下。可怖可愕。及乎雲散雨止。長空萬里。一碧如洗。實亦未減於三人也。

柳貫字道傳。浦江人。大德四年。薦爲江山縣教諭。延祐四年。授湖廣儒學副提舉。六年。改國子助教。至治元年。遷博士。泰定元年。遷太常博士。三年。出爲江西儒學提舉。至正元年。擢翰林待制。兼國史

院編修官卒。有集二十卷。貫雖受經於金履祥。其文章軌度。則出於方鳳謝翹吳思齊方回龔開仇遠戴表元胡長孺。其史學及掌故舊聞。則出於牟應龍。其見宋濂所作行狀中。學問淵源。悉有所受。故其文章原本經術。精湛闊肆。與金華黃溍不相上下。

許有壬字可用。湯陰人。延祐二年進士。歷官集賢大學士。中書左丞。兼太子左諭德。致仕。卒謚文忠。著有至正集。有壬立朝五十年。三入政府。於國家大事。侃侃不阿。多有可紀。文章亦雄渾闊肆。饜切事理。不爲空言。稱元代館閣鉅手。

吳師道字正傳。蘭谿人。至治元年進士。仕至國子博士。致仕後。授禮部郎中。有集二十卷。師道少與許謙同師金履祥。又與黃溍柳貫吳萊往來倡和。故爲文具有法度。多闡明義理。排斥釋老。能篤守師傳。

陳旅字衆仲。莆田人。以薦爲閩海儒學官。中丞馬祖常奇之。與遊京師。又爲虞集知平章事趙世延引爲國子助教。又出爲浙江儒學提舉。又召入爲應奉翰林文字。至元元年。遷國子監丞。越二年。卒於官。著有安雅堂集。史稱其文典雅峻潔。必求合於古作者。不徒以徇世好。又稱虞集見所作。有我

老將休。付子斯文之語。張翥序亦稱天歷至順間。學士虞公以文章擅四方。其許與君特厚。君亦得相與薰撾。而法度相密。蓋紀實也。

蘇天爵字伯脩。真定人。延祐四年。馬祖常以御史監試國子員拔置第一。釋褐授大都路薊州判官。歷官至江浙行省參知政事。大都路總管。兩浙都轉運使。至正十二年。淮右江東盜起。仍命參政江淮行省。總兵於饒信。卒於軍中。著有滋溪集。天爵少從學於安熙。然熙詩文粗野不入格。天爵乃詞華淹雅。根柢深厚。蔚然稱元代作者。其波瀾意度。往往出入於歐蘇。突過其師遠甚。甚至其序事之作。詳明典核。尤有法度。集中碑版百餘篇。於元代制度人物。史傳闕略者。多可藉以考見。元史本傳稱其身任一代文獻之寄。非溢美也。

鄭元祐字明德。至正丁酉。除平江路儒學教授。移疾去。後七年。復擢浙江儒學提舉。卒於官。本途昌人。其父希遠徙錢塘。元祐又流寓平江。故其集以僑吳名。其文頗疎宕有奇氣。詩亦蒼古。蓋元祐生於至元之末。猶及見咸淳遺老。中間又得見虞集諸人。得其緒論。末年所與遊者。亦皆顧阿瑛倪瓈張雨之流。互相薰染。其氣韻不同。固亦有自來矣。

陳基字敬初。臨海人。至正中。以薦授經筵檢討。張士誠據吳。引爲學士。書檄多出其手。著有夷白齋稿。敬初受業黃潛之門。所作詩文。皆操縱馳騁。而自有雍容揖讓之度。能不失其師傳。

## (二) 詩家

飄流所始。同祖風騷。騷人以還。作者遞變。五言始於漢魏。而變極於唐。七言盛於唐。而變極於宋。迨於有元。其變已極。故由宋返於唐。而諸體備焉。其間名人志士。項背相望。抒芬鋪藻。各竭其才。上接唐宋之淵源。而後啓有明之文物。此元詩之所以不可廢也。論者謂元詩不如宋。其實不然。宋詩多沈儻。近少陵。元詩多輕揚。近太白。以晚唐論。則宋人學韓白爲多。元人學溫李爲多。要亦伯仲姪姒耳。間嘗瀏覽諸家。伯常煥然靜修。諸公導其先。虞楊范揭鳴其盛。鐵崖玉笥叔能元吉持其亂。渢渢乎亦具一代之音。詎可輕加貶詞哉。

耶律楚材字晉卿。遼東丹王突厥八世孫。金尙書右丞履之子也。生三歲而孤。比長博極羣書。旁通天文地理衍數。及釋老醫卜之說。貞祐初。辟左右司員外郎。從太祖平定四方。太宗時。官至中書令。至順元年。追封廣寧王。謚文正。著有湛然居士集。平水王鄰曰。中書湛然有天然之才。如寶鑑無塵。寒

冰絕駢。今觀其詩語皆本色。惟意所如。不以研鍊爲工。而大旨必歸於風教。鄰之所云。殆爲能得其真矣。

耶律鑄字成仲。楚材之子也。累官中書左丞相卒。追贈懿寧王。諡文忠。鑄少而聰敏。尤工騎射。從憲宗征伐。足迹涉歷多西北極遠之區。故其所著雙溪醉隱集中所述塞外地理典故。往往詳核。有裨於考證。又其家在金元之間。累世貴顯。諳習朝廷舊聞。如瓊林園龍和宮諸賦。敍述海陵章宗軼事。及宮室制度。多金史所未及。其他題詠。亦多關係燕都故實。足以資博識也。

方回字萬里。號虛谷。徽州歙縣人。宋景定壬戌別省登第。知嚴州。元兵至。迎降。即以爲建德路總管。尋罷。著有桐江集。回人品卑汚。其詩專主江西。生平宗旨。悉見所編瀛奎律髓中。雖不免以粗率生硬爲老境。而當其合作。實出宋末諸家上。更不能以人廢言矣。

黃庚字星甫。天台人。嘗客山陰王英孫家。試越中詩社枕易題。庚爲第一。蓋甚爲當時所推重。著有月屋漫稿。其詩體格雖不高。而觸處延賞。時逢警語。如五言之斜陽明晚浦。落葉瘦秋山。柳色獨青眼。梅花同素心。鳴榔丹葉聚。撒網浪花圓。諸句七言之鐘帶斜陽來遠寺。碑和春雨臥平蕪。細柳雨中

垂綠重。殘花風裏亂紅輕。清夜夢分千里月。故鄉人各一方天。皆風致婉約。具晚唐之一體。

劉訥仕履見前。其詩長於五言古體短篇。律詩亦多佳句。五言如山作登樓色。天留隔巷陰。雲分潭際樹。帆上驛邊洲。落日湖陰笛。涼風水郭秋。一燈遺老鬢。四海後元春。樹懸山雨白。門掩佛燈紅。七言如桃花浪起春風闊。燕子寒生社雨多。鳥斷空山孤樹悄。馬嘶小驛燈昏。江湖宦客孤舟夜。城郭詩翁白髮春。刺繡簾櫳鶯語倦。讀書院落絮飛忙。草意欲供新得句。桃花猶記舊來人。當時諸老宿許其詩。以爲高逼古人云。

吾邱衍字子行。錢塘人。竹素竹房貞白皆其號。隱居教授。至大三年。爲人所累。被攝得釋。不勝其恚。自投西湖死。其詩頗效李賀體。不能盡脫元人窠臼。然胸次既高。神韻自別。往往於町畦之外。逸致橫生。所謂王謝家子弟。雖不復端正者。亦奕奕有一種風氣也。

趙孟頫仕履見前。戴表元序其集。謂子昂古賦凌歷頓迅。在楚漢之間。古詩沈涵鮑謝。自餘諸作。猶傲睨高適李翹。又陶宗儀輟耕錄述虞伯生嘗以所作詣公。有句云。山連閣道晨留輦。野散周廬夜屬囊。公曰。美則美矣。若改山爲天。野爲星。則尤美。伯生深服之。觀此。則子昂詩學之深可知矣。

仇遠字仁近。一曰仁父。錢塘人。因居餘杭溪上之仇山。自號曰山村民。遠在宋咸淳間。卽以詩名。至元中。嘗爲溧陽教授。旋罷歸。漫游湖山以終。著有金淵集。遠在宋末。與白珽齊名。號曰仇白。厥後張翥張羽以詩鳴於元代者。皆出其門。他所與唱和者。周密趙孟頫吾邱衍鮮于樞方回黃溍馬臻。皆一時名士。故其詩格高雅。往往頡頏古人。無宋末粗獷之習。方鳳序述遠之言曰。近體吾主唐。古體吾主選。其宗法之正如此。

白珽字廷玉。錢塘人。入元薦授江浙儒學副提舉。有湛淵集。戴表元稱其賦銅浮漏一篇。尤清馴可念。詩甚似渡江陳去非。劉辰翁言其不爲雕刻苛碎。有雲山韶濩之音。

馬臻字志道。號虛中。錢塘道士。著有霞外詩集。仇遠序其集。稱其隱約西湖之濱。士大夫慕與之交。不過習清虛。談淡泊。無一言及勢力聲利。集中所作。皆神骨秀雋。風力遒上。琅琅有金石之音。無酸寒細碎。蟲吟草間之態。觀其述懷一詩。殆宋末遺老。寄託黃冠。而其豪邁俊逸之氣。無所不可。正不以枯寂恬淡爲高耳。

楊宏道字叔能。淄川人生。金之季。哀宗正大元年。嘗監麟遊酒稅。後又仕宋。以理宗端平元年爲

襄陽府學教諭。未久旋入於元。其後遂鮮所表見。著有小亨集。其詩在當日最爲有名。元好問序其集。謂金南渡後。學詩者惟辛敬之楊叔能以唐人爲指歸。又有贈宏道詩云。海內楊司戶。聲名三十年。又云。星斗龍門姓氏新。豈知書劍老風塵。其傾倒於宏道甚摯。同時若趙秉文楊雲翼見其詩。並稱歎不已。今觀所作。五言古詩得比興之體。時時近漢魏遺音。律詩風格高華。亦頗有唐調。雖不及好問之雄渾蒼堅。然就一時詩家而論。固不可謂非北方之巨擘也。

劉因仕履見前。林泉隨筆曰。夢吉之詩。古選不減陶柳。其歌行律詩。直溯盛唐。無一字作今人語。今考其論詩。有曰。魏晉而降。詩學日盛。曹劉陶謝其至者也。隋唐而降。詩學日變。變而得正。李杜韓其至者也。周宋而降。詩學日弱。弱而復強。歐蘇黃其至者也。云云。所見深悉源流。故其詩風格高邁。而比興深微。顯然升作者之堂。王漁洋作古詩選。於詩家流別品錄頗嚴。而七言詩中。獨錄其歌行爲一家。可謂豪傑之士矣。

劉將孫字尚友。廬陵人。辰翁之子。嘗爲延平教官。臨汀書院山長。著有養吾齋集。將孫濡染家學。頗習父風。其感遇諸作。皆效陳子昂張九齡。雖音節不同。而寄託深遠。時有名理。近體亦多佳句。

曹伯啓字士開。碭山人。至元中薦除冀州教授。天歷初官至陝西諸道行臺御史中丞。卒謚文正。著有漢泉漫稿。伯啓生於宋末元初。而家世江北。不染江湖末派。亦不沿豫章餘波。所作乃多近元祐格。春容嫋雅。淵淵乎和平之音。雖不能與虞楊范揭角立爭雄。而直抒胸臆。自諧宮徵。要不失爲中原雅調也。

陳孚字剛中。天台臨海人。歷官奉直大夫。台州路總管府治中。至元二十九年。世祖命梁曾以吏部尚書再使安南。孚以翰林國史院編修官。攝禮部郎中。爲副使。還擢翰林待制。仍兼國史院編修。著有觀光稿。交州稿。玉堂稿各一卷。觀光交州二稿。皆紀道路所經山川古迹。蓋仿范文正使北諸詩。而大致亦復相埒。玉堂稿多春容諧雅。淵淵乎治世之音。其上都紀行之作。與前二稿工力相敵。蓋摹繪風土。最所留意矣。

周權字衡之。號此山。處州人。嘗遊京師。以詩贊翰林學士袁桷。桷深重之。薦爲館職。竟報罷。然詩名日起。唱和日多。趙孟頫贈權詩。有青青雲外山。炯炯松下石。顧此山中人。風神照松色之句。且親寫此山二字。爲額以贈。有集四卷。陳旅序稱其簡淡和平。無鬱憤放傲之色。歐陽玄序稱其無險勁之詞。

而有深長之味。無輕靡之習。而有春容之風。皆知言也。

黃玠字伯成。慈谿人。宋黃震之曾孫。清苦力學。無所不通。周遊西湖。樂吳興山水。因卜居弁山。與趙文敏遊。文敏稱許之。著有卞山集。知非稿。其詩不爲近體。視宋末江湖諸人。惟從事五七言律者。志趣殊高中。多勸戒之詞。其上者得元結遺意。次者亦近乎白居易。雖宏闊深厚。不能及二人。要於俗音嘈囁之中。讀之如聽古鐘磬矣。

何中字太虛。一字養正。臨川人。至大初。攜所著書來京師。公卿列薦之。命未下而歸。至順二年。江西行省平章全岳柱聘爲宗濂東湖二書院山長。明年二月。以疾卒。著有知非堂稿。太虛藏書萬卷。手自校讎。其學宏深該博。程鉅夫。元明善。姚燧。揭傒斯。皆推服之。吳澄序其集曰。太虛少負逸才。弱冠已能詩。而亦用意於文。予於病中授集讀之。喜之不及。其傾倒如此。

賈至字仲章。宣城人。官集賢直學士。追封廣陵郡侯。諡文靖。李黼爲之狀。馬祖常奉勅撰碑。皆天下重望也。著有雲林集。仲章詩格在虞楊范揭之間。爲元人巨擘。王漁洋居易錄論其境地未能深造。殆專以神韻求之歟。

郭豫亨自號梅巖野人。里籍未詳。性愛梅花。見古今詩人梅花傑作。必隨手鈔錄。而歌詠之。暇日輒集真句。得百篇。目爲字字香。其中工妙之句。如不禁夜雨輕欺著。却怕春風漏洩香。春回積雪層冰裏。人倚閑庭小檻前。嵐氣欲飛山隔岸。生香不斷樹交花。動搖臘信隨征使。裁剪春風入小詩。定知深院黃昏後。多在青松白石間。家爲逆旅相逢處。人倚闌干欲暮時。雪後園林纔半樹。水邊風月笑橫枝。幾處酒旗山影下。一川風物笛聲中。白雪卻嫌春色晚。好風吹送暗香來。已成白髮潘常侍。自棄明時孟浩然。豫亨自謂句煅意煉。璧合珠聯。亦有天然之巧。非誇語也。

袁易字通甫。長洲人。不求仕進。部使者擬薦於朝。謝不應。行中書省署徽州路石洞書院山長。旋亦罷歸。居吳淞具區之間。築堂曰靜春。聚書萬卷。手自校定。易歿之後。其子泰編其集爲四卷。其詩吐言天拔。與陳與義爲近。有元作者。綺縟居多。易詩風骨遒上。固足以高步一時也。

馬祖常仕履見前。其詩才力富健。如都門壯遊諸作。長篇鉅製。迴薄奔騰。具有不受羈勒之氣。至元間。蘇天爵請於朝。刊行其集。而自爲之序。稱其接武隋唐。上追漢魏。後生爭效慕之。與會稽袁桷。蜀郡虞集。東平王構。更迭倡和。如金石相宣。而文益奇。其推之者至矣。

虞集仕履見前。輒耕錄載嘗有問於虞先生曰。楊仲宏詩何如。先生曰。仲宏詩如百戰健兒。范德機詩如何。曰。德機詩如唐臨晉帖。揭曼碩詩如何。曰。曼碩詩如美女簪花。先生詩如何。笑曰。集乃漢廷老吏。公論以爲然。清翁方綱石洲詩話曰。道園兼有六朝人醞藉。而全於含味。不露中出之。所以其境高不可及。又曰。伯生七律清深。自王荊公以後。無其匹敵。又曰。伯生七古。高妙深渾。所不待言。至其五古。於含蓄中吐藻韻。乃王龍標杜牧之以後所未見也。

楊載字仲宏。浦城人。後徙杭州。初以布衣薦。授翰林國史院編修官。調海船萬戶府照磨。會仁宗復行科舉之制。遂中延祐二年進士。授饒州路同知浮梁州事。終於寧國路總管府推官。有集八卷。元代詩人世推虞楊范揭。史稱其文章一以氣爲主。而於詩尤有法度。自其詩出。一洗宋季之陋云云。瞿宗吉歸田詩話曰。仲宏以宗陽宮翫月詩得名。然他作如風雨五更雞亂叫。江湖千里雁相呼。挾書萬里朝明主。仗劍三年別故鄉。窗間夜雨銷銀燭。城上春雲壓綠旗。空桑說法黃龍聽。貝葉繙經白馬馱。沈雄典實。先叔祖每稱之。長篇如古牆行梅梁歌。亦皆爲時所稱。

范椁字亨父。一字德機。清江人。以薦爲左衛教授。遷翰林院編修官。出爲嶺海廉訪使照磨。歷轉

江西湖東後選充翰林應奉。又改閩海道知事。移疾歸。天歷二年。授湖南嶺北道廉訪使。經歷。以母老未赴。明年母喪。竟以毀卒。有集七卷。揭傒斯序之曰。虞伯生稱德機如唐臨晉帖。終未逼真。予改評之。曰。范德機詩如秋空行雲。晴雷卷雨。縱橫變化。出入無朕。又如空山道者。辟穀學仙。瘦骨崚嶒。神氣自若。又如豪鷹掠野。獨鶴叫羣。四顧無人。一碧萬里。云云。其言雖務與虞反。未免形容過當。然德機詩格實高。其機杼亦多自運。未嘗規規刻劃古人。固未可以唐臨晉帖一語據爲定論矣。

揭傒斯仕履見前。其詩清麗婉轉。別饒風韻。與其文如出二手。然神骨秀削。寄託自深。非嫣紅姹紫。徒矜姿媚者可比。胡應麟詩藪謂元五言律可摘者。如曼碩之大舸中流下。青山兩岸移。鶴啼木郎廟。人祭水神祠等。皆有唐人遺響。

宋光字子虛。家於晉陵。以兵亂遷吳中。丞王西溪舉茂才。以奉親辭。著有翠寒集一卷。趙子昂稱其詩風流蘊藉。皆不經人道語。鄧中父云。其大篇如天孫織紝。雲經霧綺。自出機杼。小律則日光虹彩。渾然金璧。穠麗纈密而不豔。含鬱靜婉而不怨。其深於唐之變也。馮海粟與知最晚。一見其集。亟歎而鏗之。謂如承恩金馬詔。失意玉環詞。落月今誰弔。長庚夜自明。雖使太白復生。亦當爲子虛擊節。子虛

詩雅秀絕倫。宜爲當時名輩所推重也。

丁復字仲容。天台人。延祐初遊京師。與楊載范椁同被薦。而復辭不就。放情詩酒。浪迹江淮間。凡三徙居。晚乃僑寓於金陵之城北。著有檜亭集。復詩不事雕琢。而意趣超忽。自然俊逸。其才氣橫溢。魏文帝所謂筆墨之性。殆不可勝者。幾乎近之。

盧摯字處道。一字莘老。號疎齋。涿郡人。至元五年進士。博洽有文思。累遷少中大夫。河南路總管。大德初授集賢學士。大中大夫。出持憲湖南。遷江東道廉訪使。復入爲翰林學士。遷承旨卒。所著曰疎齋集。元初中州文獻。東人往往稱李閣徐。推能文辭有風致者。曰姚盧。蓋謂李謙受益。閣復子靖。徐琰子方。姚燧端父。及疎齋也。而推詩專家。必以劉因靜修及疎齋爲首。疎齋嘗著文章宗旨云。大凡作詩須用三百篇與離騷。言不關於世教。義不存於比興。詩亦徒作。觀其言可以知其詩矣。

吳萊仕履見前。宋景濂稱其賦詠捷如風雨。一日於故人家見几上堆剝紙數十番。戲爲長歌。頃刻而盡。屬對嚴巧。文采縟麗。觀者驚以爲神。王士禎論詩絕句有曰。鐵崖樂府氣淋漓。淵穎歌行格儘奇。耳食紛紛說開寶。幾人眼見宋元詩。而其所選七言古詩。乃錄萊而不錄維楨。蓋維楨爲詞人之詩。

萊則詩人之詩。恃氣縱橫。與覃思治鍊。門戶固殊。士楨論詩絕句。作於任揚州推官時。而古詩選一書。則其後來所定。所見尤深也。

陳泰字志同。別號所安。長沙茶陵人。延祐二年進士。除龍泉縣主簿。栖遲薄宦。惟以吟詠自適。竟終於是官。其曾孫朴編其遺稿爲一卷。翁方綱石洲詩話云。志同歌行。如趙子昂畫馬歌。朔方歌。萬里行諸篇。嶽騎磊落。在元人諸名家中。卓然有風骨。不徒以金粉競麗者。昔漁洋先生從人借宋元人詩集數十種。獨手鈔所安遺稿一卷。良是具眼。又先生居易錄云。志同歌行。馳騁筆力。有太白之風。在元人中。當居道園之下。諸公之上。而名不甚著。豈以名位卑耶。

吳師道仕履見前。其詩風骨遒上。意境亦深。襯然升作者之堂。胡應麟詩藪云。正傳五言古。清新皎拔。一洗議論纖靡之習。七言古最長。十臺懷古詩。氣骨鏗鏘。時咸贍矣。其他句如大水云。三月寒愁百里陰。大湖浪激三州白。觀潮云。浙江亭遠亂帆飛。西興渡暝千花溼。秋山圖云。千年絕巒渙谷子。身在太行秋色裏。萬里雲飛木落時。遙寫闌干半空起。長篇如南城紀遊。修河道中等作。老筆縱橫。殊得工部叙事體。五言律如長天孤鳥沒。落日大江深。水夾徐邳去。河兼汴泗來。飛雲浮晝棟。旭日麗高牙。

懸空飛萬瀑。拔地立千峯。落花繁劍佩。高柳映帆檣。皆整麗有格。

宋駿字顯夫。大都人。泰定元年進士。歷官翰林直學士。兼經筵講官。謚文清。著有燕石集。歐陽原功謂其詩務去陳言。雖大隄之謠。出塞之曲。時或馳騁乎江文通劉越石之間。而燕人凌雲不羈之氣。慷慨赴節之音。一轉而爲清新秀偉之作。齊魯老生不能及也。蘇伯修亦謂其詩清新飄逸。間出奇古。若盧仝李賀之流。益喜其詞以模擬之。危太樸曰。公之於詩。精深幽麗。而長於諷諭。用成一家之言。顯夫之詩。於諸公之評盡之矣。

黃鎮成字元鎮。邵武人。以薦授江南儒學提舉。未上而卒。著有秋聲集。其詩邊幅稍狹。氣味稍薄。蓋限於才弱之故。然近體出以雅潔。古體出以清省。亦復善用其短。故格韻楚楚。頗得錢郎遺意。較元代纖穠之體。固超然塵埃之外也。

薩都刺字天錫。別號直齋。本答失蠻氏。祖父以勳留鎮雲代。遂爲雁門人。弱冠登泰定丁卯進士第。應奉翰林文字。出爲燕南經歷。擢御史於南臺。以彈劾權貴。左遷鎮江錄事。歷閩海廉訪使知事。進河北廉訪經歷。著有雁門集。于文傳序其詩曰。其豪放若天風海濤。魚龍出沒。險勁如泰華雲開。蒼翠

孤聳。其剛健清麗。則如淮陰出師。百戰不折。而洛神凌波。春花晝月之嬾娟也。明張習書其集後曰。元詩之盛。倡自遺山。而趙子昂袁伯長輩附和之。繼而虞楊范揭者。出號爲大家。天錫之詩。清而不佻麗。而不縟。真能於袁趙虞楊之外。別開生面者也。

傅若金字與礪。新喻人家。貧力學。爲同郡范樟所知。得其詩法。以布衣至京師。數日之間。詞章傳誦。名勝之士。莫不倒屣而迎。以爲上客。虞集宋駿以異材薦之。佐使安南。歸除廣州文學教授。卒有集二十卷。揭傒斯云。余每讀與礪詩。風格不殊。神情俱詣。如復見范德機也。德機七言歌行勝。與礪五言古律勝。餘亦在伯仲之間。

余闕字廷心。一字天心。色白人。世居武威。以父官合肥。遂家焉。元統元年進士。累官淮南行省左丞。分守安慶。陳友諒陷城。自剄死。贈行省平章。謚忠宣。著有青陽集。闕以文學致身。而力障東南。與許遠張巡後先爭烈。故集中所著。皆有關當世安危。其詩以漢魏爲宗。優柔沈涵。於元人中別爲一格。

周伯琦字伯溫。鄱陽人。當順帝時。伯琦以文章知遇。出入禁廷。後出爲浙西肅政廉訪使。招諭張士誠。拜江浙行省參知政事。進左丞。至正二十四年。除江南諸道行御史臺侍御史。後三年。浙西平。引

歸鄱陽。著有近光集三卷。扈從詩一卷。近光集中述朝廷典制爲多。可以備掌故。扈從詩中記邊塞聞見爲詳。可以考風土。而伯琦文章淹雅。亦足以摹寫而敘述之。溯元季之遺聞者。此二集與楊允孚灤京百詠。亦略具其梗概矣。

張翥字仲舉。晉寧人。至元初。用隱逸薦。召爲國子助教。分教上都。尋退居淮東。會修宋遼金三史。起翰林國史院編修官。累遷翰林學士承旨。致仕。加河南行省平章政事。給俸終身。著有蛻庵集。翥詩法受於仇遠。得其音律之奧。其詩清圓穩貼。格調頗高。近體長短句極爲當時所推。然其古體亦伉爽可誦。詞多諷諭。往往得元白張王之遺。王漁洋居易錄曰。蛻庵元末大家。古今詩皆有法度。無論子昂伯庸輩。卽范德機。揭曼碩。未知伯仲何如。其論當矣。

李孝光字季和。樂清人。隱居教授。至正七年。詔徵隱士。以祕書監著作郎召。明年陞文林郎。祕書監丞。著有五峯集。季和爲人美髯偉幹。茅山張伯雨贊詩有孰與言詩李鬚叟。載聞新作過黃初之句。元詩綺靡者多。孝光獨風骨遒上。力欲排突古人。樂府古體。皆刻意奮厲。不作唐音。近體五言。疎秀有唐調。七言頗出入江西派中。而俊偉之氣。自不可遏。

迺賢字易之。本葛邏祿氏。譯言馬也。南陽人。薦授翰林編修官。著有金臺集。迺賢天才宏秀。去兀好問爲近。雖晚年內登翰林。外參戎幕。而仕進非所汲汲。惟以遊覽唱酬爲事。故氣格軒翥。無世俗猥瑣之態。其名少亞薩都刺。核其所作。視薩都刺無不及也。

吳景奎字文可。蘭溪人。年三十。海道萬戶劉貞爲浙東憲副掾。嘗辟爲從事。明年貞去。景奎亦歸。久之。用部使者薦。署興化縣儒學錄。以母老辭不就。至正十五年。卒於家。著有药房樵唱。其五言古體。皆原出自居易。七言古體間似李賀。近體亦音節宏敞。豪放自喜。宋濂爲作集序。亦極相推挹。

貢師泰字泰甫。宣城人。以國子生中江浙鄉試。除泰和州判官。薦充應奉翰林文字。累官至戶部尚書。著有玩齋集。師泰本以政事傳。而少承其父奎家學。又從吳澄受業。復與虞集揭傒斯遊。故文章亦具有源本。其在元末。足以凌厲一時。詩格尤爲高雅。虞楊范揭之後。可謂挺然晚秀矣。

成廷珪字原常。一字元章。又字禮軌。揚州人。好學不求仕進。惟以吟詠自娛。奉母居市廛。植竹庭院間。頗有山林意趣。晚遭世亂。避地吳中。踪跡多在松江。後竟沒於雲間。著有居竹軒集。廷珪與河東張翥爲忘年交。其詩音律體製。多得法於翥。而聲價亦與之相亞。詩中所載酬答者。如楊維楨危素楊

基李黼余闢張雨倪瓚皆一代勝流。劉欽爲作集序。稱其五言務自然。不事雕劙。七言律最爲工深。合唐人之體。然其七言古詩亦頗邁麗也。

郭翼字義仲。崑山人。嘗獻策張士誠不用。歸耕婁上。老得訓導官。假蹇而終。翼學問博洽。既不得志。惟刻意於詩古文。嘗自號東郭生。又稱野翁。而名所著集曰林外野言。翼從楊維楨遊。詩頗近其流派。其間如望夫石精衛詞諸篇。皆用鐵崖樂府體。尤爲酷似。要其筆力挺勁。絕無懦響。在元季詩人中。可謂矯然特出者矣。

張雨字伯雨。一名天雨。別號貞居子。錢塘人。隱於黃冠。至正間卒。著有句曲外史集。伯雨詩文豪邁灑落。體格遒上。早年及識趙孟頫。晚年猶及見倪瓚。顧阿瑛。楊維楨。中間如虞集。范檉。袁桷。黃溍。諸人。皆以方外之交。深爲投契。故耳濡目染。具有典型。而談藝諸家。亦置之於文士之列。不復以異教視之矣。

許恕字如心。江陰人。至正中。薦授澄江書院山長。旋棄去。會天下已亂。乃遁迹賣藥於海上。與山僧野人爲侶。善自晦匿。罕相識者。故徵召不及。著有北郭集。恕詩格力頗遒。往往意境沈鬱。而音節高

朗。無元季靡靡之音。近體頗似陳與義。遭逢喪亂。故多愁苦之詞。然如偶成詩之一。逕豆苗綠。獨行溪水西。繁露墜叢竹。新流漲芳隄。偶與樵者語。忽聞幽鳥啼云云。亦未嘗不翛然清遠也。

張憲字思廉。山陰人。家玉笥山。因以爲號。少負才不羈。晚爲張士誠所招。署太尉府參謀。稍遷樞密院都事。元亡後。變姓名。寄食僧寺。旦暮手一編。人不得窺。死後視之。其平生所作詩也。憲學詩於楊維楨。維楨許其獨能古樂府。今集中樂府琴操。皆頗得維楨之體。其他感時懷古諸作。類皆磊落骯髒。豪氣坌湧。維楨又云。吾鐵門稱能詩者。南北凡百餘人。求其似憲及吳下袁華輩者。不能十人。

丁鶴年字亦曰鶴年。蓋用孟浩然字浩然例也。色目人。本世家子。遭亂不求仕宦。篤志尚操。兼以孝聞。元亡。避地四明。後歸老武昌山中。著有海巢集。鶴年旣絕意於功名。惟覃思吟詠。故所得頗深。尤長於五七言近體。往往沈鬱頓挫。逼近古人。無元季纖靡之習。至順帝北狩以後。興亡之感。一託於詩。悱惻纏綿。眷眷不忘故國。瞿宗吉歸田詩話所稱行蹤不異梟東徙。心事惟隨雁北飛句。及逃禪室與蘇生話舊一篇。可以知其素志矣。

錢惟善字思復。自號心白道人。錢塘人。領至正元年鄉薦。官至儒學副提舉。張士誠據吳。退隱吳

江之筒川。又移居華亭。明洪武初卒。著有江月松風集。陳旅序稱其妥適清雋。娓娓乎有唐人之遺風。品題頗當。

謝應芳字子蘭。武進人。爲人耿介尚節義。至正初。江浙行省舉三衢清獻書院山長。阻兵居吳之葑門。轉徙吳淞江上。教授之暇。以詩酒自娛。著有龜巢集。應芳紳繹經史。作爲文章。咸有根柢。閩人張志道評其詩雅正純潔。可與傅與礪相伯仲。識者以爲名言。

周霆震字亨遠。安成人。早年刻意學問。多從宋諸遺老遊。得其緒論。延祐中行科舉法。再試不售。遂杜門。專意詩古文。著有石初集。霆震生於前至元末。卒於明洪武間。親見元代之興亡。故其詩憂時傷亂。感憤至深。如古今城謠。李澤陽死節歌。杜鵑行。過玉成砦。關城曲。郡城高人食人。延平龍劍歌。寇至雜詠。軍中苦樂謠。宿州歌諸篇。並敍述亂離沈痛酸楚。使異代尙如見其情狀。昔汪元量水雲集。論者以爲宋末之詩史。霆震之集。其亦元末之詩史歟。

王逢字原吉。自稱席帽山人。江陰人。當至正間。被薦不就。避地吳淞江。適張氏據吳。東南之士。咸爲之用。逢獨高蹈遠引。及洪武初。徵召甚迫。又以老疾辭。著有梧溪集。逢少學詩於陳漢卿。得虞集之

傳才氣宏敞而不失謹嚴。集中載宋元之際忠孝節義之事甚備。每作小序以標其崖略。足補史傳所未及。蓋其微意所寓也。

戴良字叔能。浦江人。嘗學文於柳貫黃溍吳萊。學詩於余闢。至正辛丑順帝用薦者言。授淮南江北等處行中書省儒學提舉。後至吳中。依張士誠。知士誠不足與謀。挈家泛東海。欲間道歸擴廓軍。不得達。僑居昌樂。洪武六年南還。變姓名。隱四明山。明太祖徵入京。欲官之。以老疾固辭。忤旨自裁。著有九靈山房集。良詩風骨高秀。迥出一時。曉懷宗國。慷慨激烈。發爲吟詠。多磊落抑塞之音。故其自贊謂歌黍離麥秀之詩。詠賸水殘山之句。蘇伯衡贊其畫象。亦謂其跋涉道途。如子房之報韓。其彷徨山澤。如正則之自放云。

貢性之字友初。宣城人。尙書師泰之族子。元季以胄子除簿尉。後補閩省理官。洪武初。大臣以性之薦。性之避居山陰。更名悅。躬耕自給。以終其身。著有南湖集。其題畫馬詩云。記得曾陪仙仗立。五雲深處隔花看。題葡萄詩云。憶騎官馬過灤陽。馬乳纍纍壓架香。蓋惓惓不忘故國。又題陶靖節像曰。解印歸來尙黑頭。風塵吹滿故園秋。一生心事無人識。剛道逢迎愧督郵。其不事二姓之意。尤灼然可見。

顧瑛一名阿瑛。又名德輝。字仲瑛。崑山人。少輕財結客。年三十。始折節讀書。與天下勝流相唱和。卜築玉山草堂。池館聲伎。圖畫器玩。甲於江左。風流文采。傾動一時。著有玉山璞稿。嘗自題其畫像曰。儒衣僧帽道人輶。天下青山骨可埋。若說舊時豪俠興。五陵衣馬洛陽街。紀其實也。楊循吉蘇談曰。阿瑛好事而能文。其所作不逮諸客。而詞語流麗。亦時動人。故在當時得以周旋騷壇之上。非獨以財故也。

楊維楨字廉夫。號鐵崖。山陰人。泰定四年進士。初署天台尹。改錢清場鹽司令。轉建德總管府推官。擢江西儒學提舉。未及上。而兵亂。遂不復仕。放浪於詩酒歌舞之間。明初。命修禮樂書。旋以老病辭歸。著有東維子集。鐵崖古樂府。復古詩集。麗則遺音等書。樂府始於漢武。後遂以官署之名爲文章之名。至鮑照而始見奇矯。至李白而極於變化。幽艷奇詭。別出蹊徑。歧於李賀。元之季年。多效溫庭筠體。柔媚旖旎。全類小詞。鐵崖以橫絕一世之才。乘其敝而力矯之。根柢於青蓮昌谷。縱橫排奡。自闢町畦。其高者直突過古人。特其才務馳騁。意務新異。不免滋末流之弊。是在學者善擇之矣。

張昱字光弼。廬陵人。左丞楊旺扎勒鎮江浙。昱參謀軍府。官至左右司員外郎。行樞密院判官。元

未棄官不仕。放浪山水。年八十三乃卒。著有可閒老人集。光弼才氣縱逸。其詩學出於虞集。故具有典型。如五王行春圖。歌風臺諸作。皆蒼莽雄肆。有沈鬱悲涼之概。天寶宮詞。筆下曲。宮中詞諸作。不獨詠古之工。且足備史乘所未載。

陳高字子上。溫州平陽人。至正十四年進士。授慶元路錄事。平陽陷。棄妻子。往來閩浙間。至正十六年。浮海過山東。謁河南王庫庫特穆爾於懷慶。密論江南虛實。庫庫特穆爾欲官之。會疾作。卒。著有不繫舟漁集。子上文格頗雅潔。詩惟七言古體不擅場。絕句亦不甚經意。其五言古體。源出陶潛。近體律詩。格從杜甫。面目稍別。而神思不遠。亦元季之錚錚者矣。

### (三) 詞家

詞體成於晚唐五代。而盛行於兩宋。極盛難繼。此亦自然之理。然元人去宋未遠。如趙松雪。仇山村。張師道。姚聖瑞。陸牆東。劉起潛等。皆目擊天水之亡。親濡染於宋季遺老。又如張伯雨。張仲舉。薩雁門等。薪火相傳。遠有端緒。故或則致慨於興亡之際。得靈均美人香草之遺。或則寄情於山水之間。繼志和青窈綠蓑之唱。聲辭並茂。足以追蹤南北宋名家者。未嘗無人。而好爲高論者。輒謂元代無詞。致

毛氏汲古閣刻宋詞六十一家之多。而元人乃無一焉。明珠大貝。聽其消沈。放言之害。一至於此。洎乎清末。長沙張氏臨桂王氏歸安朱氏始搜墜舉逸。次第刊行。於是元賢之詞。方得大顯於世。功不在顧俠君下。茲以限於篇幅。僅舉其犖犖大者。然已足證元無詞說之悠謬矣。

王惲仕牘見前。著秋澗詞四卷。其點絳唇送董秀才西上云。楊柳青青玉門關外三千里。秦山渭水。未是消魂地。坦臥東床。恐減風雲氣。功名際。願君著意。莫搵春閨淚。後庭花破子晚眺臨武堂云。綠樹遠連州。青山壓樹頭。落日高城望。烟霏翠滿樓。木蘭舟。彼汾一曲。春風佳可遊。已有黃河遠上之概。而春從天上来見故宮人感賦云。回頭五雲雙闕。恍天上繁華。玉殿珠櫳。白髮歸來。昆明灰冷。十年一夢無踪。寫杜娘哀怨。和淚點彈與孤鴻等句。尤有無限興亡之感。樂府紀聞稱其效吳彥高作此詞。不引用故實。而澹宕可喜。不誣也。

劉因仕履見前。其菩薩蠻云。元龍未改當年氣。呼山臥向高樓底。今日到山村。青山故意昏。商歌聊一振。千里浮雲靜。老子氣猶豪。山靈未可驕。西江月山亭留飲云。看竹何須問主尋。村遙認松蘿。小車到處是行窩。門外青山屬我。張叟臘醅藏久。王家紅藥開多。相留一醉意如何。老子掀髯曰可。

念奴嬌憶仲良云。中原形勢東南壯。夢裏譙城秋色。萬水千山收拾就。一片空梁落月。烟雨松楸。風塵淚眼。滴盡青青血。平生不信人間更有離別。舊約把臂燕南。乘槎天上。曾對河山說。前日後期今日近。悵望轉添愁絕。雙闕紅雲。三江白浪。應負肝腸鐵。舊遊新恨。一生都付長鋏。近人况周儀。謂其真摯語見性情。和平語見性養。洵精鑑不磨也。

劉秉忠字仲晦。邢州人。少爲僧。隨其師海雲入見世祖。遂留之。從世宗時人稱爲聰書記。至元初。拜光祿大夫。位太保。參預中書省事。卒贈太師。謚文正。追封常山王。著有藏春散人集。其點絳唇詞云。十載風霜。玉關紫塞。都遊徧。驛途方遠。夜雨留孤館。燈火青熒。莫把吳鉤看。歌聲軟。酒斟宜淺。三盞清愁散。又云。古寺蕭條。十年再到經行路。舊題新句。總是關心處。睡起西軒。轉覺添幽趣。斜陽暮淡。烟疎雨濕。徧山前樹。又云。客夢初驚。雪晴風冷。千山曉。塞烟沙草。又上郵亭道。石窟蘿龜。爲我君應掃。何時到。放懷吟嘯。相伴山間老。仲晦奇人。不藉文章傳。而詞之工乃如是。

陸文圭仕履見前。其探春慢和心淵己巳元夕韻云。細草黏冰。疎林補雪。衰翁未覺春暖。曝背低簷。燎衣破竈。誰識舞臺歌館。樂事如今嬾。謝隣伴東招西喚。何消看試華燈。月光今夕圓滿。念昔繁

華帝里。侍鳳輦夜遊。棚曉人散。迓鼓方催。韻簫正美。忽被西風吹過。簌簌梅花落。忍聽得一聲羌管。懷古傷情。淚痕溼春衫。短悲愴故國。似讀蘭成哀江南賦矣。

姚雲文字聖瑞。高安人。宋咸淳進士。入元授承直郎。撫建兩路儒學提舉。有江村遺稿。其摸魚兒賦艮岳云。渺人間蓬瀛何許。一朝飛入梁苑。輞川梯洞層崖出。猶帶鬼愁龍怨。窮遊宴。談笑裏。金風吹折桃花扇。翠華天遠。悵莎沼螢粘。錦屏烟合。草露泣蒼蘚。東華夢。好在牙檣珊瑚。畫岡歷歷曾見。落紅萬點。孤臣淚。斜日牛羊春晚。摩雙眼。看塵世鰤宮。又報鯨波淺。吟鞭拍斷。便乞與媧皇。化成精衛。填不盡遺憾。蒼涼沈鬱。蘇辛後勁也。

張伯淳字師道。崇德人。宋末舉童子科。至元間。以薦除杭州教授。遷浙東道按察使知事。官至翰林侍講學士。有養蒙先生詞一卷。柳梢青賦枯梅。寄張郎中馬同知云。冷淡根荄。小春時候。兩蕊三花。栽向西湖。移來東閣。一任安排。絕憐瘦影橫斜。但宜在山巔天涯。花裏平安。嶺頭孤秀。繁悴爭些。按宣德七年重刊本養蒙集。有其曾孫銓跋云。伯淳爲安撫使趙與譽培。與譽子昂父也。伯淳自跋稱與內弟子昂趙公同時。集中書梁中砥畫卷云。子昂余所親。蕭山縣學重建大成殿記。伯淳撰。子昂書。則

伯淳之在元初。風流儒雅。固與天水王孫相伯仲也。

劉壎字起潛。號水村。南豐人。宋季隱居不仕。入元以薦官延平教授。著有水雲村吟稿。附詞。其謁金門自序云。臨汝有歌者。稍慧。咸淳中。嘗與吟朋夜醉其樓。對予唱賀新郎詞。至劉郎正自當年少。更那堪天教賦與許多才調之句。笑謂予曰。古曲兒今日恰好使得。予因以此意作小調題壁。明日遂行。後二年再訪之。壁間醉墨尚存。而人已他適矣。然舊詞多有見之者。姑錄於此。詞云。眉月小。紅燭畫樓歌繞。唱到劉郎頻笑道。古詞今恰好。深夜銀屏香裊。明日雕鞍塵杏。一晌春風容易曉。三生思不了。溫柔旖旎。不減飛卿端己也。

仇遠仕履見前。著有無絃琴譜。其慶春宮詞云。江影涵空。山光浮水。畫樓直倚東城。落葉聲稀。歸鴻聲杳。晚風卻遞鐘聲。去天咫尺。祇疑是齊雲摘星。闌干凝佇。愁見垂楊烟絮繁縝。官梅冷笑相迎。怕繁枝容易凋零。因念吟仙鶴去。斷橋誰賦疎清。染雲如黛。這雪意看看做成。有誰知得庾信閒愁。陶令閑情。此詞用周美成清真詞原韻。則必依周舊譜可知。今以周詞相較。換頭第二句少一字。因念吟仙鶴去一句少二字。且當分作四字兩句。然詞意已足。或山村意爲變通歟。

趙孟頫仕履見前。侯文燦名家詞集。收松雪齋詞。較本集多十二闋。其虞美人浙江舟中云。潮生潮落何時了。斷送行人老。消沈萬古意無窮。盡在長空淡淡鳥飛中。海門幾點青山小。望極煙波渺。何當駕我以長風。便欲乘槎浮到日華東。又木蘭花慢和李賀房韻云。愛青山繞縣。更山下水繁回。有二老風流。故家喬木。舊日亭臺。梅花亂零春雪。喜相逢置酒藉蒼苔。拚卻眼迷朱碧。慙無筆寫瓊瑰。徘徊。蔚仰興懷。塵世事。本無涯。偶乘興來遊。臨流一笑。洗盡征埃。歸來算能幾日。又青回柳葉燕重來。但願朱顏長在。任他花落花開。邵復孺云。公以承平王孫。而嬰世變。黍離之悲。有不能忘情者。故長短句深得騷人意度。

盧摯仕履見前。其摸魚兒題雪樓先生歲寒亭詩卷云。爲君歌歲寒亭子。無煩洲畔鸚鵡。江山勝概風霜地。要近魯東家住。丘壑趣。應素愛昂霄。老柏孤松樹。登高作賦。想白雪陽春。碧雲日暮。別有倚樓處。金闈彥。尙憶西清接武。年來喬木如許。團茅時復羲皇上。我醉欲眠卿去。歌欲舉。還自悟君家琢就瓊瑤句。疎齋試與倩倚竹佳人。湘絃赴節。涼滿北窗雨。

劉將孫仕履見前。著有養吾齋詩餘。其踏莎行閒游云。水際輕烟。沙邊微雨。荷花芳草垂楊渡。多

情移徒忽成愁。依稀恰似西湖路。血染紅箋。淚題錦句。西湖豈憶相思苦。只應幽夢解重來。夢中不識從何去。又阮郎歸舟中作云。斜陽江路柳青青。傳杯那放停。上船不記送人行。南風吹酒醒。江曲曲。路繁繁。月明潮水生。送將殘夢作浮萍。角聲何處城。殊有南唐風味。

劉敏中章邱人。至元中爲監察御史。累遷翰林學士承旨。卒謚文簡。著有中庵集。附詩餘。其清平樂自序云。西野內翰奉使寄示佳篇累幅。三韓山川風土之勝了然目中。夫能以吟詠之樂。而忘其跋涉之勞。固君子之所尚也。披賞之餘。少答雅覩。且以奉旋旆一笑。詞云。雲窗月戶。水秀山奇處。畫裏二三千里。一步哦詩一住。詩中却也思家。寄來滿紙烟霞。辦了皇華事業。做成淡淡生涯。與集中老病自戲南鄉子等調。均借儻可喜。

曹伯啓仕履見前。著有漢泉樂府。其醉江月次王君陽李敏之過龍門韻云。洪崖中斷似層樓。幻出層樓疊脊。欲問真源淩絕頂。安得乘風羽翮。勢利相忘。驅馳不憚。面背皆京國。源泉混混。悅如夾右碣石。遙想巢父襟懷。東溟烟霧裏。片帆如席。逸氣崢嶸。今老矣。惆悵劍門千尺。細草平沙。敝裘羸馬。長路無人識。家山回首。不應猶作行客。

姚燧仕履見前。有牧庵詞二卷。其虞美人牧庵卽事爲李元素作云。竹風吹落疏疏雨。紈扇收殘暑。小軒幕地細香來。莫是鄰家早有木犀開。玉環穿耳誰家女。自獻歌金縷。新聲和出紫檀槽。袖出烏絲。纔說要揮毫。綠頭鵝贈辛尙書家琵琶妾何氏。錦堂深。獸爐香噴沈烟。紫檀槽金泥花面。美人斜抱當筵。輕羅綬素肌瑩玉。近鸞翅雲鬟梳蟬。玉筍輕拋。魚文細撥。鳳皇飛上四條絃。牙板煩襟消盡。秋氣滿庭軒。今宵月依稀。向人欲鬪嬋娟。變新聲能翻舊曲。眼前風物淒然。路漫漫漢妃出塞。夜悄悄商婦移船。馬上愁思江邊怨感。分明多向曲中傳。因無力。勸人金盞。須要倒垂蓮。小令如歐晏慢詞近姜張文人之詞。乃與專家競勝矣。

吳鎮字仲珪。嘉興人。自號梅花道人。著有梅花庵稿。其漁父云。紅葉村西夕照餘黃蘆灘畔月痕初。輕撥棹。且歸歟。挂起漁竿不釣魚。又云。點點青山照水光。飛飛寒雁背人忙。衝小浦。轉橫塘。蘆花兩岸一朝霜。又云。醉倚漁舟獨釣鼈。等閒入海卽乘潮。從浪擺任風飄。縮手懷中放却橈。此詞家逸品也。

趙文字儀可。號青山。廬陵人。東湖書院山長。著青山詩餘一卷。其阮郎歸梨花云。冰肌玉骨淡裳衣。素雲生翠枝。一生不曉謫仙詩。零香應自知。微雨後。禁烟時。洗妝君莫遲。東風不解惜妍姿。吹成

蝴蝶飛。鳳林書院草堂詩餘錄其瑞鶴仙劉氏園西湖柳云。綠楊深似雨。西湖上舊日情絲恨縷。風流似張緒。羨春風依舊年年眉嫵。宮腰楚楚。倚畫闌曾鬪妙舞。想而今似我零落。天涯却悔相妒。病絕長秋去後。楊白花飛。舊腔誰譜。年光暗度。淒涼事不堪訴。記菩提寺路。段家橋水。何時重到夢處。況柔條老去。爭奈繫春不住。低徊宛轉。置之宋遺民沙社詞中。幾難辨別。儀可亦有心人哉。

虞集仕履見前。著有道園樂府一卷。其賀新郎自序云。五月中以小疾家居。陳衆仲助教言乳燕飛華屋調。最宜時速度數曲。病其辭妙則聲劣。律穩者語逼。適有友人期家人到官所而弗至。賦此詞云。丹荔明如火。想江城薰風乍透。繡簾青鎖。寶篆香銷。初睡起葉底流鶯又過。算幾度思歸未果。欲剪冰綃憑誰寄。恐腰圍漸減愁無那。臨岸曲命輕舸。涼宵冉冉銀蟾墮。望清輝千里照人。霧低雲嬋。準擬雕梁棲飛燕。早晚新巢定妥。歎會少離多似我。留滯文園頭先白。念琴心久爲芳塵鎖。將舊恨賦江左。觀其自序知其所致力矣。

王旭字景初。東平人家貧力學。教授四方。嘗爲碭山令所賓禮。與同郡王構。及永平王磐俱以文章名世。天下號爲三王。著有蘭軒集。惟四庫有輯本。近歸安朱氏刻其詞一卷。其大江東去離豫章舟

泊吳城山下。云南游三載。只江山不負中原詩客。萬里行裝無別物。滿意風雲泉石。牛斗星邊。靈槎縹  
繩。鬢影銀河溼。哀歌誰和。劍光搖動空碧。回首帝子長洲。洪崖仙去。風雨魚龍泣。海外三山何處是。  
黃鶴歸飛無力。天半佳人袖中瑤草。日暮空相憶。乾坤遺恨。月明吹入長笛。吐氣如虹。想見其胸襟不  
凡。

薩都刺仕履見前。著有雁門詞一卷。其滿江紅金陵懷古云。六代豪華春去也。更無消息。空悵望。  
山川形勝。已非畴昔。王謝堂前雙燕子。烏衣巷口曾相識。聽夜深寂寥打孤城。春潮急。思往事。愁如  
織。懷故國。空陳迹。但荒烟衰草。亂鴉斜日。玉樹歌殘秋露冷。胭脂井壞寒螿泣。到如今只有蔣山青。秦  
淮碧。小闌干云。去年人在鳳凰池。銀燭夜彈絲。沈水香消。梨雲夢暖。深院繡簾垂。今年冷落江南夜。  
心事有誰知。楊柳風柔。海棠月澹。獨自倚闌時。俊逸雅令。足以嗣響清真。

張翥仕履見前。著有蛻巖詞二卷。翥幼從父官於杭。與貞居子張伯雨俱學於仇山村之門。故其  
詞筆俊雅不凡。足繼白石梅溪。草窗玉田諸公之後。其沁園春廣陵九日與劉士幹成元璋泛舟邗溝  
云。何許登臨路繞蕪城。岡連楚皋。愛流雲低響。歌催瓊樹。微波照影。人去而仙桃。松院移樽。柳橋攜袖。謫

處蘭舟且暫捎。秋無際。望空江雁遠。落木天高。不妨左手持螯。更右把金尊送濁醪。歎雞臺草暗。淒然興廢。龍山烟冷。老矣英豪。白髮寧饒黃花任插。要裏西風破帽牢。劉郎醉把吳箋笑擘。試與題糕。

張雨事跡見前。著有貞居詞。其浪淘沙自序云。周晉仙諱文璞者。有詞云。還了酒家錢。便好安眠。大槐宮裏著貂蟬。行到江南知是夢。雪壓漁船盤礴古梅邊。也信前緣鵝黃雪白又醒然。一事最奇君聽取。明日新年。晉仙宋南渡未名士。一號方泉老人。此詞鮮于困學每愛書之。百年後方外士張雨追和一章。以爲笑樂。惜困學公不能爲我賞音。詞云。拋下杖頭錢。取次高眠。玉梅金縷孟家蟬。說著錢塘都似夢。嬾問游船。誰信酒壚邊。別有仙緣。自家天地一陶然。醉寫桃符都不記。明日新年。詞品之高。適如其人。

舒頤字道原。績溪人。年十五六。與同郡程文講明經史之學。後至元中。辟貴池教諭。秩滿。轉台州學正。遭逢世亂。奉親歸遁山中。嘗避寇嚴谷被執。頤正色叱賊。賊感而釋之。其詩盤鬱蒼古。不染纖巧織維之習。書法尤樸拙。識者以爲得漢隸法。學者稱貞素先生。著有華陽貞素齋集。附詞。其滿江紅自序云。時雪快晴。苗民攻宣。未克往來。郡邑間擾攘尤甚。憲府移司於徽。視而不問。歎時事之靡寧。哀生

靈之塗炭。因賦此曲。詞云。天也多情。巧幻出天河寒水。多態度悠悠颺颺。輕黏窗紙。萬里豈無祥瑞應。四方已在飢寒裏。把溪山好處縱模糊。須臾耳。江海闊。風塵起。狐兔狡。鷹鵠恥。假蠻夷威柄。侵漁而已。諸老忠良皆桂石。九重仁聖真天子。待明朝晴霽看青山。清如洗。其望治之思溢於言表。

朱晞顏字景淵。長興人。著有瓢泉吟稿。詞附其滿庭芳和趙仲敬詠雪云。剪水飛花。裁冰作絮。龍宮不管嚴寒。斜侵風帽。吟鬢忽衰殘。誰念染園倦客。黃金盡作賦才慳。飄流久。寒欺敝褐。猶是馬蹄間。兒時曾從獵。呼鷹野外。落雁雲端。猛呼酒霜韁溼徧紅鴛。倚馬酣歌秦妓。紫貂暖不上裘船。今遲暮。翩翩孤劍。寂寞渡桑乾。具有白石玉田風骨。

張埜字古夫。邯鄲人。著有古山樂府二卷。臨川李長翁序之云。僕遊京師。古山張公一見招置館下。燈窗雪案。披誦公所著樂章。湛然如秋空之不雲。燁然如春華之照谷。淒然如猿啼玉澗。昂然如鶴唳清霄。砉然如庖丁鼓刀。翩然如公孫舞劍。千變萬態。意高語妙。真可與蘇辛二公齊驅並駕。其八聲甘州戊申再到西湖云。憶湖光醉別幾春秋。飄泊京師。恨無窮烟水。無情歲月。無限相思。萬里風沙夢覺。山色碧參差。忙對玻璃鏡。照我塵姿。欲寫從前離闊。便安排畫舸。準備新詩。見六橋遺構。烟雨強

擣支。怨東風紅消翠減。比向來渾是老西施。如何得劉郎雙鬢。長似當時。

倪瓚字元鎮。無錫人。嘗自謂嬾瓚。亦曰倪迂。工詩善書畫。所居曰清閟閣。有潔癖。盥濯不離手。家本素封。至正初。忽散其財給親友故人。咸怪之。未幾兵起。富室悉被禍。瓚扁舟蓑笠。往來江湖上。獨免於難。著有清閟閣集。其江城子感舊云。窗前翠影溼芭蕉。雨瀟瀟。思無聊。夢入故園山水碧迢迢。依舊當年行樂地。香徑杳綠苔饒。沈香火底坐吹簫。憶妖嬈。想風標。同步芙蓉花畔赤欄橋。漁唱一聲驚夢覺。無覓處。不堪招。殊灑脫可喜。

謝應芳仕履見前。其水調歌頭自序云。余卜居千墩。嘗作水調歌頭。今也人事乖違。欲還故土。故復和前韻。以述其情。並以留別吳下諸友。詞云。齒牙豁來久。老氣尙橫秋。買得歸耕黃犢。兒輩幸無愁。相近六龍城下。只在三家村裏。結屋小如舟。倚樹覽山色。且免賦登樓。看官爵都不似。醉鄉侯。里翁閒話。便同學士坐瀛洲。寄語東吳朋友。乘興能來隔浦。艤棹聽漁謳。無酒不須慮。解我破貂裘。又苦薩蠻七夕作云。鋒棱磨盡方藏拙。老懷羞對天孫說。風葉動清商。依稀似九章。飄蕭雙鬢雪。臥看彎彎月。月缺有時圓。人無再少年。其恬淡自適之趣。可與梅花道人清閟閣主頡頏矣。

邵亨貞字復孺號清溪。華亭人。有蛾術詞選四卷。有隆慶壬申。四明沈良臣後序。稱復孺元末人。博通敏贍。雖陰陽醫卜佛老書。靡不精敷。訓導松江府學。以子誣誤戍潁上。久乃赦還。卒年九十三。自著者名塋處集。其摸魚子吳門客中九日次魏彥文韻云。雁來時晚寒初勁。青燈搖動窗戶。商聲暗起。鄰牆樹。觸景亂愁還聚。秋又暮。奈四野淒涼。無處無笳鼓。狂吟醉舞。記滿帽簪花。分籌藉草。騎馬忘歸路。懷人遠。有恨憑誰寄語。虛名長是相誤。天涯節序渾非舊。留得滿城風雨。心萬縷。漫自喜孤高。不惹沾泥絮。羈懷倦訴。好分付兒曹。耘粗三徑。早晚賦歸去。集中慢詞大率類此。均饒有二窗筆致。誰謂詞衰於元耶。

#### (四)曲家

元之文學見重於世者。曲也。曲之爲藝。雖曰小道。其難實倍於詩詞。何以言之。詩之近體。求其格律聲調。古體求其氣韻風骨而已。欲與漢魏唐宋作家。馳騁文壇。固非易事。若論初步。則平仄妥適。格調工穩。已斐然可觀。至詞雖有短調中調長調之別。苟能清詞麗句。悉中律調。則步武花間。繼踵兩宋。非難事也。曲則不然。由小令而散套而雜劇而傳奇。遞推遞進。歷一境自有一境之程。作曲者於平仄

四聲而外。又須顧及字之清濁高下。宜陰者不可填以陽聲。宜陽者不可填以陰聲。此種束縛。一似重繭。加以曲牌名目千百類聚。宮調配屬南北異宜。一有乖違。千夫指摘。苟非洞明竅要。不足以言曲也。顧作曲如是之難。幾令人望塵卻步。然明於箇中三昧。亦有樂事可尋。譬如帝王神仙。非凡人所能爲也。而作曲者。不妨以一身兼之。時而帝王。則萬國衣冠綸綺立施。時而神仙。則九天珠玉咳吐生風。推而至於萬彙品類。莫不出之以維妙維肖之言論。所謂以生花燦舌之筆。寄其怡情悅性之趣者。是也。且其定律。亦有較他種文字爲寬者。例如作賦。通篇不得有重韻。曲則不拘也。往往前曲所押之韻。於後曲中重押。不足爲病。又詩文作法。須一意到底。曲則以齣之關目爲變化。故曲文前後不連屬。不相害也。是曲律雖嚴。未嘗不有通融之處。凡此準則。皆是元人倡之。元人之曲。上自士大夫。下至倡夫。無不爲也。爲之未嘗不工。風飄雲舉。遂擅一代之長。後之談文學史者。乃與楚騷漢賦唐詩宋詞連類。而並稱。有以哉。

元之曲。皆有所本。宋之詞及大曲。爲其胚胎。金之院本。揭彈詞。爲其雛形。試分別言之。小令則作曲一支。與詞無甚區別。僅詞句間加以襯字而已。聯散曲而成一套。謂之散套。散套所用曲牌。在一宮

調中審其緩急。定其先後。或用尾聲。或不用尾聲。其連絡次序。與宋之大曲相彷彿焉。雜劇則一本四折爲通例。五折爲變例。在一折中必一調一韻。與散套無異。扮演劇文。與院本無異。有白有唱。與擲彈詞無異。所異者。其體爲代人立言也。至於聯數十套之曲。匯成一本。是曰傳奇。傳奇之作。南曲爲多。體製自由。(一) 酬目之多少不拘。(二) 每酬無一定之宮調。視排場爲轉移。(三) 破一人獨唱之例。(四) 楔子易以家門。(五) 篇末必有下場詩。此體盛行。已在元末。要而言之。小令散套。則爲自抒胸襟之作。雜劇傳奇。則全是代人立言之作。此其大別也。其間作者。據王國維宋元戲曲史云。元初名臣中。有作小令套數者。唯雜劇之作者。大抵布衣。否則爲省掾令史之屬。蒙古色目人中。亦有作小令套數者。而作雜劇者。則唯漢人。蓋自金末重吏。自掾吏出身者。其任用反優於科目。至蒙古滅金。而科目之廢。垂八十年。爲自有科目來未有之事。故文章之士。非刀筆吏無以進身。則雜劇家之多爲掾吏。固自不足怪也。沈德符萬歷野獲編。及臧懋循元曲選序。均謂蒙古時代。曾以詞曲取士。其說固誕妄不足道。余則謂元初之廢科目。卻爲雜劇發達之因。蓋自唐宋以來。士之競於科目者。已非一朝一夕之事。一旦廢之。彼其才力無所用。而一於詞曲發之。且金時科目之學。最爲淺陋。此種人士。一旦失

其業固不能爲學術上之事。而高文典冊。又非其所素習也。適雜劇之新體出。遂多從事於此。而又有二三天才出於其間。充其才力。而元劇之作。遂爲千古獨絕之文字。据是言之。則元劇之發達。轉因科舉之廢。遂使蒙古異族入主中夏。亦得文學之光榮。此事之不可逆料者也。余嘗讀元鍾嗣成錄鬼簿。知其盛衰。可分三時期也。(一)蒙古時代。自太宗取中原。至世祖至元一統之初。此四十餘年。作者最盛。著作之存留亦多。卽鍾書所謂前輩已死名公才人。有所編傳奇行於世者。(二)一統時代。自世祖至元十六年。至順帝後至元時。此五十餘年。除二三家外。不多覩焉。卽鍾書所謂方今已亡名公才人。余相知者。及已死才人不相知者。(三)爲順帝至正二十七年間。作者更罕。作品亦如強弩之末。卑卑不足道矣。卽鍾書所謂方今才人相知者。及聞名而不相知者也。綜是三時。較而錄之。亦一代文學得失之林也。爰本錄鬼簿。參以明寧獻王太和正音譜。將其作家。擇要而陳。至於作品。則小令套數。間登一二。雜劇則限於篇幅。取其一二支。聊作管中之窺豹云爾。

劉秉忠。仕履見前。秉忠自遇世祖。功名事業。載在史冊。茲可無論矣。其詞曲亦婉麗可誦。其乾荷葉曲云。「乾荷葉。色蒼蒼。老柄風搖蕩。減了清香。越添黃。都因昨夜一場霜。寂寞秋江上。」此爲秉忠

自度曲詠乾荷葉。卽用乾荷葉爲牌名。猶是唐辭之意。又有一首弔南宋云。「南高峯。北高峯。慘淡煙霞洞。宋高宗。一場空。吳山依舊酒旗風。兩度江南夢。」此爲借腔別詠。其曲悽惻感慨。千古寡和。又三奠子曲云。「念行藏有命。煙水無涯。嗟去雁。羨歸鴉。半生身累影。一事鬢成華。東山客。西蜀道。且回家。(么篇云)壺中日月。洞裏煙霞。春不老。景長佳。功名眉上鎖。富貴眼前花。三杯酒。一覺睡。一甌茶。」亦如置身羲皇以上。而無與塵世之紛華也。

商挺。字孟卿。別字左山。曹州濟陰人。其先本姓殷氏。避宋諱改焉。挺年二十四。汴京破。北走。依冠氏趙天錫。與元好問楊惠游。元初爲行臺幕官。爲京兆宣撫司郎中。中統元年。改宣撫司爲行中書省。遂僉行省事。明年。進參知政事。坐言事罷。起爲四川行樞密院事。累遷副使。十年。出爲安西王相。十五年。王薨。十七年。王府相罷。坐事得免。二十年。復爲樞密副使。尋以疾辭。二十五年薨。年八十。贈太師。開府儀同三司。上柱國。魯國公。謚文定。元初西北鉅公。如楊西菴之蘊藉。姚雪齋之才鑒。王鹿菴之品潔一世。商左山之凝重朝右。皆爲詞林所宗。惜全集散亡。未窺全豹。而左山作流傳更少。今錄其數曲。俾讀者知元朝文章氣運之盛。皆開國諸公有以啓之也。散曲有步步嬌十九首最著。今錄其四。「綠柳

青青和風蕩。桃李爭先放。紫燕忙。隊隊銜泥戲雕梁。柳絲黃。堪畫在幃屏上。」又云。「悶向危樓凝眸望。翠蓋紅蓮放。夏日長。萱草榴花競芬芳。碧紗窗。堪畫在幃屏上。」又云。「敗柳殘荷金風蕩。寒燕聲嘹喨。閑盼望。紅葉皆因昨夜霜。菊今黃。堪畫在幃屏上。」又云。「暖閣偏宜低低唱。共飲羊羔釀。宜醉賞。金池蠟梅香。雪飛揚。堪畫在幃屏上。」

王元鼎字里無考。以曲得重名。有折桂令一支。詠桃花馬云。「問劉郎驥控亭槐。覺紅雨蕭蕭。亂落蒼苔。溪上籠歸橋。邊洗罷。洞口牽來搖玉轡。春風滿街。摘金鞍流水天台。錦繡毛胎。嘶過玄都。千樹齊開。」時歌兒郭氏順。時秀者。爲劉時中所賞。與元鼎交密。偶有疾。思馬版腸充饌。元鼎卽殺所騎五花馬。取腸以供。都下傳爲佳話。(後繡襦記借用此事)其時中書參政爲阿魯溫。尤屬意於郭。至則戲謂之曰。我比王元鼎何如。對曰。參政宰相也。元鼎才人也。燮理陰陽。致君澤民。則學士不及參政。嘲風詠月。惜玉憐香。則參政不如學士。阿魯溫大笑而罷。事見堯山堂外記。

楊果字正卿。祁州蒲陰人。金正大初。登進士第。元初。起爲幕官。官至參知政事。謚文獻。有西菴集。太和正音譜。評其詞如花柳芳妍。茲錄其小桃紅詠採蓮女三支。其一云。「採蓮湖上採蓮嬌。新月凌

波小。記得相逢對花酌。那妖嬈。殢人一笑千金少。羞花閉月沉魚落雁。不恁也魂消。」其二。「採蓮人唱採蓮詞。洛浦神仙似。若比蓮花更強似。那些兒多情怕解風流事。淡粧濃抹。輕顰微笑。端的勝西施。」其三。「採蓮湖上採蓮人。悶倚蘭舟問。此去長安路相近。恨劉晨。自從別後無音信。人間好處。詩籌酒令。不管翠眉顰。」

盍志。字西村。盱眙人。官至學士。正音譜評其詞如清風爽籟。生平以散曲著名。其越調小桃紅鯨川八景八首。又雜詠八首。仙呂醉中天八首均佳。茲錄醉中天第一支。以見一班。詞云。「粉面如花朵。雲髻綰香螺。眉拂春山翠碧波。脣墜櫻桃顆。一捻腰肢嬾娜。宜行宜坐。強如月裏姮娥。」

胡紫山。以字行。又號少凱。籍貫失考。官至宣慰使。正音譜評其詞。如秋潭孤月。詞不多見。時有歌兒珠簾秀朱氏。姿容姝麗。雜劇爲當時第一。紫山極鍾愛之。嘗譜沉醉東風一支以贈云。「錦織紅邊翠竹。絨穿海上明珠。月淡時。風清處。都隔斷落紅塵土。一片閒情任卷舒。挂盡朝雲暮雨。」由是其名益彰。

張養浩。字希孟。號雲莊。濟南人。官至陝西行臺中丞。諡文忠。有歸田類稿。正音譜評其詞如玉樹

臨風。茲錄其中呂紅繡鞋警世二首。其一。「纔上馬齊聲兒喝道。只這的便是那送了人的根苗。直引到深坑裏恰心焦。禍來也何處躲。天怒也怎生饒。把舊來時威風不見了。」其二。「正膠漆當思勇退。到參商纔說歸期。只恐范蠡張良笑人癡。腆著胸登要路。睜著眼履危機。直到那其間誰救你。」其胸懷恬退。有如此者。

盧摯仕履見前。摯不僅以詩文見長。所作詞曲亦疏朗有致。與劉秉忠齊名。有珠簾秀者。爲當時官伎。摯於送別時。曾作雙調落梅風一支云。「纔歡悅。又間別。痛殺俺好難割捨。畫船兒載將春去也。空留下半江明月。」可謂一往情深矣。然摯不第以情韻見長。亦有感喟蒼涼之作。其折桂令懷古十八支。類皆感慨淋漓。茲錄其鄰下懷古一首。「笑征夫伏櫪悲吟。才鼎足功成。銅爵春深。鼓動歌殘。天愁夢斷。明月西沈。算只有韓家畫錦。對山川輝映來今。喬木空林。幾度西風。感慨登臨。」

姚燧仕履見前。燧以古文詞名世。曲則不經見。顧其所作。亦婉麗可誦。其寄征衣凭欄人曲云「欲寄君衣君不還。不寄君衣君又寒。寄與不寄間。妾身千里難。」深得詞人三昧。其雙調撥不斷春景。亦佳。詞云。「草萋萋。日遲遲。王孫士女春遊戲。宮殿風微燕雀飛。池塘沙暖鴛鴦睡。正值著養花天。

氣。」

徐琬。字子方。號容齋。一號養齋。又自號汝叟。東平人。官至翰林學士承旨。卒謚文獻。其怨別一套甚佳。篇長不備錄。茲錄其尾聲。「幾時得柔條兒。再接上連枝樹。暖水兒重溫活比日魚。那的是着人斷腸處。牕兒外夜雨。枕邊廂淚珠。則我這一點芳心做不得主。」

忽木。一名時用。字用臣。世爲康里部人。康里。卽漢高車國也。父燕真。從世祖征伐有功。忽木姿稟英特。進止詳雅。世祖奇之。命給事東宮。師事贊善王恂。祭酒許衡。至元十四年。授利用少監。十五年。出爲燕南河北道提刑按察副使。終世祖世。拜平章政事。成宗卽位。拜昭文館大學士。大德四年卒。武帝時追謚文貞。正音譜。評其詞如閒雲出岫。其辭朝散套中鵠踏枝云。「醉江樓。臥山丘。淡笑虛名。小子封侯。仕路上爲官倦手。沉埋了錦帶吳鉤。」其銖視軒冕。塵視金玉。要是不可及。

趙孟頫。仕履見前。孟頫以故國王孫。作新朝顯宦。風流文采。輝映一時。世傳其嘗欲置妾。以小詞調管夫人云。「我爲學士。你作夫人。豈不聞陶學士有桃葉桃根。蘇學士有朝雲暮雲。我便多娶幾個吳姬越女。有何過分。你年紀已過四旬。只管占住玉堂春。」夫人答云。「你儂我儂。忒煞情多。情多處

熱似火。把一塊泥。捻一個你。塑一個我。將咱兩個。一齊打破。用水調和。再捻一個你。再捻一個我。我泥中有你。你泥中有我。與你生同一個衾。死同一個椁。（叶果）此詞各家筆記多已載過。所以不忍棄者。以其詞妙也。惟不知曲名耳。

白无咎字里未詳。官學士。正音譜評其詞如太華孤峯。又云。子然獨立。巋然挺出。若孤峯之插晴昊。使人莫不仰視也。宜乎高薦。无咎以散套名。無劇。其鶲鵠曲尤爲人傳誦。詞云。「儂家鶲鵠洲邊住。是箇不識字漁父。浪花中一葉扁舟。睡煞江南煙雨。（么篇云）覺來時滿眼青山。抖擻綠蓑歸去。筭從前錯怨天公。甚也有安排我處。」

馮子振字海粟。攸州人。自號怪怪道人。仕爲承事郎。集賢待制。與天台陳孚剛中友善。剛中極敬畏之。自以爲不可及。子振所作曲至多。以和白无咎鶲鵠曲爲最著。其自序云。「余壬寅歲留上京。有北京伶婦御園秀之屬。相從風雪中。恨此曲無續之者。且爲前後多親炙士大夫。拘於韻度。如第一箇父字。便難下語。又甚也有安排我處。甚字必須去聲字。我字必須上聲字。音律始諧。不然不可歌。此一節又難下語。諸公舉酒索余和之。以泮吳上都天京風景試續之。」今摘錄一支。山亭逸興云。「嵯峨

峯頂移家住。是箇不唧噭樵父爛柯時樹老無花葉葉枝枝風雨。（么篇云）故人曾喚我歸來却道不如休去。指門前萬疊雲山是不費青蚨買處。」洵戛戛獨造語。

虞集仕履見前。集在翰苑時宴散學士家有歌兒順時秀者唱折桂令一句而兩韻名曰短柱極不易作。集愛其新奇可喜時席上適談及三國蜀漢事卽依調賦之云。「鸞輿三顧茅廬漢祚難扶日暮桑榆深渡南瀘長驅西蜀力拒東吳美乎周瑜妙術悲夫關羽云殂天數盈虛造物乘除問汝何如笑賦歸歟。」兩字一韻平仄通押較一句兩韻者其難倍蓰矣先生道義文章照耀千古出其餘緒尤能工妙若此洵乎天才不可多得也。

鮮于樞字伯機漁陽郡人至元間爲浙江行省都事官至太常典簿有困學齋集樞以書名擅一代文章政事皆爲所掩卽以政事論任行省都事時意氣雄豪晨出載筆牘與其長廷爭是非一語不合輒欲拂袖而去亦可見其風骨至於文章則虞道園曾題其畫像謂「斂風沙裘劍之豪爲湖山圖史之樂翰墨軼米蔡而有餘風流擬晉宋而無怍」可以想其風致矣所作散曲不多八聲甘州江天暮雪一套最著名太和正音譜載其大安樂一支今錄之詞云「後人笑我愚和慙瀟湘影裏且徜徉」

不談劉項與孫龐。近小窗誰羨碧油幢。」子去矜字必仁。平生以散曲著。堯山堂外紀錄其塞兒令一  
支甚佳。詞云。「漢子陵晉淵明。二人到今香汗青。釣叟誰稱農父誰名去就。一般輕五柳莊月白風清。  
七里灘浪穩潮平。折腰時心已媿。伸脚處夢先驚。聽千萬古聖賢評。」餘不多見。正音譜評其詞如奎  
璧騰輝。嘗與海鹽楊氏昆仲善。(長國材次少中爲康惠公之子)盡以樂府作法授之。故楊氏家樂。  
有海鹽腔之名。皆去矜教之也。

劉致字時中號逋齋石州寧鄉人廣東懷集令彥文子致初任永新州判歷翰林待制出爲浙江  
行省都事卒貧無以爲葬王真人壽衍躬往弔哭周其遺孤舉其柩葬於德清縣與己之壽穴相近春  
秋祭掃不怠其曲以水仙子四支最著盛名自序曰「若把西湖比西子淡粧濃抹總相宜玉局翁詩  
也填詞者竊其意演作世所傳唱水仙子四首仍以西施二字爲斷章櫻麓有樵者聞而是之卽以春  
夏秋冬賦四章命之曰西湖四時漁歌其約首句韻以兒字時字爲之次西施二字爲句絕然後一洗  
而空之邀同賦謹如約」今錄其曲云「湖山堂下鬧竿兒爛熳韶華三月時朝來風雨催春事把鶯  
花攢斷死映蘇隄紅綠參差淺絳雪纖桃萼嫩黃金搓柳絲風流呵鬪草的西施」又云「蝦鬚簾捲

水亭兒。玉枕桃笙睡起時。荷香勾引薰風至。掬清漣雪藕絲。嫩涼生璧月瓊枝。鸞刀切銀絲。膾蟻香浮碧玉卮。受用呵。避暑的西施。」又云。「西風逗入北窗兒。一扇新涼暑退時。白蘋紅蓼多情思。寫秋光無限詩。占平湖樹抹胭脂。雲擁扇青搖柄。粟飄香金綴枝。快活呵。翫月的西施。」又云。「梅花初試膽瓶兒。正是逋郎得句詩。同雲把斷山中寺。軟香塵不到此。怯清寒林下風姿。侵素體添肌粟。妬雲鬟老冰絲。清絕呵賞雪的西施。」

貫雲石。阿里海涯之孫。父名貫只哥。雲石遂以貫爲氏。號酸齋。年十三。膂力絕人。使健兒驅三惡馬疾馳。持槊立而待。馬至騰上之。越二而跨三。連槊生風。觀者辟易。或挽彊射生逐猛獸。上下峻阪如飛。諸將咸服其趨捷。稍長。折節讀書。初喪父官。爲兩淮萬戶府達魯花赤。鎮永州。一日。解所綰黃金虎符。讓弟忽都海涯佩之。北從姚燧學。燧見其古文。峭厲有法。及歌行古樂府。慷慨激烈。大奇之。俄選爲英宗潛邸說書秀才。仁宗踐祚。拜翰林侍讀學士。中奉大夫。知制誥。同修國史。乃稱疾辭。還江南。泰定元年五月八日卒。年三十九。贈集賢學士。中奉大夫護軍。追封京兆郡公。謚文靖。酸齋晚年爲文。日邃。詩亦冲淡。草隸等書。變化古人。自成一家。其視死生若晝夜。絕不入念慮。臨終有辭世詩云。洞花幽草。

結良緣。被我瞞他四十年。今日不留生死相。海天秋月一般圓。洞花幽草蓋二妾名也。酸齋休官辭祿後。或隱屠沽。或侶樵牧。常於臨安市中立碑額。貨賣第一人間快活丸。人有買者。展兩手大笑示之。領其意者。亦笑而去。一日錢塘數衣冠士人游虎跑泉。飲間賦詩。以泉字爲韻。中一人但哦泉泉泉。久不能就。忽一叟曳杖而至。應聲曰。泉泉泉亂迸珍珠個個圓。玉斧斫開頑石髓。金鉤搭出老龍涎。一衆驚問曰。公非貫酸齋乎。曰。然然然。遂邀同飲。盡醉而去。其依隱玩世多類此。生平不作雜劇。以套數小令著。正音譜評其詞如天馬脫羈。時與徐再思甜齋齊名。後人集之。名曰酸甜樂府云。

薩多刺。仕履見前。薩以詩名。曲亦不愧作家。正音譜評其詞。如天風環珮。其所作妓女蹴踘一套。最膾炙人口。中有梁州第七一支尤佳。詞云。「素羅衫垂彩袖低籠玉筍。錦勒襪襯烏靴款蹴金蓮。」古官場立站下人爭羨似月殿裏飛來的素女。甚天風吹落的神仙。拂花露榴裙乍冉。滾香塵繡帶蹁躚。打着對合扇拐全不斜偏。踢着對鴛鴦扣且是輕便。對泛處使穿膝抹膝的攢搭。拶俊處使拂袖沾衣的撇演。妝翹處使迴身出鬢的披肩。猛然笑喘。紅塵兩袖纖腰倦。越豐韻。越嬌軟。羅帕香勻粉汗妍。拂落花鉏。」讀此詞可謂形容盡致矣。

楊梓。字失考。海鹽澉浦人。至元末。以從征爪哇功。爲安撫總使。後爲杭州路總管。卒謚康惠。梓性節俠風流。尤善音律。與貫雲石交善。得其樂府之傳。雜劇中豫讓吞炭。霍光思諫。皆其手製。教家僮歌之。州人傳其家法。以能歌聞於浙右。卽俗所謂淡鹽腔也。今錄其豫讓吞炭第四折中呂上小樓。「說着呵心頭怒擁。無處發送。恨塞長空。氣結秋雲。淚灑西風。將俺主公頭作器皿。筵前使用。則你道波俺這爲的痛也不痛。(么)你道順天者昌。逆天者凶。我怎肯二意三心。背義忘恩。有始無終者。麼教鼎鑊烹。鐵鉞誅。凌遲苦痛。休想俺這鐵心腸。半星兒改動。」

右名公鉅卿。於文章政事外。寓情樂府。出其緒餘。亦能刻畫宮商。以爲娛樂。蓋由於和順積中。英華自然發於外也。最而錄之。以冠斯篇。

庾天錫。字吉甫。大都人。中書省掾。除員外郎。中山府判。正音譜評其詞。如奇峯散綺。所作雜劇十五種。今皆不傳。惟南昌懷古一套。尙存陽春白雪中。錄見一班。(商角調黃鸝兒)懷古懷古。物換千年。星移幾度。想當日帝子元嬰。閻公都督。(踏沙行)彩射龍光。雲埋鐵柱。迷津烟暗。度水平湖。高士祠堂。旌陽殿宇。洪恩路。藕花無數。(蓋天旗)殘碑淋雨。留得王郎佳句。信步攜筇。登臨閒竚。雁驚寒。

衡陽浦。秋水長天落霞孤鶩。（應天長）東接吳。南甸楚。紺塢荒邱。蒼烟古木。俯挹遙岑。傷未足。夕陽暮。空無語。昔人何處。（尾聲）孤塔插晴空。高閣臨江渚。棟飛南浦雲。簾捲西山雨。觀勝概。壯江山。歎鳴鑾罷歌舞。

馬致遠字東籬。江浙行省務官所作雜劇有十四種。今存者爲青衫淚。岳陽樓。陳搏高臥。漢宮秋。薦福碑。任風子六種。正音譜評其詞如朝陽鳴鳳。又云。「其詞典雅清麗。可與靈光景福相頡頏。有振蠻長鳴。萬馬皆瘞之意。又若神鳳飛鳴於九霄。豈可與凡鳥共語哉。宜列羣英之上。」當時樂府盛稱關馬鄭白。關爲關漢卿。馬爲馬東籬。鄭爲鄭德輝。白爲白仁甫。四家之詞。直如鈞天韶武之音。後有作者。不易及也。臧晉叔元曲選所錄四家詞至多。學者可以讀之。漢卿仁甫事蹟已見金代東籬以秋思一套負盛名。周德清評爲元人之冠。錄之如下。「（雙調夜行船）百歲光陰一夢蝶。重回首往事堪嗟。昨日春來。今朝花謝。急罰盞。夜闌燈滅。（喬木查）秦宮漢闕都做了衰草牛羊野。一恁漁樵無話說。縱荒墳橫斷碑不辨龍蛇（慶宣和）投至狐蹤與兔穴。多少豪傑。鼎足三分半腰折。知他是魏耶晉耶。（落梅風）天教富莫太奢。沒多時好天良夜。看財奴硬將心似鐵。空辜負錦堂風月。（風入松）

眼前紅日又西斜。疾似下坡車。曉來青鏡添白雪。上牀與鞋履相別。休笑俺巢鳩計拙。葫蘆提一恁妝呆。（撥不斷）利名竭。是非絕。紅塵不向門前惹。綠樹偏宜屋角遮。青山正補牆頭缺。竹籬茅舍。（離亭宴帶歇拍煞）蛩吟一覺纔寧貼。雞鳴萬事無休息。爭名利何年是徹。密匝匝蟻排兵。亂紛紛蜂釀蜜。急攘攘蠅爭血。裴公綠野堂。陶令白蓮社。愛秋來那些。和露摘黃花。帶霜烹紫蟹。煮酒燒紅葉。人生有限杯。幾個登高節。分付俺頑童記者。便北海探吾來。道東籬醉了也。」此外如越調天淨紗一支。直空今古詞云。「枯藤老樹昏鴉。小橋流水人家。古道秋風瘦馬。夕陽西下。斷腸人在天涯。」明人最喜摹倣此曲。而終無如此自然。故余以爲不可及者。此也。

李直夫。女真人。德興府住。卽蒲察李五。官至湖南廉使。與元明善交好。正音譜評其詞如梅邊月影。作劇十二種。今僅存虎頭牌一種。今錄其第四折第一支（正宮端正好）則爲他誤軍期。遭殘害。依國法斷的明白。尋思來這莽親尊長多妨礙。俺今日謝罪也在宅門外。

李壽卿。名無考。太原人。將仕郎。除縣丞。正音譜評其詞如洞天春曉。又云。「其詞雍容典雅。變化幽玄。造語不凡。非神仙中人。孰能致此。」所作雜劇十種。今存伍員吹簫月明和尚二種。今錄伍員吹

簫第四折第一支（雙調新水令）「困紅塵十載受驅勞。常記得走樊城那時年少。雖不能千金酬節俠。我也曾四海結英豪。投至得末尾三梢。不覺的頭上老來到。」

宮天挺字大用。大名開州人。歷學官。除鈞臺書院山長。爲權豪所中。事獲辨明。亦不見用。卒於常州。鍾嗣成云。先君與之莫逆交。故余常得侍坐。見其吟詠。文章筆力。人莫能敵。樂章歌曲。特餘事耳。正音譜評其詞如西風雕鶴。又云。「其詞鋒穎犀利。神彩輝然。若健翮摩空。下視林藪。使狐兔縮頸於蓬棘之勢。」所作雜劇六種。今存范張雞黍。

李致遠仕履不詳。有雜劇一種。曰還牢末。散曲除樂府羣玉所載小令外。太平樂府載散套四套。正音譜評其詞如玉匣昆吾。今錄其朝天子秋夜吟一首。「梵宮晚鐘。落日蟬聲送。半規涼月半簾風。騷客情尤重。何處樓臺笛聲悲動。二毛班秋夜永。楚風幾重。遮不斷的相思夢。」

鄭光祖字德輝。平陽襄陵人。以儒補杭州路吏。爲人方直。不妄與人交。卒葬西湖。所作聲振閨閣。伶倫輩稱鄭先生。皆知其爲德輝也。正音譜評其詞如九天珠玉。又謂其詞出語不凡。若咳唾落乎九天。臨風而生珠玉。誠傑作也。雜劇有十九種。今存燭梅香。周公攝政。王粲登樓。倩女離魂四種。德輝所

作王粲登樓一劇。其中迎仙客一支。極膾炙人口。詞云。「雕簷紅日低。畫棟綠雲飛。十二玉闌天外倚。望中原。思故國。感慨傷悲。一片鄉心碎。」至其所作情詞。亦自令點可喜。如餽梅香第一折寄生草。「不爭琴操中單訴你飄零。却道窗兒外更有個人孤另。」又六么序。「却原來羣花弄影。將我來說一驚。」此等語何等蘊藉。又大石調初問口一支內云。「又不曾薦枕席。便指望同棺槨。(叶稿音)只想夜偷期。不記朝聞道。」又好觀音一支內云。「上覆你個氣咽聲吞的張京兆。本待要填還你枕剩衾薄。」(叶跑音)語不着相。情意獨至。真得詞家三昧者。又第三折用越調小桃紅。卽爲南曲先聲也。詞中有云。「是害得神魂蕩漾。也合將眼皮開放。你好個熱莽也沈東陽。」又調笑令云。「擘面的便搶白殺那病襄王。呀怎生來番悔了巫山窈窕娘。滿口裏之乎者也沒擋擋。都噴在那生臉上。嚇的那有情人恨無個地縫藏。羞殺也傅粉何郎。請學士休心勞意攘。俺小姐他只是作要難當。」正是尋常說話。略帶譏訕。中間意趣無窮。此便是作家手筆。又倩女離魂一劇。有聖藥王一支云。「近蓼花。纊釣槎。有枯蒲衰草綠蒹葭。過水涯。傍淺沙。遙望見煙籠寒水月籠沙。我只見茅舍兩三家。」如此等句清麗流便。全是本色。

金仁傑。字志甫。杭州人。鍾嗣成云。余自幼時聞公之名。未得與之見也。公小試錢穀。給由浙江。遂一見如平生歎。交往二十年如一日。天曆元年戊辰冬。授建康崇寧務官。明年己巳正月。叙別三月。其二子護柩來杭。知公氣中而卒。嗚呼惜哉。作凌波曲以悼之。詞云。「心交元不問親疏。契飲那能較有無。誰知一上金陵路。歎亡之命矣。夫夢西湖何不歸歟。魂來處。反故居。比梅花想更清癯。」仁傑作品。雖不奇麗。而其大概多有可取焉。正音譜評其詞如西山爽氣。作劇七種。今存蕭何追韓信一種。

鮑天佑。字吉甫。杭州人。錄鬼簿云。初業儒。長事吏。簿書之役。非其志也。跬步之間。惟務搜奇索古而已。故其編撰多使人感動咏歎。余與之談論節要。至今得其良法。才高命薄。今猶古也。竟至崑山州吏而止。正音譜評其詞如老蛟泣珠。作劇八種。皆不存。其正宮白鶴子一支。見欽定曲譜。標目爲戶諫衛靈公第四折之一。亟錄之。以見其鱗爪焉。詞云。「四邊風凜冽。一望雪模糊。行過小溪橋。迷卻前村路。行行裏心恍惚。前進也。意躊躇。我則道斷岸有舟橫。卻元來野水無人渡。」

周文質。字仲彬。其先建德人。後居杭州。因家焉。體貌清癯。學問該博。資性工巧。文筆新奇。家世業儒。俯就路吏。善丹青。能歌舞。明曲調。諳音律。性尚豪俠。好事敬客。元祐二年卒。有雜劇四種。教女兵。杜

韋娘。蘇武還鄉。唐莊宗。均不存。所作散曲。見樂府羣玉。套曲見太平樂府。正音譜評其詞如平原孤隼。今錄其思憶一套。「（雙調新水令）落紅風裏不聞聲。嘆東君漸成薄倖。卻豔治。又飄零葉底殘英。剛留住。惜花性。（喬牌兒）對景愁倍增。追思舊行徑。蘇卿偏識臨川令。悄心腸。忒志誠。（風入松）笑將風月好前程。輕付與俊書生。奈春晴庭院關不定。被東風吹滿宸京。隱隱仙姬去也。悠悠環佩無聲。（撥不斷）柳青青。竹亭亭。觀絕樓頭瀟瀟景。想盡花間怯怯情。添沉心上厭厭病。都只爲剖斂分鏡。（一定銀）寂寂黃昏戶半局。猶立閑庭。誰道下一言爲定。俺執手到數千回。剗地孤零。（離亭歛指煞）相逢常約西廂等。到來不奉東牆命。無言暗省秦樓何夕彩雲回。瑤琴昨日冰絃斷。碧天今夜孤星耿。露寒衣袂輕。風定簾籠靜。偏覺更長漏永。香消不暖夢蝶魂。月明應攬幽禽宿。燈青偏照離鸞影。誰將才子情說與佳人聽。今夜裏休來俺夢境。從知道枕兒單。也填不得被兒冷。」其去豔麗處。不減西廂。

吳仁卿。字弘道。號克齋。人以克齋先生稱之。蒲陰人。歷任府判致仕。其所作金縷新聲。及雜劇五種。均失傳。正音譜評其詞如碧山明月。其佳可知也。今錄其越調詠元宵四支。「（紫花兒序）香釀

靄綺羅還往。密匝匝車馬喧闐。光灼灼燈月交輝。滿街上王孫貴子。相攜着越女吳姬。偏宜鳳燭高張。照珠履果然豪貴。只疑是洞府神仙。閑遊在闌苑瑤池。（小桃紅）歸來梅影小窗移。蘭麝香風細。翠袖瓊簪兩行立。捧金杯絳綃樓上笙歌沸。冰輪表裏通宵不寐。是愛月夜眠遲。（金蕉葉）拚沉醉頻傾綠蠟。恣賞翫朱簾掛起。歌舞動歡聲笑喜。一任銅壺漏滴。（尾）須將酩酊酬佳致。樂意開懷耍喜。但願歲歲賞元宵。只這的是人生落得的。」其描寫燈節景物。歷歷如繪。可喜也。

張可久字小山。一作張伯遠。字可久。號小山。慶元人。以路吏轉首領官。生平不作雜劇。以散曲著名。著有北曲聯樂府三卷。外集一卷。補遺一卷。吳鹽一卷。蘇堤漁唱一卷。小山小令二卷。終元一代。作曲之多。無出其右。余最愛其一半兒調。清詞麗句。最擅勝場。茲錄之如下。秋日宮詞云。「花邊嬌月靜妝樓。葉底滄波冷翠溝。池上好風閒御舟。可憐秋一半兒芙蓉一半兒柳。」又云。「數層秋樹隔雕簷。萬朵晴雲擁玉蟾。幾縷夜香穿繡簾。等潛潛。一半兒開門。一半兒掩。」又酬耿子春海棠詞云。「海棠香雨污吟袍。薜荔空牆閒酒瓢。楊柳曉風涼野橋。放詩豪。一半兒行書。一半兒草。」又云。「梅枝橫翠幕寒生。花淡紗窗淺月明。人倚畫樓羌笛聲。惱詩情。一半兒清香。一半兒影。」皆佳句也。正音譜評其

詞如瑞天笙鶴。又云。「其詞清而且麗。華而不謐。有不喫煙火食氣。真可謂不羈之材。若被太華之仙風。招蓬萊之海月。誠詞林之宗匠也。當以九方皋之眼相之。」其欽佩有如此者。

曹明善。衢州路吏。甘於自適。鍾嗣成稱其樂府華麗自然。不在小山之下。卽賦長門柳二詞者。詞云。「長門柳絲千萬結。風起花如雪。離別復離別。攀折更攀折。苦無多舊時枝葉也。」又云。「長門柳絲千萬縷。總是傷心樹。行人折嫩條。燕子銜輕絮。都不由鳳城春做主。」按以上二詞。見堯山堂外紀七十四卷。謂伯顏擅權之日。刻王徹徹都。高昌王帖木兒不花。皆以無罪見殺。山東憲吏曹明善。時在都下。作岷江錄二曲以風之。大書揭於午門之上。伯顏怒。令左右暗察得實。肖形捕之。明善出避吳中一僧舍。居數年。伯顏事敗。方再入京云。

高克禮。字敬德。一說字敬臣。號秋泉。河間人。以蔭入仕。曾任縣尹。官至慶元理官。治政以清淨爲務。不爲苛刻。以簡澹自處。所作小曲樂府。極爲工巧。茲錄其黃旛薇過慶元貞一支。「燕燕別無甚孝順。哥哥行在意殷勤。三納子簾箱兒問肯。便待要錦帳羅幃就親。唬得我驚急列幕出臥房門。他揩支刺扯住我皂羅裙。我軟兀刺好話兒倒溫存。一來怕夫人情性哏。二來怕誤妾百年身。」中多白話。此

元曲本色也。

張鳴善。揚州人。任宣慰司令史。正音譜評其詞如彩鳳刷羽。又云。「藻思富贍。爛若春葩。郁郁焰焰。光彩萬丈。可以爲羽儀詞林者也。誠一代之作手。宜爲前列。」所作雜劇二種。一爲包待制判斷煙花鬼。二爲黨金蓮夜月瑤琴怨。今不傳。小令除見輟耕錄及堯山堂外紀外。正音譜載有二曲。一北正宮脫布彩云。「草堂中夏日偏宜。正流金爍石天氣。素馨花一枝玉質白蓮藕兩彎瓊臂。」二小梁州云。「門外紅塵袞袞飛。飛不到魚鳥清溪。綠陰高柳聽黃鸝。幽棲意俗客幾人知。山林本是終焉計。用之行舍之藏兮。悼後世。追前輩。對五月五日歌楚些弔湘纍。」此協律之曲也。

右爲省掾臺屬。除張可久等一二人外。皆雜劇名家。想其退食自公。屏居斗室。創爲悲歡離合之人事。吐其引商刻羽之雅詞。不亦令人生羨乎。表而出之。用誌一代文學之盛焉。

王鼎。字和卿。大都人也。與關漢卿同時。且相識。和卿數譏謔關。關雖極意還答。終不能勝。一日。王忽無疾而逝。而鼻垂雙涕尺餘。人皆歎駭。關來弔唁。詢其由。或對云。此釋家所謂坐化也。復問鼻懸何物乎。或又對云。此玉筋也。關云。我道你不識。不是玉筋是嗓。咸發一大噱。(凡六畜勞傷。則鼻中常流)

曠水。謂之嗓子。又愛訐人之短者。亦謂之嗓子。」或戲關云：「你被王和卿輕侮半世。死後還得一籌。關亦不與辨也。」和卿滑稽佻達。傳播四方。中統初。燕市有一胡蝶。其大異常。或以爲仙蝶。燒王賦小曲一支。和卿遂拈醉中天小令云：「掙破莊周夢。兩翅駕東風。三百處名園。一采一箇空。難道風流種。謊殺尋芳蜜蠻。輕輕的飛動。賣花人撈過橋東。」又妓有於浴房中被打者。訴苦於王。王作撥不斷一支云：「假胡伶。聰明。你本待洗淹臘。倒惹得不乾淨。精尻上勻排七道青扇圈。大膏藥剛糊定。早難道假裝無病。」其所作諸詞。詼諧雜出。多半類此。

高文秀。東平人。府學生。蚤卒。正音譜評其詞如金瓶牡丹。所作雜劇三十四種。今存雙獻功。譏范叔。遇上皇三種。所作散曲不多見。僅北宮詞紀卷五。有惜花春起早一套。餘則正音譜載其南呂草池春一支。聯叙古人名人曲。頗新奇。詞云：「自思忖。自議論。從混沌初分。耕田隱姓伊尹。聚螢讀書車胤。會稽擔柴買臣。淮陰乞食韓信。太公垂釣渭濱。伍員吹簫吳郡。孔子絕糧在陳。顏回甘貧守分。王陵沽酒待賓。相如題橋發憤。蕭何司吏出身。樊噲屠戶得運。高祖元是庶民。光武居在村鎮。自古來朝中賢人。閫外將軍。登基明君。開國功臣。誰不生在白屋寒門。當日蘇秦。幾曾胎胞裏便帶黃金印。千丈志。一

跳身。獨步青雲。須爲將相。定立功勳。」

王實甫名無考。大都人事實不概見。正音譜評其詞如花間美人。又云。「鋪敘委婉。深得騷人之趣。極有佳句。若玉環之出浴。華清綠珠之采蓮洛浦。」所作雜劇十三種。今存二種。一西廂記。二麗春堂。西廂記之去麗麗臻於絕頂。金人瑞列之才子書中。以與左莊騷遷杜律相並。其名貴可知。無待贅述。  
（金多竄改。余別有論著。）而麗春堂亦甚美妙。其第一折首數支。極冠冕堂皇。錄之如下。  
（仙呂點絳脣）破虜平戎。滅遼取宋。中原統。建四十里金墉。率萬國來朝貢。（混江龍）端的是走輪飛鞋。車如流水馬如龍。綺羅香裏。簫鼓聲中。盛世黎民歌歲稔。太平聖主慶年豐。正遇着蕤賓節屆。今日個宴賞羣公。光祿寺醞江釀海。尙食局炮鳳烹龍。教坊司趨踏妓女。仙音院整理絲桐。都一時向御苑來供奉。恰便似衆星拱北。萬水朝東。（油葫蘆）則見貝闕蓬臺一望中。從地湧看了這五雲樓閣日華東。恰似訪天台誤入桃源洞。端的便往揚州移得瓊花種。勝太平獨秀岩。冠神龍萬壽峯。則他這雲間一派簫韶動。不弱似天上蘊珠宮。可見才人之筆。無所不能。同時若鄭廷玉吳昌齡王伯成所作劇本。均名重一時。

費君祥。大都人。與關漢卿交。有愛女論行於世。作劇已逸。其子唐臣。正音譜評其詞如山峽波濤。又云。「神風聳秀。氣勢縱橫。放則驚濤拍天。斂則山河倒影。自是一般氣象。前列何疑。」所作雜劇三種。斬鄧通。韋賢簷金已逸。惟貶黃州數丈。散見正音譜。今日本西京大學刻入雜劇三十種中。

楊朝英。字澹齋。青城人。曾選陽春白雪。太平樂府二集。爲散曲淵藪。邀貫酸齋作序。貫曰。我酸則子當澹矣。遂自號澹齋云。正音譜評其詞如碧海珊瑚。茲錄其題吳彩鸞寫雲軒一支。(越調小桃紅)。當年相遇月明中。一見情緣重。誰想仙凡隔。春夢杳無蹤。凌風跨虎歸仙洞。今人不見天孫標致。依舊笑春風。」

劉庭信。爲南臺御史。劉庭翰族弟。俗呼曰黑劉五是。也有水仙子二支。今錄其一。「蝦鬚簾控紫銅鉤。鳳髓茶閒碧玉甌。龍涎香冷泥金獸。繞雕欄倚畫樓。怕春歸綠慘紅愁。霧濛濛丁香枝上。雲淡淡桃花洞口。雨絲絲梅子牆頭。」細膩流麗。亦不愧小山東籬也。

周德清。字挺齋。高安人。著有中原音韻一書。平聲之分陰陽。自挺齋始之也。所作小令散套。綽有大家風格。嘗過廬山。賦朝天子云。「早霞晚霞。妝點廬山畫。仙翁何處鍊丹砂。一縷白雲下。客去齋餘。

人來茶罷。嘆浮生指落花。楚家漢家都做了漁樵話。」此詞字字穩治。移動不得一絲。固是斲輪老手。挺齋家况奇窘。時有斷炊之虞。戲詠開門七件事折桂令云。「倚蓬窗無語嗟呀。七件兒全無。做什麼人家。柴似靈芝。油如甘露。米若丹砂。醬甕兒恰纔夢撒。鹽瓶兒又苦消乏。茶也無加醋也無加。七件事尚且艱難。怎教我折柳攀花。」其貧可想見也。

侯克中。字正卿。鎮定人。號艮齋先生。幼喪明。聆羣兒誦書。不終日。能悉記之。稍長習詞章。自謂不學可造詣。旣而悔之。以爲刊華食實。莫先於理。原易以求。乃爲得之。於是精意讀易。著有大易通義艮齋詩集等書。正卿以散套得盛名。有客中寄情一套尤佳。茲錄其二支。(高過金盞兒)舉金杯倒金盃。金盃未倒心先醉。酒醒時候更淒淒。情似織。招攬下相思無盡期。告他誰。(牡丹春)忽聽樓頭更漏催。別鳳又孤悽。暫朦朧枕上重歡會。夢驚回又是一別離。

任昱。字則明。四明人。少年狎游平康。以小樂章流布裙釵間。晚乃銳志讀書。所作散曲。見於樂府。羣玉者至多。今錄其上小樓題情云。「團圓未成。嬋娟空病。桂子虛庭。翠羽圍屏。雁足寒檠。巴到明空自省。青樓薄倖。恨分開鳳釵鸞鏡。」又朝天子信筆云。「九霄早朝。曾赴金門詔。珠玉在揮毫。胸次誰

同調。談笑枚皋。風流溫嶠。恣疎狂直到老。儘教醉了。走馬長安道。」

范康字子安。杭州人。鍾嗣成謂其明性理。善講解。能詞章。通音律。因王伯成有李太白貶夜郎。乃編杜子美遊曲江。一下筆卽新奇。蓋天資卓異。人不可及也。正音譜評其詞如竹裏鳴泉。所作劇二種。杜甫遊春已逸。今存竹葉舟。錄其第二折中之二支。一新水令云。「我曾向五湖四海自遨遊。則我這拂天風兩枝袍袖。喚靈童採瑞草。供仙子上瀛洲。散誕優遊。嘆塵世幾昏晝。」又梅花酒云。「休待兩鬢秋。與天子分憂。嘆歲月如流。早白了人頭。待獻賦長楊。臨帝闕。我乘彩鳳上瀛洲。俺三人是故友。一箇吹玉笛對巖幽。一箇倚銀筝步滄洲。一箇彈錦瑟上扁舟。」情節固佳。詞亦不弱。

曾瑞字瑞卿。大興人。自北來南。喜江浙人才之多。羨錢塘景物之盛。因而家焉。神采卓異。衣冠整肅。優游於市井。灑然神仙中人。志不屈物。故不願仕。自號褐夫。江淮之達者。歲時餽送不絕。遂得以徜徉卒歲。臨終之日。詣門弔者以千數。鍾嗣成謂其擅丹青。能隱語小曲。有詩酒餘音行於世。今錄其散套。催拍子一支。詞云。「愛共寢花間錦鳩。恨孤眠水上白鷗。月宵花晝。大筵排回雪韋娘。小酌會竊香。韓壽舉觴紅袖。玉纖橫管。銀甲彈箏。酒令詩籌。曲成詩就。韻協聲律。情動魂消。腹藁冥搜。宿恩當受。水

仙山鬼。月妹花妖。如還得遇。不許干休。會埋伏未嘗洩漏。(么)羣芳會首繁英故友。夢回時綠肥紅瘦。榮華過可見疏薄。財物廣始知親厚。慕新思舊。簪遺佩解。鏡破釵分。蜂妬蝶羞。惡緣難救。痼疾常發。業貫將盈。努力承頭。冷殮重餉。口搖舌劍。吻掬唇鎗。獨攻決勝。混戰無憂。不到得落人機彀。」

徐再思。字德可。嘉興人。好食甘飴。故號甜齋。與貢酸齋齊名。有酸甜樂府行於世。其子善長。頗能繼其家聲。再思所作小令。余最愛其水仙子三支。(一)夜雨云。「一聲梧葉一聲秋。一點芭蕉一點愁。三更歸夢三更後。落燈花。棋未收。嘆新豐孤館人留枕上十年事。江南二老憂都到心頭。」(二)紅指甲云。「落花飛上筍牙尖。宮葉猶將冰筋粘。抵牙關越顯得櫻唇豔。怕傷春不捲簾。捧菱花香印粧盒。雪糲絲霞十縷。鏤棗斑血半點。指劉郎春在纖纖。」(三)佳人釘履云。「金蓮脫瓣載雲輕。紅葉浮香帶雨行。漬春泥印在蒼苔徑。三寸中數點星。玉玲瓏環佩交鳴。濺越女紅裙濕。沁湘妃羅襪冷。點寒波小小蜻蜓。」可謂語語俊。字字豔矣。正音譜評其詞如桂林秋月云。

沈和。字和甫。杭州人。能詞翰。善談誼。天性風流。兼明音律。所作瀟湘八景。歡喜冤家。皆用南北合套法。極爲工巧。後居江州。江西人稱爲蠻子關漢卿是也。正音譜評其詞如翠屏孔雀。作劇六種。今不

傳。

范居中。字子正。冰壺其號也。杭州人。父玉壺。前輩名儒。假卜術爲業。居杭之三元樓前。每歲元夕。必以時事題於燈紙之上。杭人聚觀。遠近皆知父子之名。居中精神秀異。學問該博。嘗出大言矜肆。以爲筆不停思。文不閱筆。諸公知其有才。不敢難也。善操琴。能書法。其妹亦有文名。大德年間。被旨赴都。居中亦北行。以才高不見遇。卒於家。有樂府及南北腔行於世。散曲有秋思一套。其《賽鴻秋》云。「想那人妒青山愁蹙在眉峯上。泣丹楓淚滴在香腮上。拔金釵割損在雕闌上。託瑤琴哀訴在冰絃上。無事不思量。總爲咱身上。爭知我懶看書。羞對酒也只爲他身上。」一支中連用六上字爲韻。洵奇格也。  
施惠。字君美。杭州人。居吳山城隍廟前。以坐賈爲業。巨目美髯。好談笑。鍾嗣成云。嘗與趙君卿陳彥實顏君常至其家。每承接款。多有高論。詩酒之暇。惟以填詞和曲爲事。有古今砌話。亦成一集。其好事也如此。所著有幽閨記一種。今尚傳播於崑劇中。

喬吉。字夢符。太原人。自號惺惺道人。又號笙鶴翁。美容儀。能詞章。以威嚴自飾。人敬畏之。居杭州太乙宮前。有西湖詞梧葉兒百篇。名公爲之序。肯疏江湖。垂四十年。欲刊行所作。竟無成事者。陶宗儀

輞畔錄云。「夢符博學多能。以樂府稱重於世。嘗云作樂府亦有法。曰鳳頭猪肚豹尾六字。大概起要美麗。中要浩蕩。終要響亮。尤貴在首尾貫串。意思清新。能若是。斯可以言樂府矣。」所作雜劇。有認玉釵。兩世姻緣。揚州夢。死生交。勘風情。金錢記。荆公遺妾。節婦牌。賢孝婦。九龍廟。黃金臺。十一種。臧晉元曲選。僅刻兩世姻緣。揚州夢。金錢記三種而已。其小令至有風情。嘗記其詠竹衫云。「并刀翦龍鬚爲本。玉絲穿龜背成文。襟袖清涼不染塵。汗香晴帶雨。肩瘦冷搜雲。是玲瓏剔透人。」又天淨紗小令云。「鶯鶯燕燕春春。花花柳柳真真。事事風風韻韻。嬌嬌嫩嫩。停停當當人人。」所作皆清俊秀麗。不愧大家。夢符又長於詩餘。其和黃子常賣花聲詞云。「侵曉園丁道叫嫩紅嬌紫。巧工夫攢枝綴蕊。行歌佇立。灑洗妝新水。捲香風看街簾起。深深巷陌。有個重門開未。忽驚它尋春夢美。穿窗透閣。便憑伊喚取。惜花人在誰根底。」蓋杭城春日婦女喜爲鬪草之戲。故夢符詞云云也。正音譜評其詞如神鰲鼓浪。又云。「若天吳跨神鰲。噀沫於大洋。波濤洶湧。截斷衆流之勢。」所作雜劇十一種。今存三種耳。

睢景臣。後字景賢。揚州人。大德七年。至杭州。與鍾嗣成訂交。嗣成謂其自幼讀書。以水沃面。雖眸紅赤。不能遠視。心性聰明。酷嗜音律。維揚諸公俱作高祖還鄉套數。惟景臣哨遍。製作新奇。皆出其下。

又有南呂一枝花題情云。「人閒燕子樓。被冷鴛鴦錦。酒空鸚鵡盞。釵折鳳凰金。」亦爲工巧。人所不及也。正音譜評其詞如鳳管秋聲。作劇三種。(一)千里投人。(二)鴛鴦牡丹記。(三)楚大夫屈原投江。其子玄明擅散曲。有詠鼓一套。見太平樂府。茲錄其要。孩兒煞一支云。「迎宣詔將我身上掩接高官回把我背上馱。棚角頭鞭索是我隨身禍。一聲聲怨氣都言盡。一棒棒冤讐卽漸多。肚皮裏常飢餓。論着您腔新譜舊。顯得我恨滿言多。」

鍾嗣成。字繼先。號醜齋。大梁人。寄居杭州。爲鄧善之曹克明高弟。累試有司不遇。從吏則有司不能辟。亦不屑就。因作錄鬼簿二卷以寄意。上卷記前輩才士有雜劇者。略記姓字爵里及劇目。下卷則記並世才士。各作一小傳。記其劇目。又作凌波曲弔之。蓋亦風雅好事者也。正音譜評其詞如騰空寶氣。所作樂府小曲。大篇長什。傳之於人。每不留藁。故未能就編焉。如馮驥收券。詐遊雲夢。錢神論。斬陳餘。章臺柳。鄭莊公。蟠桃會等。皆不傳。太平樂府中載其自序醜齋一套。極爲詼諧可喜。如梁州云。「只爲外貌兒不中擡舉。因此內才兒不得便宜。半生未得文章力。空自胸藏錦繡。口吐珠璣。爭奈灰容土貌。缺齒重頰。更兼着細眼單眉。人中短。鬚髮稀稀。那裏取陳平般冠玉精神。何晏般風流面皮。潘安般

俊俏容儀。自知就裏。清晨倦把青鸞對。恨殺爹娘不爭氣。有一日黃榜招收醜陋的。准奪高魁。(餘略)  
錢霖。字子雲。松江人。棄俗爲黃冠。更名抱素。號素菴。多游名公卿間。類輯時人之作。曰江湖清思集。其自作樂府。名醉邊餘興。皆失傳。今於樂府羣玉中。錄其清江引一支。詞云。「夢回晝長簾半捲。門掩荼蘼院。蛛絲掛柳棉。燕嘴粘花片。啼鶯一聲春去遠。」真一枝寫景好筆也。

秦簡夫。字里無考。錄鬼簿云。見在都下擅名。近歲回杭。是與鍾嗣成同時。正音譜評其詞如峭壁孤松。作劇五種。今存破家子弟。趙禮讓肥二種。

蕭德祥。杭州人。以醫爲業。號復齋。凡古文俱槩括爲南曲。街市盛行。又有南曲戲文。雜劇有四春園。小孫屠。殺狗勸夫。四大王歌舞麗春園。包待制三勘。蝴蝶夢。今僅存殺狗勸夫一種。散曲有秋懷一套。今錄其雙調夜行船一支。詞云。「一夜秋聲入井梧。碧紗厨枕剩珊瑚。秦鳳東歸楚雲西去。舊歡娛等閒辜負。」

朱凱。字士凱。自幼子立不俗。與人寡合。小曲極多。所編昇平樂府。及隱語。包羅天地謎韻。皆鍾嗣成作序。而嗣成錄鬼簿。又士凱爲之序。二人之文字交誼。概可相見。凱所作雜劇二種。今祇存昊天塔

一本。

王暉。字日華。杭州人。體豐肥而善滑稽。能詞章樂府。臨風對月之際。所製工巧。有與朱士凱題雙漸小卿問答。人多稱賞。俱存樂府羣玉中。又有雜劇三種。桃花女。臥龍岡。雙賣華。今祇存桃花女一本。

琵琶記。爲南曲之祖。明人以爲高拭所作。其實舛錯。蓋元末高明所撰。非高拭也。按高明字則誠。高拭別字則成。成與誠字形既相似。而聲又相同。且同爲永嘉人。所以貽誤至今。又按高明爲至正五年張士堅榜中第。授處州錄事。辟丞相掾。方谷真叛。省臣於溫人知海濱事。擇以自從。與幕府論事不合。谷真就撫。欲寘幕下。卽日解官。旅寓鄞之櫟社。因作琵琶記。記成時。清夜按拍歌舞。几上蠟炬二枝。光忽交合。因名曰瑞光樓。明太祖聞其名召之。以老疾辭還。卒於家。所著有柔克齋集。見顧俠君元詩選序錄。

右所錄者。爲優游家術。樂道守志之士。於讀書之餘。移宮換羽。搜奇索怪。以筆底之煙霞。供閒中之歲月。作此妙品。自成馨逸。彙而錄之。以殿斯篇。